



AUB LIBRARY

AMERICAN  
UNIVERSITY OF  
BEIRUT



AUB LIBRARY



962.053  
M214mA  
V.1


# محكمة الشعب

المضبطة الرسمية  
لمحاضر جلسات محكمة الشعب

الجزء الأول

١٩٥٤





## مختصر

### الجلسة الاولى لمحكمة الشعب

المنعقدة علنا في الساعة العاشرة صباحا ، بمقر قيادة الثورة  
في الجزيرة ، يوم الثلاثاء ٩ نوفمبر سنة ١٩٥٤ ، الموافق ١٢ ربيع  
الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول  
نوفمبر سنة ١٩٥٤ ، الموافق ٥ ربيع الاول سنة ١٣٧٤ ، بناء  
على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو  
مجلس قيادة الثورة ، وعضوية القائمقام انور السادات ،  
والبكباشي ( ح . ١ ) حسين الشافعي ، عضوى مجلس قيادة  
الثورة .

وبحضور البكباشي محمد التابعى المدعى ، والاستاذ مصطفى  
الهلباوى رئيس نيابة أمن الدولة ، عضوى مكتب التحقيق  
والادعاء .

وتولى تسجيل المحاكمات بالاختزال الاستاذان طلعت الصبان،  
وممدوح توفيق ، مندوبا مصلحة الاستعلامات .

\* \* \*

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد

( حضر المتهم )

الرئيس - فتحت الجلسة .. اولى جلسات محكمة الشعب  
لادعاء .. المتهم موجود ؟

البكباشى محمد التابعى - المدعى - المتهم موجود والقضية جاهزة ..

الرئيس - محاكمة المتهم محمود عبد اللطيف محمد ..  
المتهم - افندم ..

الرئيس - بالادعاءين الاتيين :  
« اتى أفعالا ضد نظام الحكم الحاضر وضد سلامة الوطن فى الداخل والخارج ، وذلك لانه فى يوم ٢٦ من اكتوبر سنة ١٩٥٤ وما قبله بمدينة القاهرة والاسكندرية :

أولا - اشترك مع آخرين فى تنفيذ اتفاق جنائى الغرض منه احداث فتنة دامية لقلب نظام الحكم ، وذلك بانشاء نظام خاص سرى مسلح للقيام باغتيالات واسعة النطاق ، وارتكاب عمليات تدمير بالغة الخطورة ، وتخريب شامل فى جميع انحاء البلاد ، تمهيدا لاستيلاء الجماعة التى ينتمى اليها على مقاعد الحكم بالقوة »

ثانيا - شرع فى قتل البكباشى أركان الحرب « جمال عبد الناصر » رئيس الحكومة تنفيذا للاتفاق الجنائى المشار اليه فى الادعاء الاول » ..

( المادتان ٢ و ٣ من أمر مجلس قيادة الثورة الصادر فى اول نوفمبر سنة ١٩٥٤ بشأن تشكيل المحكمة واجراءاتها ١٠ ) .  
مذنب أو غير مذنب ؟

المتهم - .....

الرئيس - سمعت الكلام الى انقال ؟

المتهم - أيوه ...

الرئيس - فاهم الادعاء المقام عليك ؟

المتهم - أيوه ....

الرئيس - مذنب أو غير مذنب ؟

المتهم - مذنب ..



الرئيس - مذنب ؟

المتهم - أيوه ...

البكباشي محمد التابعي - المدعى - المتهم لما أعلن بالادعاء المقام عليه سألناه اذا كان عنده محامى ، فقال انه مفيش محامى ... وأمر تشكيل المحكمة لايحتم وجود محامى .. والقضية جاهزة والشهود مستعدين وموجودين .  
الرئيس - موجهها كلامه للمتهم - مش عاوز حد يدافع منك ؟

المتهم - عاوز ...

الرئيس - عاوز مين ؟

المتهم - المحامى محمود سليمان غنام ..

الرئيس - واذا كان محمود سليمان غنام مايرضاش ؟

المتهم - يبقى فتحى سلامة ..

الرئيس - واذا كان فتحى سلامة مايرضاش ؟

المتهم - يبقى مكرم عبيد ...

الرئيس - واذا كان مكرم عبيد مايرضاش ؟

المتهم - يبقى اى واحد تختاره المحكمة ..

الرئيس - موجهها كلامه للمدعى - اتصل بالمحاميين دول بالترتيب على حسب طلب المتهم .. الى يرضى منهم ييجى يدافع عنه ييجى .. واذا ماكانش ولا واحد منهم يرضى ييجى هلشان يدافع عنه ، يبقى ينتدب اى واحد تانى .  
المدعى - حاضر يا افندم ..

الرئيس - اذن تؤجل الجلسة ثمانية واربعين ساعة ، على ان تعود المحكمة الى الانعقاد فى الساعة العاشرة من صباح يوم الخميس ١٥ ربيع الاول سنة ١٣٧٤ ( الموافق ١١ نوفمبر سنة ١٦٥٤ ) .

( رفعت الجلسة فى الساعة العاشرة والدقيقة الخامسة صبحا ) .

## مخضر

### الجلسة الثانية لمحكمة الشعب

المنعقدة علنا في الساعة العاشرة والدقيقة العشرين صباحا ،  
بمقر قيادة الثورة في الجزيرة ، يوم الثلاثاء ١١ نوفمبر سنة  
١٩٥٤ ، الموافق ١٥ ربيع الاول سنة ١٣٧٤ .

المؤلفة وفقا للأمر الصادر من مجلس قيادة الثورة بتاريخ  
اول نوفمبر سنة ١٩٥٤ ، الموافق ٥ ربيع الاول سنة ١٣٧٤ -  
بناء على المادة السابعة من الدستور المؤقت .  
والمشكلة برئاسة قائد الجناح جمال مصطفى سالم عضو  
مجلس قيادة الثورة .

وعضوية القائمقام أنور السادات ، والبكباشى ( أ. ح ) حسين  
الشافعى ، عضوى مجلس قيادة الثورة .

وبحضور البكباشى محمد التابعى المدعى العام ، والاستاذ  
مصطفى الهلبساوى رئيس نيابة أمن الدولة ، عضوى مكتب  
التحقيق والادعاء .

وتولى تسجيل المحاكمات بالاختزال الاساتذة طلعت الصبان ،  
وممدوح توفيق وابراهيم فكرى احمد فوده مندوبو مصلحة  
الاستعلامات .

\*\*\*

قدمت القضية رقم ( ١ ) لسنة ١٩٥٤ ( محكمة الشعب )  
المتهم فيها محمود عبد اللطيف محمد .

### حضر المتهم

الرئيس - فتحت الجلسة . . . المتهم موجود

المدعى - المتهم موجود .

الرئيس - جاهز ؟

المدعى - جاهزين .

الرئيس - موجه الكلام للمتهم - سمعت الادعاء الى عليك

المتهم - ايوه .

الرئيس - وقلت انك مذنب ؟

المتهم - ايوه .

الرئيس - ايه اقوالك ؟ السيد حمادة الناحل رايح يترافع منك واحب بالمناسبة دى اقول ان المحكمة تشكر السيد حمادة الناحل لتطوعه بالدفاع عنك .

الاستاذ حمادة الناحل - الدفاع - وانا بدورى اشكر المحكمة على هذه الثقة وأدعو الله أن يمنحني القدرة على اداء دورى ويوفقنى فى مهمتى .

الرئيس - موجه كلامه للمتهم - اتفضل قول اقوالك للمحكمة .  
.. تحب تتكلم انت او السيد المحامى يتكلم عنك .  
المتهم - السيد المحامى

الدفاع - افكر ناخر مناقشته ونسمع اقوال الشهود اولاً .  
رئيس النيابة - المتهم قال فى التحقيق كل حاجة .  
الرئيس - بس يقول ايه اقواله قدامنا .  
الدفاع - ما فيش مانع يقول وبرضه نناقشه تانى .

المدعى - المتهم قال كل حاجة فى التحقيق واعترف بارتكاب الحادث وقال عن المحرضين له وعن طريقة التدبير وكل التفصيلات .

الرئيس للمتهم - قول اقوالك .

**التهمة** - من مدة وأنا في الاخوان ... من سنة ١٩٤٢ ومن مدة  
٤ شهور بسى انضمت للمنظمة السرية ودى مكونة من ثلاثة  
اشخاص محمود عبد اللطيف وهنداوى دوير وسعد حجاج .

**الرئيس** - على صوتك شوية واتكلم على مهلك وخليك هادى .  
**التهمة** - أنا في الاخوان من سنة ١٩٤٣ وما انضمتش للهيئة  
السرية .. الخلية السرية الا من مدة أربعة شهور بسى . والخلية  
السرية مكونة من هنداوى دوير ومحمود عبد اللطيف وسعد  
حجاج . وفي الاربع شهور كنا نجتمع كل اسبوع من نصف ساعة  
الى ساعة في بيت هنداوى دوير كل يوم اثنين وكان اجتماعنا  
لحفظ القرآن ودراسة السيرة والجهاد في سبيل الله . وقبل  
الحادث بأسبوع واحد كان هنداوى دوير قال لنا على حكاية  
الاتفاقية وان الرئيس جمال عبد الناصر وقع الاتفاقية وان  
الاتفاقية دى غلط وخيانة في حق البلد واتفقنا احنا الثلاثة ان  
اللى تتاح له فرصة ينفذ الاغتيال . وبعدين هنداوى دوير جاب  
لى المسدس قبل الحادث بيومين وقال لى المسدس بتاع سعد  
حجاج ماجاش فنقد انت الخطة وبعدين قبل الحادث بيومين  
قوات ان الرئيس حيروح الاسكندرية لحضور المهرجانات الشعبية  
فرحت لهنداوى الساعة العاشرة ونصف بالليل وقتله الى قريته  
في الجريدة فقيل مفيش مانع على بركة الله وقت على سعد  
حجاج الصبح وقتل له بالامر فابدى تأسفه الى محضرش السلاح  
بتاعه علشان يجى معايا وتوكلنا وصافرت على الاسكندرية في  
قطر تسعة ونصف الى يوصل واحدة تقريبا وبعد كده رحى  
محرم بك واتمشيت شويه ودخلت مطعم واتفديت وبعدين رحى  
لوكاندة دار السعادة واخذت حجرة خاصة وغيرت ملاسى وفي  
الساعة اربعة وربع نزلت على ميدان المحطة وجدت جماعة  
متظاهرين رايحين المنشية فمشيت وراهم وبعد ما وصلت  
الميدان وقفت ولما جه الرئيس وهو بيتكلم كلمته اطلقت عليه  
طلقت من المسدس .. بعد كده الناس قبضوا على ورحى



البوليس الحربى فى الاسكندرية وقلت الاقوال بتاعتى امام النائب العام وهو اللى كتب المحضر .

**الرئيس -** للمدعى - عايز تسأله

**المدعى -** أيوه ... الشعبة بتاعتك فى

**المتهم -** فى امبابه .

**المدعى -** بتقول انكم كنتم بتجتمعوا فى الشعبة وتذكروا القرآن والسيرة والجهاد فى سبيل الاسلام ايه المقصود بالجهاد فى سبيل الاسلام ؟

**المتهم -** المقصود به محاربة اعداء الاسلام والحرية .

**المدعى -** مين دول ؟

**المتهم -** كنا بنفسرهم انهم الانجليز واليهود ومن يقف فى سبيل الدعوة الاسلامية ويعدين جت حكاية الاتفاقية وقبل الحادث بأسبوع واحد اجتمعنا وتكلمنا فيها احنا الثلاثة وأقربنا أن الاتفاقية فيها خيانة البلاد وأنها ابخست حق البلاد وادت الانجليز كل الحقوق فى البلد وعلى هذا الاساس بنينا حكمنا .

**المدعى -** انت قرئت الاتفاقية ؟

**المتهم -** قرئت ... وقرئت بعض الملاحق .

**المدعى -** فهمتها ؟

**المتهم -** اللى أنا فهمته منها ادت الانجليز كل الحقوق وقرئت فى الجرائد أنها استبدلت بالخمسمائة مليون جنيه الديون بتوع مصر مبلغ ٣٢ مليون جنيه ثمن أسلاك وكابلات فى القنال .

**المدعى -** الاستبدال ده كان مذكور صراحة ؟

**المتهم -** كان فيه الملاحق وفسرتها جريدة الاخبار .. كانت كتبت قالت استبدال الديون بين كل من مصر وبريطانيا باثنين وثلاثين مليون جنيه ثمن كابلات وبعض المنشآت فى القنال .

**الرئيس -** والا كان فيه حاجة ثانية مزعالك في الاتفاقية ؟

**المتهم -** ايوه فيه حاجة ثانية وهى انه ما كانش ضرورى الاتفاقية لان وجودهم في مصر بعد سنة ١٩٥٦ حتى غير شرعى وحيطلوا من نفسهم خصوصا وان اساليب الحرب اتغيرت والنظم بتاع الحرب داوقت القوات بدل ما تكون مجموعة في حنة واحدة تلقى عليهم قنبلة ذرية فهم كانوا حيفرقوا قواتهم خوفا من القنابل الذرية .

**الرئيس -** يعنى انت كمان جنرال وتفهم في الشئون العسكرية كويس ■

**رئيس النيابة -** رايك ايه لو ما تعمليش الاتفاقية كان الانجليز خيخرجوا ازاى من القنال ... رايك ايه كمواطن او كأخ من الاخوان ؟

**المدعى -** ويتدعو للجهاد .

**المتهم -** خروجهم يحتاج الى جهاد والجهاد جربناه قبل كده في كتائب الجامعة لما راحت القنال كان الانجليز منزعين من الكتائب لقاية ماصرحوا في بعض الصحف وقالوا انهم مستعدين للجلاء بس توقف العصابات .

**رئيس النيابة -** انت قلت انك قريت معاهدة ١٩٣٦ تقدر تقول لنا ايه هى ■

**المتهم -** هى كانت جعلت للانجليز كل حق في البلد انهم يستعملوا كل حاجة بالثمن مثل السكك الحديدية والتموين واى حاجة في المطارات والمواصلات ... كل ده بالفلوس من اجل ذلك كانت الديون التى على بريطانيا لمصر ترتبت من اجور المواصلات والسكك الحديدية .

رئيس النيابة - رأيك ان معاهدة ١٩٣٦ احسن او الاتفاقية احسن ؟

المتهم - معاهدة ١٩٣٦ انتهت طبعاً .

الرئيس - افكر بلاش مناقشة المعاهدات احنا ما بناقش عبد الحميد بدوى وبنأخذ رايه فى الموضوع ...  
رئيس النيابة - أنت دراستك ايه ؟

المتهم - أنا درست الابتدائية أربع سنين فى القسم الليلى ورسبت فيها وكنت دارس قبل كده أولى .  
المدعى - فهمت ايه الفكرة من النظام السرى ؟  
المتهم - الفكرة هى الجهاد فى سبيل الله ودراسة القرآن والسيرة ... ده كل اللى فهمته .

المدعى - الغرض منه ايه ؟

المتهم - الغرض منه محاربة أعداء الاسلام وأعداء الدعوة .

المدعى - مين أعداء الدعوة الاسلامية .

المتهم - أعداء الدعوة الاسلامية .

المدعى - مين ؟

المتهم - اللى يقف فى طريق الدعوة الاسلامية .

المدعى - انت قلت ان قبل الحادث بيومين هنداوى ؟ جابلك مسدس ... منين جابه ؟

المتهم - ما قالش منين جابه .. هو قال لى استعد وما قالش رجابه منين .

المدعى - ما اداكش طلقات ؟

المتهم - ١٥ طلقة .

المدعى - ما قالش منين جابه ؟

المتهم - لا ما قالش .

المدعى - ما اداكش فلوس ؟

المتهم - ادانى اثنين جنيه علشان اصرف منها .

**المدعى** - ما اخذتش خمسة جنيه من على نويتو .

**المتهم** - اداهم لى يوم السفر .

**المدعى** - ليه ؟

**المتهم** - هنداوى قال لى خد منه .

**المدعى** - ليه ؟

**المتهم** - علشان السفر والمصاريف ؟

**المدعى** - ما اخذتش حاجة ثانية ؟

**المتهم** - لا .

**المدعى** - لك دراية باستعمال المسدسات ؟

**المتهم** - ما فيش دراية الا معلومات ضعيفة كنت اخذتها فى

الحرس الوطنى عن الطبنجة وانها تضرب بالتوجيه ... وفى

فلسطين اخذت معلومات غير رسمية كانوا الاهالى يطلعونا

نضرب نار .

**المدعى** - ايه اهتمامكم بالحرس الوطنى وايه الظروف

لانضمامك اليه ؟

**المتهم** - كان فيه نداء للمواطنين بالتطوع وكنت من ضمن

المواطنين اللى تطوعوا .

**المدعى** - ما صدرش لسكم اوامر بالانضمام الى الحرس

الوطنى ؟

**المتهم** - دى حاجة كانت كل الناس بتنضم اليها وتطوعت زى

كل الناس .

**المدعى** - تعرف هنداوى من امتى ؟

**المتهم** - من سنة ١٩٥١ .

**المدعى** - وسعد حجاج من امتى ؟

**المتهم** - من ٤ أشهر .

**المدعى** - تعرف مين تانى من النظام السرى ؟

**المتهم** - دى المجموعة بتاعتنا وما أعرفش حد غيرها .



**المدعى - من رئيس المجموعة**

**المتهم -** هنداوى دوير .

**المدعى -** اتفقتم على مين يقتل الرئيس جمال عبد الناصر

**المتهم -** هنداوى قال كل اللى تتاح له الفرصة منا احنا الثلاثة .

**المدعى -** هل سبق حد حاول ؟

**المتهم -** المحاولة اللى قمت بها كانت محاولة استطلاع بس

ما كانش معايا مسدس .

**المدعى -** امتى وظروفها ايه ؟

**المتهم -** محاولة الاستطلاع كانت فى مؤتمر الموظفين .

**المدعى -** اشرحها للمحكمة .

**المتهم -** فى مؤتمر الموظفين قبل الحادث بيومين رحت عند

أشارة المرور وشفيت الرئيس وما دخلتش جوه لان الحراس مانعين الدخول .

**الرئيس -** الجهاز السرى كان بيشتغل لحساب مين ؟

**المتهم -** لحساب الاخوان .

**الرئيس -** اخوان مين ؟

**المتهم -** الاخوان المسلمين .

**الرئيس -** يعنى كنتم بتحاربوا اعداء المسلمين علشان

الاخوان المسلمين يتربسوا افرض انك قتلت الرئيس هل

انت فاهم ان الحكومة دى عدوة الاسلام وعلشان كده رحت

تقتل رئيسها والا فهمت ان الرئيس بس هو اللى عدو الاسلام

والا الحكومة كلها عدوة الاسلام .

**المتهم -** فهمت ان الرئيس عدو الاسلام .

**الرئيس -** هو لوحده ؟

**المتهم -** اه .

**الرئيس -** بس ؟

**المتهم -** .....

الرئيس - ده اللي فهموه لك .

المتهم - آه .

الرئيس - والجهاز كان يشتغل لحساب الاخوان !

المتهم - ايوه

الرئيس - ما تعرفش من رئيس النظام الخاص ؟

المتهم - لا .

الرئيس - مين اللي يعرف .

المتهم - أنا أعرفان رئيسنا هنداوى والرئيس العمومى

ما أعرفوش .

الرئيس - تعرف صلاح شادى ؟

المتهم - أعرفه لانى فى سنة ١٩٥٢ كنت سافرت معاه لبور

سعيد لمؤامرة ضد الانجليز ولكن ماتمتش .

المدعى - وبعدين ؟

المتهم - العلاقة بعد كده ... كنت أقابله فى المركز العام

أسلم عليه .

المدعى - بس كده !

المتهم - وبعدين طلبتى من امبابة علشان احرس بيت

المرشد العام لغاية ما اعتقل وبعدين سبت الخدمة وجيت فى

امبابة .

المدعى - ليه اختارك انت

المتهم - ما أعرفش .

المدعى - تعرف عبد المنعم عبد الرؤوف !

المتهم - ما أعرفوش .

المدعى - ماشفتوش فى امبابة عند مصطفى الوردانى !

المتهم - لا .

المدعى - ما سبقش عرض عليك سلاح تانى لتنفيذ القتل

غير المسدس ؟

- المتهم - كان عرض عليه مسدس صغير .
- الرئيس - فيه بينك وبين جمال عبد الناصر حاجة ؟
- المتهم - لا .
- الرئيس - شفته قبل كده ؟
- المتهم - لا .
- الرئيس - سلمت عليه ؟
- المتهم - لا
- الرئيس - امال ليه رحت علشان تقتله ؟
- المتهم - فيهموني أن الاتفاقية جناية .
- الرئيس - مين اللى فهمك ؟
- المتهم - هنداوى دوير .
- الرئيس - اطلبوا هنداوى دوير نسمع كلامه .
- المدعى - ماسبقش عرض عليك حزام تلبسه وتجريه عملية  
النسف ؟
- المتهم - هنداوى عرضه عليه الساعة اتناشر ونصف بالليل  
لما رحت اخبره بالسفر فقال ده عندنا حزام تلبسه وتقابل  
الرئيس جمال عبد الناصر وتعانقه ويتفجر وتنسفوا انتم الاثنين .
- المدعى - شفت الحزام ؟
- المتهم - لا .
- الرئيس - مارضتش ليه ؟
- المتهم - ..... .
- الرئيس - خفت على نفسك ؟
- المتهم - لا ماخفتش على نفسى
- الرئيس - ليه مارضتش ما هى كانت الطريقة دى اضمن  
من المسدس ؟
- المتهم - ..... .
- الرئيس - ايه اللى خلاله ما قبلتش ؟

المتهم - لا ما قبلتش .

الرئيس - ما قبلتش ليه ■

المتهم - ..... .

الرئيس - أتكلم حد ماسكك ..... ماتخفش .

المتهم - قلت ماينفعش علشان الزحمة .

الدفاع - ويمكن الرئيس مايرضاش يحضنه .

المدعى - ما أخبرتش حد بعزمك على السفر ■

المتهم - أخبرت سعد حجاج .

المدعى - مفيش حد ثانى ... ماقلتش ليحى سعيد .

المتهم - أنا رحت له علشان آخذ الشنطة ■

المدعى - ماقتلوش حاجة ؟

المتهم - لا ... يمكن يعرف من هنداوى .

المدعى - قابلت نويتو .

المتهم - أيوه ... واخذت منه خمسة جنيه وبس .

المدعى - ماقتلوش حاجة ؟

المتهم - لا

المدعى - قابلت عبد الحميد البنا ■

المتهم - أيوه وماقتلوش حاجة

المدعى - ما اخذتش منه حاجة ؟

المتهم - لا

المدعى - ماتعرفش الخطة ... انت رايع تقتل الرئيس

متفكرش تعمل إيه علشان تهرب ؟

المتهم - لا مفكرتش وهنداوى قال لى الحرس بعد كده

سيطلق عليك النار وتموت .

المدعى - كنت عارف أنك رايع تموت ؟

المتهم - أيوه ■

المدعى - مفكرتش فى طريقة للهرب ؟

المتهم - لا



- الرئيس - حفظت ايه في القرآن ؟  
المتهم - حفظت جزء من سورة البقرة .  
الرئيس - وايه تاني ؟  
المتهم - وبعض آيات .  
الرئيس - بس ؟  
المتهم - وبعض صور قصيرة وسورة يس ( ٤/٣ آل عمران )  
الرئيس - من سنة ١٩٤٢ حفظت ده بس ؟  
المتهم - أيوه .  
الرئيس - ده كل اللى حفظته في ١٢ سنة  
المتهم - كنت كل اسبوع بنحفظ ٥ آيات . وبعض الاسابيع  
تكسل ما نحفظش .  
الرئيس - الدين فيه كسل !  
المتهم - .....  
المدعى - النظام السرى كان مكون من مين ؟  
المتهم - كان مكون من هنداوى وسعد حجاج وأنا .  
المدعى - ماتعرفش الرئاسة لمين ؟  
المتهم - لا  
المدعى - الاوامر كانت بتيجي منين ؟  
المتهم - ما اعرفش كان بيجيها هنداوى .  
المدعى - ماتعرفش بتيجي منين ؟  
المتهم - لا  
المدعى - على نويتو كان في النظام السرى .  
المتهم - لا اعرف .  
الرئيس - تعرف سورة « قل هو الله أحد » .  
المتهم - أيوه .  
الرئيس - اقراها .  
المتهم - بسم الله الرحمن الرحيم « قل هو الله أحد الله الصمد  
لم يلد ولم يولد ولم يكن له كفوا أحد »

- الرئيس - تقدر تشرحها لنا .
- المتهم - ماخذتش شرح .
- الرئيس - امال كانوا بيعلموكم الدين ازاي ؟
- المتهم - شرح عامى كده .
- الرئيس - كانوا بس بيعلموكم الاتفاقيات الدولية ؟
- المتهم - ..... .
- المدعى - تعرف ابراهيم الطيب .
- المتهم - كان مرة هنداوى عرفنى به فى بيته .
- المدعى - على أساس ايه ؟
- المتهم - قال لى أخوك ابراهيم الطيب .
- المدعى - عرفك بحد تانى ؟
- المتهم - واحد اسمه توفيق .
- المدعى - قال لك عليه ايه ؟
- المتهم - قال ده هيكون مندوب القيادة .
- المدعى - قيادة ايه ؟
- المتهم - قيادة الاخوان .
- المدعى - ابراهيم الطيب كلمك ؟
- المتهم - قعدنا نتكلم فى بيت هنداوى دوير فى الجهاد فى  
مسيل الله .
- المدعى - قال لك ايه ؟
- المتهم - حاجات عامة .
- المدعى - ماطلبش منك القيام بأى مأمورية ؟
- المتهم - لا . الى طلب منا توفيق .
- المدعى - قال لك ايه ؟
- المتهم - قال أن فيه السيد أنور السادات عاوزين تدرسوا  
بيته كويس وكمان جريدة الجمهورية وتشوفوا أى طريقة اسلم  
لأننا نقدم على اغتياله .
- المدعى - وبعدين عملتم ايه ؟

المتهم - رحنا هناك وشفنا البيت والجريدة وكان أن استقر الامر على انه سيكون في الجريدة وبعدين قال لنا استنوا لما تصدر أوامر وبعدين انقطع ماجاش .

المدعى - كنت لوحده !

المتهم - أنا وسعد حجاج .

المدعى - ما اداكوش مسدس !

المتهم - لا ..

المدعى - ابراهيم الطيب صنعته ايه ؟

المتهم - محامى ... هنداوى قال لنا انه محامى .

المدعى - تعرف صلته ايه بالجهاز السرى !

المتهم - هنداوى قال انه من الاخوان .

المدعى - ألم تسال عن السبب فى قتل أنور السادات .. قلت ان الرئيس جمال عبدالناصر كان عدو الاسلام طيب والسيد ابور السادات تقتله ليه ؟

المتهم - ما سالتش .

المدعى - مامورية خطيرة زى دى ما تسالش ؟

المتهم - .....

المدعى - انت تعرفه قبل كده علشان يكلفك بمهمة زى دى .

المتهم - .....

الرئيس - انت راجل صاحب دعوة والا متشرد تقتل الناس ؟

المتهم - ....

الرئيس - الدعوة وعرفنا انك ماتفهمش حاجة فى الدين قل هو الله احد ماتعرفهاش وماتعرفش حاجة فى القرآن فى ١٢ سنة ... والاتفاقية ماطلعتش عبد الحميد بدوى . يبقى تقتل ليه ... الراجل اللى بيقول لك اقتل ده ماسك لك ذلة فيه لك ذلة عند هنداوى دوير .

المتهم - لا مافيش

الرئيس - آمال بتطاوعه ليه لا يقول لك اقتل ... اقنعك

بأيه بالنسبة لانور السادات ؟

المتهم - أقنعنى بأنه يبحارب الاسلام فى مقالاته .

المدعى - قرئت مقالاته ؟

المتهم - قرئت بعضها .

المدعى - فيها حرب على الاسلام ؟

المتهم - كان فيه مقالة يقول فيها ان الاديان اذا وقفت فى

طريق تقدم الشعوب فالشعوب حيمكن ان تتغلى عن دينها .

المدعى - تتغلى عن دينها ؟

الرئيس - ايه تانى ؟

المتهم - قال ان الاديان اذا وقفت فى طريق تقدم الشعوب

فالشعوب ممكن ان تسير فى طريقها وماتكونش الاديان عائق فى طريقها .

المدعى - قرئتها بنفسك ؟

المتهم - أيوه

الرئيس - طبعاً فهمتها زى الاتفاقية وزى قل هو الله أحد

مش كده والا فهمتها بطريقة ثانية .

المتهم - ...

الرئيس - تعرف ايه عن المؤتمر الاسلامى ؟

تعرف ان فيه حاجة اسمها المؤتمر الاسلامى للشعوب

الاسلامية ؟

المتهم - سمعت ان السيد انور السادات من سكرتير

المؤتمر الاسلامى .

الرئيس - كان

المتهم - وما يزال .

الرئيس - ايه فايدته والا ماقريتش عنه حاجة ؟

المتهم - لا ماقريتش عنه حاجة .

المدعى - بتقول انك كنت بتذاكر فى سرى سران يحل

قتل المسلم ؟



المتهم - لا

المدعى - هه !!

المتهم - لا

المدعى - آمال ليه كنت عاوز تقتل الرئيس جمال عيسد  
الناصر واثانمقام أنور السادات هم دول مش مسلمين ؟  
المتهم - مسلمين ... ولكن فهمونا انهم خارجين عن  
الاسلام ..

الرئيس - مين اللى فهمك ؟

المتهم - - هنداوى دوير -

الرئيس - هنداوى دوير ده كلامه زى القرآن يعنى !! ..  
القرآن اللى حفصهولك مش بيقول ان القتل حرام ؟  
المتهم - أيوه ..

الرئيس - والا يمكن انت مابتفيمش كلام القرآن ؟

المتهم - صحيح أنا أقدمت على العمل ده ... وقبل ما أقدم  
عليه ماكتتش شاعر بأى حاجة كان حاجة طبيعية .. ولكن  
بعد ان أقدمت عليه شعرت بالندم وشعرت بانى خاطيء ..  
الرئيس - خاطيء ليه ؟ !

المتهم - لانه كان خلاف الاسلام ..

الرئيس - خلاف الاسلام فى ايه ؟

المتهم - فى الفهم اللى فهمته علشان قتل المسلم ..  
الرئيس - الادعاء ... فيه أسئلة ثانية ؟

المدعى - لا يافندم .. واحنا مكتفين باقواله ..

الدفاع - لو سمح لى سيادة الرئيس بكلمة ..

الرئيس - أيوه اتفضل ..

الدفاع - خلال هذه المناقشة آمنت باننى الى جوار شخص  
غير عادى ... غير طبعى .... كنت قد فكرت فى هذا قبل  
أن ألقاه .. وبعد أن لقينته مرة ومرة ، وبعد أن سمعته الآن آمنت

بأن هذه المهمة العصية التي أقيمت على كاهلي ، إنما هي مهمة الدفاع عن شخص مجنون .. لأريد أن أفرع عن هذا الجنون وعدم المسؤولية ، ولكنني أستهدف أولاً وقبل كل شيء التدليل على أنه لا يوجد مصري عاقل .. مصري يسير كما يسير الأقوياء . مصري طبيعي . يقوم على الاعتداء على الرئيس جمال عبدالناصر لا أريد أن أعطل الدعوى بل نمضي في سماع الشهود . ولكنني أطلب بعد سماع الشهود اليوم إحالته على الطبيب الشرعي علشان يقعد معاه ساعتين ويدينا تقرير عنه يجينا يوم السبت الصبح .. وده ماأظنش أنه يكون موضوع جدل بيننا وبين الادعاء لانه لاصلة له بتعطيل الدعوى . ونحن هنا قد جئنا لانتحدث في الصغائر وانما لنشترك جميعا محكمة وادعاء ودفاعا في رفع خطر عن بلادنا . ولذلك أرجو أن تقدروا هذا الطلب وتفصلوا فيه .

**وكيل النائب العام -** الادعاء يعترض على هذا الطلب ، وقد تكلم المتهم طويلا في التحقيقات كما تكلم طويلا اليوم امام حضراتكم واعترف تفصيليا بأنه ارتكب الحادث وبيت النية منذ اسبوع كامل على ارتكاب الحادث ، ثم سافر الى الاسكندرية وارتكب الحادث ثابتا جامدا كما هو الان وذكر لحضراتكم الدافع الذي من اجله ارتكب هذا الحادث وذكر لحضراتكم في التحقيقات ايضا اسما من حرضوه ومن سلموه الاسلحة فاذا جاء اليوم لحضراتكم واعتذرعن فعلته ، واراد ان يتظاهر بأن ضميره قد أنبه ، وان ضميره قد استيقظ .. الان اذا فعل هذا فيكون رجلا عاقلا كل العقل وليس مجنونا كما يريد الدفاع ان يدرا عنه المسؤولية . وانما لعل الدفاع يريد من هذا ويستهدف من وراء ذلك أن يطلب استعمال الرأفة مع المتهم .. ولكن ان يقول عنه انه مجنون فلا يقبل عقل سماع هذا اطلاقا .

**الدفاع -** استمبح المدعى في كلمة هادئة .. أريد أن أقول له ان معارضته هذه إنما هي معارضة تقليدية .. معارضة تقليدية

لان من شأن الادعاء أن يعارض الدفاع فنحنا زميلي الكريم هذا النحو ولم يستهدف فيه مصلحة الدعوى ولم يستهدف فيه مصلحة العدالة لان ثبات المتهم وجموده هو عندى آية جنونه .. هذا الجمود حينما يقدم انسان على قتل قاتلين من قادة بلده - هذا الجمود حينما يلزم انسان على هذا النحو لا يدل فحسب على ان جانبه قد خلا من كل قلب بل يدل كذلك على أن جمجمته قد خلت من كل رأس ... ثم ماذا بهم المدعى أخشى ماسيتلو هذه الدعوى ؟ مش حيقال ولا يمكن ان يقال ان الجهاز السرى وقد بلغ عدده مابلغ كله مخبول . وعلى اية حال فانا لا اريد ان اتعرض للدعاوى أخرى اذن فلا مصلحة الدعوى ولا مصلحة العدالة ولا ما يراد لهذا البلد من سمعة كريمة نريد أن تبقى عليها اننا نقول انه أكثر مايكون عقلا .. الى شرع فى قتل انور السادات لانه كتب مقال فى الدين .. واللى شرع فى قتل جمال عبد الناصر غداة اخراج الانجليز بعد جهاد سبعين سنة .. يبقى ده عاقل ؟! .. او ان فى هذا مصلحة للعدالة ؟! .. بالطبع لا ، ولهذا سميت معارضة المدعى بانها معارضة تقليدية لا أكثر ولا اقل .

**المدعى -** دى مش معارضة تقليدية بل دفع تقليدى مداولة قصيرة بين السادة اعضاء المحكمة

**الرئيس -** المحكمة معترضة على احالة المتهم على الطبيب للشرعى ، لان المتهم لما ارتكب هذه الجناية لم يرتكبها بدافع داخلى من نفسه بل من املاء بعض اشخاص كانوا يجتهدون به وبتأثيرات خارجية ، وكان المتهم عاقلا عندما كان يسمع هذه التأثيرات ويتناقش معهم ، وكان عاقلا عندما أقدم وذهب ودبر ولذلك يبقى خط الجنون مش واضح هنا ... كل فرد منا يمكن يكون له نصيب من الجنون ، فهل نحال جميعا على الطبيب الشرعى ؟

**المدعى -** هذه محاولة اشترك فيها أكثر من واحد واكثر من محرض وهم موجودون خارج القاعة ونحن نطلب من المحكمة الان

سماع شهادة الشاهد الاول او المحرض الاول هنداوى دوير .

**الرئيس - اذن يستدعى هنداوى دوير .**

( حضر الشاهد )

وقد اخرج السيد رئيس المحكمة مصحفا صغيرا من جيبه ووضعه على حافة المنصة وطلب سيادته من الشاهد ان يتقدم ثم قال له .

طبعا عارف ده ( مشيرا الى المصحف )

**الشاهد - ابوه . .**

**الرئيس - قل ، والله العظيم اقول الحق ولا شيء غير الحق**  
والله على ما اقول شهيد .

( حلف الشاهد اليمين )

**الرئيس - ايه اللى تعرفه عن موضوع التهمة بتاعة محمود عبد**  
اللطيف في تعديه على الرئيس جمال عبد الناصر ؟

**الشاهد - ابوه يا قندم . .**

**الرئيس - نرجوك ان تكون هادئا واذا كنت عاوز كوباية ميه**  
نجيبلك كوباية مية . .

**الشاهد - تسمح لى اتكلم فى الموضوع على طول**

**الرئيس - اتكلم زى مانت عاوز . . . اتكلم على راحتك . .**

**الشاهد - فى الاشهر الاخيرة . . من خمس شهور او اربع**  
شهور او بعد مارس بالتحديد انقسم اعضاء الهيئة التأسيسية  
للاخوان المسلمين الى ثلاثة اقسام ، احدها وعلى رأسها بعض  
الاخوان زى الاستاذ البهى الخولى يؤيد الثورة ويرى ضرورة ان  
الاخوان يقوموا بتأييد الثورة . . وفريق آخر وقف موقف حياد  
او على الاقل مائع . . ما قدرشى يحدد موقفه بالضبط وما ارادشى  
انه يفضب دول او دول . وكان على رأس هذا الفريق الدكتور  
خميس حميده اللى هو وكيل الاخوان . . والفريق الثالث كان  
يرى ان الثورة ماشية فى طريق يعارض الاتجاه الاسلامى . .  
على اثر هذا الخلاف الشديد الهيئة التأسيسية كأعضاء فقدت

احترامها في نفوس الاخوان ومكتب الارشاد لم يستطع ان يقوم بمهمته في توجيه الاخوان وكذلك فقد احترامه فعلا في نفوس الاخوان حتى أصبحت التعليمات التي تصدر منه لا تلقى تأييدا من الاخوان . وكان لابد من تعديل الحال فرؤى أن هذه الهيئة لا تمثل الاخوان ، فما دامت لها صفة من صفات الإبدية وهى التعيين مدى الحياة فلا بد من تغييرها الى وضع آخر يستقيم مع الامور . . وهم كانوا ينتخبوا اخوان ممن يستطيعون تأييدهم ويتوجهوا بالدعوة الوجهة التي يريدونها باعتبارهم ممثلين للاخوان تمثيلا كاملا فرؤى تعديل القانون ، وفعلا عدل القانون . . في هذه الفترة ازاء هذا الاضطراب الشديد - سيطر على الدعوة بعض افراد غير رسميين يعنى افراد مالهمش الصفة الرسمية زى ابراهيم الطيب . . الاستاذ ابراهيم الطيب المحامى . ووجدنا أن الاجهزة الادارية في الاخوان المسلمين أصبحت كلها معطلة ماعدا الجهاز الخاص الجهاز السرى في الاخوان المسلمين وأنا ارجو بهذه المناسبة أن يكون هذا آخر عهد الاخوان المسلمين بالنظم السرية ، وأن تكون هذه المظلمات الأخيرة آخر ظلمات تسد الى صدر مصرى بهذه الصورة الاسيفة التي اسف عليها أشد الاسف . . كان الجهاز السرى يسيطر على الموقف ويصدر تعليماته الى الاخوان . وعلى اثر هذا بدأت التعليمات تيجى تلقائيا من المسئول ، وكان في هذه الفترة من الاستاذ ابراهيم الطيب المحامى المسئول عن النظام السرى في القاهرة وأنا في امبابه كنت رئيس المنطقة وكنت طول عمرى في المنطقة رئيس النظام السرى . . وفي أثناء المعاهدة أو بعد الاتفاق المبدئى الى وقع بالحروف الاولى ، قامت الخلافات حول ما اذا كانت المعاهدة صالحة أو ضارة وبدأت تشحن نفوس الاخوان بانها ضارة وصدر قرار مكتب الارشاد الى وجه الى السيد الرئيس بخصوص رأى الاخوان في المعاهدة والى قيل فيه أن ده مجرد نصيحة وأنه غير ملزم للحكومة وان من واجبنا أن نوجه أى حاجة للحكومة

باعتبارنا من الشعب وتطورت الامور بعد هذا يا سيدى الى ان بدأت المنشورات تنزل وكانت تيجى للاخوان علشان يقرأوها وعلشان ينزلوها ويوزعوها على الناس .. الاستاذ ابراهيم الطيب كان يقول ان الخطة اللى اتخذها النظام السرى هى تعبئة نفوس الاخوان من الوجهة الشعبية وتعبئة نفوس الناس ضد المعاهدة . وعلى هذا الاساس نزلت جملة منشورات باعتبار ان الاتجاه هو اتجاه تبصير الناس كما يقول الاستاذ ابراهيم الطيب - على اساس ان المعاهدة ضارة . فى الفترة دى ياسيدى شحنت نفوس الاخوان شحنا شديدا ضد المعاهدة وكان على اثر هذا ان الاخوان طبعى كانوا متضايقين من المعاهدة ضيقا شديدا وكانوا يقولون : ما المصير ؟! ايه يعنى ، حنعمل ايه ؟ .. وبعدين بصينا فجأة وجدنا المنشورات انقطعت نهائيا ، فسألت ابراهيم : انتم عيبتونا وفرغتنا ليه ؟ .. فقال ان الاتجاه مش حيسكون اتجاه شعبى بل احنا قررنا ان الاتجاه يكون اتجاها ارهابيا .. فقلت له يا استاذ ابراهيم ان الاتجاه الارهابى ده لن يؤدى الى نتيجة وذكرته بما تحمله الاخوان فى أيام فاروق . وقلت له ان احنا والبلد مش حانجنى من هذا الطريق شىء . فقال لى ان هنالك خطة كاملة واحنا حانقدها .. طيب ياسيدى .. قبل الحادث بحوالى خمستاشر يوم او اكثر قليلا جانى وقال لى ان خططنا هى ان النظام قرر انه هو يعتدى أولا على الرئيس جمال عبد الناصر وبعد كده يتخلص - بتحديد اللفظ - يتخلص من الضباط الاحرار باى صورة سواء بالاعتقال أو بالخطف أو بالقتل . فقلت له يعنى انتم حققتم المسائل دى اسلاميا فقال لى آه .. ولعل حضراتكم تعرفون ان النظم السرية دى المسائل اللى تناقش فيها ماتناقش بشكل اوسع وفعلا قال لى انه انتخب محمود عبد اللطيف ليقوم باطلاق الطلقات الاولى . وهى الاعتداء على الرئيس جمال عبد الناصر ، وجاب لى المسدس الى



شفته في القضية وبعدين انا اديت المسدس على طول لمحمود  
عبد اللطيف . وقلت لابراهيم الطيب ، ايه الخطة يا سيد  
ابراهيم ، فقال لى الخطة ان الرجل الصعيدى - مع الاعتذار  
طبعاً عن هذا التشبيه - ان الرجل الصعيدى يتبع خصمه  
سنة كاملة لغاية ما يتخلص منه . . فالخطة ان محمود يعتمد  
على مجهوده الشخصى في تتبع الرئيس جمال عبد الناصر ،  
ولا سيما أنه بعد المعاهدة نزل الى الميادين والى الشعب ويمكن  
ان محمود ينال منه . **وفعلًا قلت لمحمود هذا وقد سلمته**  
**المسدس وسلمته الطلقات . .** وفي هذه الاثناء - وانا أقولها  
يا سيدى الرئيس لوجه الحق ولوجه الله زارنى الاستاذ محمود  
الحواتكى والاستاذ عبد الفتاح القرشى في البيت يمكن الساعة  
تسعة وقالوا لى ان احنا بلغنا ان النظام - قالوا لى كده ودى  
كلمة تطلق على النظام السرى - **قالوا ليه ان النظام قرر ان يتجه**  
**اتجاهاً ارهابياً وأن الحواتكى علم ان الاستاذ المرشد غير موافق**  
**على هذا الاتجاه وأنه قال لى بالتحديد أننى برىء من دم جمال**  
**عبد الناصر اذا قتل . .** قلت له : مين اللى قال لك هذا الكلام  
فقال لى : قاله شخص لست في حل من ذكر اسمه . وقد  
سبق ان قلت هذا الكلام في التحقيق . . وبعدين سألت نفسى  
احنا رايعين فين . . ثم قابلت محمود بعدها على طول وقلت  
له اوقف كل حاجة وهو موجود امامكم واسأله واعتقد انه  
صادق وحيقوله الحق . . وبعدين جانى زارنى ابراهيم « وهو  
كان يبيزورنى في هذه الفترة كل يوم باعتبار أن دى خطوة اولى،  
وان دى هى اللى حتمشى في هذا الطريق . . جانى ابراهيم تانى  
يوم فقلت له على حكاية الاستاذ الحواتكى والاستاذ القرشى . .  
وبهذه المناسبة ماكنش الاستاذ ابراهيم يعرفنى بمكانه أبداً وانما  
كان بيجى عندى . . جانى الاستاذ ابراهيم فقلت له على حكاية  
الاستاذ الحواتكى . فقال لى ان الكلام ده كلام غلط »

وان الناس دول متصلين بالمفصولين وبلاستاذ البهى .  
وانهم عاوزين يعطلوا شغلنا . فقلت له يعنى الامر صادر من  
الاستاذ المرشد ، فقال لى أيوه . . فقلت لمحمود أمش فى طريقك .  
قبل الحادث بثلاث أو أربع أيام كان الاستاذ ابراهيم بيتفق معى  
فقال لى أنا حاجيب لك عدة حاجات لتكون بمثابة العمل الاول اللى  
تبدأ بعدها الخطوة ، وهى مدفعين على أساس انهم يبقوا كمين  
يوجه ضد ركب جمال عبد الناصر وجاب لى لغم على شكل حزام  
وشرح لى طريقة العمل وقال أن محمود يبقى يتحزم به وجاب لى  
طبنجة ثانية وقال لى أن محمود على نصيرى ياخدها ويقوم بدور  
محمود عبد اللطيف . . اللغم والمسدس جابهم لى يوم الثلاثاء . .  
محمود بعد ما اخذ المسدس نزل وراح مؤتمر الموظفين ولم يعمل  
حاجة . . وفى نفس اليوم الاثنين . . جانى يوم الاثنين بالليل  
الساعة عشرة حذاشر ونص اتناشر وقال لى أنا مسافر اسكندرية  
فقلت له علشان ايه يا محمود فقال لى الرئيس مسافر النهارده  
اسكندرية . . فقلت افرض انه مفيش حاجة هناك فورانى جريدة  
القاهرة وكان منشور فيها ان الرئيس مسافر اسكندرية . . أنا  
طبيعى الآن فى موقف الشاهد ومش عاوز أبرء نفسى باعتبار ان  
مكتب الادعاء انهى هذه القضية وانما أقرر اننى قلت لمحمود بلاش  
هذا المشوار فقال لى لازم اسافر وبهذه المناسبة أقرر - وان كان  
هذا الكلام يغلظ العقاب على محمود - أقرر أن محمود كان  
متحمسا لهذا العمل فعلا . فقلت له طيب ياسيدى سافرو سافر  
فعلا . هو سافر يوم الثلاثاء وكان الكلام ده يوم الاثنين بالليل  
الساعة اتناشر اللى هو بدء يوم الثلاثاء جانى الاستاذ ابراهيم  
الطيب يوم الثلاثاء وجاب لى اللغم والطبنجة وقال لى ابقى اعرض  
احدهما على نصيرى . . محمد على نصيرى رفض انه ياخذ اللغم  
وأنا كنت ابدت اعتراضاتى على اللغم . ولكن ابراهيم قال لى  
العسكريين قالوا انه كويس كده وان احتا مالناش ان نعترض على

الناحية الفنية ... طيب ياسيدى يوم الثلاثاء الساعة اثنين ...  
 أولا انا كنت فى المحكمة فى هذا اليوم لغاية الساعة واحدة ونص  
 وكنت أترافع فى حداشر قضية وهذا ثابت فى محضر الجلسة كما  
 هو ثابت فى التحقيقات التى اجراها رجال الادارة وبعدين روجت  
 البيت الساعة اثنين اتفديت انا واولادى وخلصت غدا .. الساعة  
 اتنين ونص جانى الاستاذ ابراهيم ومعه اللغم والطبنجة . ويظهر  
 ان الاستاذ ابراهيم كان جاى فى السكة ووراه الاخ الاستاذ  
 عبد العزيز كامل لانه جبه بعده على طول فقال لى هات ابراهيم  
 يتفدى عندى ... وبهذه المناسبة اقرر ان الاستاذ ابراهيم الطيب  
 قال لى ماتقولش الحاجات دى للاستاذ عبد العزيز كامل لانه كان  
 معارض فى هذا الاتجاه ويمكن يقتنعك انك تعدل عن تنفيذ الخطة  
 .. وبعدين قعدت انا وابراهيم فى اودة المكتب وجبت له على  
 صنية الشاى طبق خضاروشوية رز وبدا ابراهيم يتفدى وفعلا  
 وجبه وجه الاستاذ عبد العزيز كامل فقال ييجى ابراهيم يتفدى  
 معايا فقال ابراهيم انا جاتفدى هنا فقال عبد العزيز ابعت حد  
 ينزل للحاجة اللى هى الست الوالدة يجيب لنا شوية حاجات  
 ودخلت انا اللغم وكن ملفوف فى ورقة وكذلك المسدس فى أوضة  
 من اوض البيت وقعد ابراهيم وعبد العزيز يتفدوا وفضلوا قاعدين  
 ييجى ساعة . وبعدين الاستاذ عبد العزيز كامل جاله واحد  
 فلسطينى من الاخوان فجت واحدة خدامة تقول له ان فيه واحد  
 عاوزه فنزل الاستاذ عبد العزيز وبقيت انا وابراهيم وقعدنا لغاية  
 الساعة خمسة ونص وكان فيه ميعاد ان نصيرى حيصى فجبه  
 وعرضت عليه اللغم فقال لا ده ماينفعشنى وأخذ المسدس على  
 اساس انه يقوم بنفس المهمة الموكولة لمحمود عبد اللطيف وعلى  
 اثر ذلك انصرفنا .. انصرف ابراهيم وخرجت انا ورجعت لمكتبى  
 وفضلت فيه لغاية الساعة تسعة . وكنت قاعد مع الدكتور  
 موريس اسكندر وهو جارى وصاحب اجزخانة . وبعدين روجت

البيت فعلمت في الطريق - وانا كنت عارف ان محمود في الاسكندرية وما كناش سمعنا الراديو لان الحته الى احنا كنا فيها مفهانش راديو - وانا في السكة عرفت ان محمود عبد اللطيف اعتدى على الرئيس .....  
الشاهد - ( مستمرا ) - ومن حمد الله ان الرئيس مااعتديش

عليه ونجى بحمد الله بعد كده انا قدرت انه سيقبض على فأخذت الست بتاعتي الساعة ٩ر٣٠ ونزلنا بسرعة اخذنا قطر ١٥ر١٠ من الجيزة وروحنا المنيا ودخلنا الساعة ٣٠ر١١ ورجعت صباحا في قطر التاسعة ونزلت الى مركز امبابه وسلمت نفسي الى البوليس وانا جاي في القطر قدرت عدة مسائل منها ان زعماء الاخوان منقسمين على انفسهم وان الدعوة في هذه الفترة يسيطر عليها اناس غير مسئولين وغير معروفين للاخوان وان الاتجاه الارهابي اتجاها صورته الطبيعية الواضحة البسيطة انه غير اسلامي ان القتل على هذه الصورة قتل غير اسلامي قدرت هذا وقدرت انه لو وقعت العمليات التي تحت يدي ففيها ارهاق للاخوان وارهاق للبلاد وعلى الامن واذا كانت دي ما اصابتش يمكن حاجة ثانية تصيب وقررت لذلك ان اسلم نفسي للبوليس واضع نفسي تحت تصرف المسئولين ولذلك قابلت الضابط وقلت له انا عايز اسلم نفسي للبوليس ده الحادث وانا تحت تصرفكم في اى اسئلة .

الرئيس - قول اى حاجة عايز تقولها اذا كان عندك حاجة ثانية عايز تقولها .

الشاهد - ابراهيم قال ان الخطة هي الاعتداء على الرئيس وبعد كده خطف او الاعتداء على الضباط الاحرار فيه اظن حوالى ٥ واحد وكذلك اعضاء مجلس قيادة الثورة .

الرئيس - الضباط الاحرار دول الجهاز السرى بتاع الجيش ؟

**الشاهد -** انا ما اعرفش ان فيه جهاز سرى فى الجيش وهو كلامه فى الحقيقة عن الضباط الاحرار بس وهو الاسم الذى يطلق على الضباط الذين يتعاونون مع رجال الثورة .  
**الرئيس -** يعنى الجهاز السرى بس فى الاخوان !

**الشاهد -** أيوه ... ومن المؤسف ان الاعتبارات دى قدرتها وأنا فى القطر ما قدرتهاش قبل الحادث وهذا محل الاسف .  
والواقع أن الانسان يظل يسير فى الخطأ ولا يعلم أنه خطأ حتى يقع فيه والانسان يظل يدخن وهو يعلم ان التدخين ضار ولا يحس حقيقة بضرره الا اذا أصيب بكحة ... او مرض يبقى يعالجه ... ومحل الاسف اننى لم أفكر فى الحادث قبل وقوعه وانما بعد ذلك وأنا مفروض أنى كمحامى ادافع عن المتهمين لا ان أقف موقفهم .

**الدفاع -** دلوقت كمحامى لسه ... محامى ايه ... يجب ان ادافع عن كرامة مهنتى .

**الرئيس -** الشاهد يقول اللى هو عايزه .. والدفاع لازم يكون باله طويل .

**الشاهد -** انا يا سيدى الرئيس محطم ولا زالت صفتى قائمة واذا كان موقفى هذا الآن مؤسفا فأننى آسف كل الاسف وأنا مطمئن الى أى مصير تقدره المحكمة بالنسبة الى وأتحمله بكل شجاعة وصبر باعتبار ان كل واحد يعمل حاجة يتحمل نتيجة عمله .

**الرئيس -** ماعندكش حاجة ثانية عايز تقولها !

**الشاهد -** لا اذا كان فيه أسئلة أنا مستعد للإجابة .

**الرئيس -** ترفع الجلسة للاستراحة .

( رفعت الجلسة فى الساعة الحادية عشرة والدقيقة الخامسة والعشرين ) .

( أعيدت الجلسة في الساعة الثانية عشرة ظهرا )

**الرئيس** - أعيدت الجلسة - الشاهد فيه عنده حاجة ثانية  
عايز يقولها !

**المدعى** - هو كان خلص كلامه .

**الشاهد** - بخصوص الحادثة نفسها خلاص .

**الرئيس** - فيه حاجة ثانية ؟

**الشاهد** - بخصوص النظام السرى ؟

**الرئيس** - هل لك أقوال ثانية عايز تقولها من غير أسئلة  
ومن غير مانقاشك في الموضوع . . فيه عندك حاجة عايز  
تقولها ؟

**الشاهد** - ايوه يا فندم . . بس انالى شكوى صغيرة بخصوص  
اعتراض الاستاذ حماده الناحل على اتنى محام .

**الرئيس** - انا ردبت عليه .

**الشاهد** - الانسان لا يصح أن يجهز على جريح ولم يكن يليق  
به ان يطعننى وانا في هذا الموقف وبينى وبينه خصومة لانه يحضر  
ضدى في قضايا خاصة .

**الرئيس** - مفيش طعن .

**الشاهد** - ايوه يا فندم . . مسألة النظام السرى في الاخوان  
المسلمين . النظام السرى هذا ترك من ايام البنا الله يرحمه وانشئ  
هذا النظام اصلا لمحاربة الانجليز ولمحاربة الملك السابق وكان على  
رأسه الاستاذ البنا كمشرف مسئول باعتباره المرشد العام وكان  
يرأسه في ذلك الوقت على ماوضح في قضية سيارة الجيب -  
الاستاذ عبد الرحمن السندى وقد اشترك هذا النظام في حرب  
فلسطين والطلائع الاولى في حرب فلسطين كانت من الاخوان -  
ومن النظام الخاص بالذات وكان يختار أفراده من المخلصين  
المؤمنين المضحين بأرواحهم وأموالهم في سبيل الله وذلك لتحرير  
البلاد العربية والاسلامية من الاستعمار الاجنبى . هذه هي فكرة  
النظام الخاص في الاصل واساس هذه الفكرة لاغبار عليه لان المسلم



يجب ان يجهز تجهيزا اسلاميا كاملا فقد قال رسول الله صلى الله عليه وسلم من لم يغز ولم تحدثه نفسه بالغزو مات ميتة جاهلية كما قال أرموا واركبوا ولئن ترموا خير من أن تركبوا . **بقى أن الدولة تحارب التسليح فكان لابد من التخفي** ولقد اشترك هذا النظام في حرب فلسطين وفي معركة القنال وعمر شاهين . والمنيسى وغيرهما من الشهداء كانوا من اعضاء هذا النظام . وبعد ما انتقل البنا الى رحمة الله كان عبد الرحمن السندى يرأس النظام وكان مكونا من عدة جماعات الجماعة مكونة من خمسة اشخاص على رأسهم واحد والشعبة المهمة بها عدة جماعات وكل جماعة يرأسها واحد وتدرج على نظام هرمى يرأسه عبد الرحمن السندى ومعظم هذا النظام في القاهرة وقد توجد مراكز او مناطق ادارية تخلو من هذا النظام مثل اسوان وذلك لانها بعيدة ولا تيسر لها فهم اغراضه الجماعات منتشرة أصلا في القاهرة ويرأسها عبد الرحمن السندى ولما انتقل الأستاذ البنا الى رحمة الله وجه الأستاذ الهضيبي اختيار مرشدا عاما وبهذه المناسبة اقرر كيف اختيار مرشدا عاما . . . الأستاذ البنا ترك ١٠٠ شخص او اكثر كلهم قد بعض ولا يدينون لاحد بالولاء والأستاذ البنا كان غاوى بترينات . .

الرئيس - غاوى ايه ؟

الشاهد - بترينات . . يعنى يبقى الحل مثلا في اظاهر والبترينة في شارع فؤاد ومعنى ذلك انه كان يضم الى الجمعية التأسيسية اناس لا صلة لهم بالاخوان المسلمين فمثلا جبه واحد من النيابة خرج برشوة وبصينا لقيناه عضو في الجمعية التأسيسية . الواقع ان الشيخ حسن البنا كان يضعهم جميعا في الظل لانه رجل عملاق فلما الأستاذ البنا أخذ بهذه الصورة - لم يكن للهيئة التأسيسية قوة ادارية او أى صفة . كانت تجتمع به ليقدر ما يشاء فلما مات برزت واخذت طابع التوجيه وهم لا يلتفون نحو شخص منهم . .

اختلفوا ولم يتفقوا على شخص منهم فرؤى اختيار احد الناس القربين من الاخوان وله اتجاه اسلامى فرشح الهضيبي وانتخب

انتخاباً حراً على مانعهم = وبدأ الصراع بين الهضيبي والسندی لان الهضيبي أول ما جـه أعلن ان هذا الاتجاه خطأ وأعلن ان قتل الخازندار قتل غير إسلامي وأن قاتله يدخل النار ولذلك بدأ الصراع بين الهضيبي والسندی وانتهى هذا الصراع بفصل عبد الرحمن السندی وبعض زملائه من الاخوان المسلمين واستمرت الحال على ما هي عليه وقيل انهم جابوا قيادة أخرى لهذا النظام ودى يفرها بعدين ومشيت الامور الى ما بعد الثورة بنمرة كبيرة الى ان فصل السندی وجاب الهضيبي قيادة جديدة للنظام وبدأت تتصل بالاخوان وبعدين هرب عبد المنعم عبد الرؤوف =

الرئيس - مين ده ؟

الشاهد - ده ضابط في الجيش كان يحاكم وهرب فرأت قيادة النظام السرى انها تستعين بمعلوماته في الناحية العسكرية وأنا شخصياً استصففته يومين ثلاثة جابهولي ابراهيم الطيب وقال لى ده ضيف سرى ما يصحش حد يتصل بيه وفعلا قعد عندى يومين ثلاثة وكان ابراهيم بيحى يقعد معاه فترة طويلة وعلى اثر هذا طرأ تعديل جديد على النظام السرى ونظم الجهاز السرى الى جماعات كل جماعة من سبعة وكل أربع جماعات تكون فصيلة وهذه الفصيلة تسليح بالاسلحة مدافع والقنابل والطبجات ده الترتيب اللى جه في النظام السرى زى ما ادليت بأقوالى الاولى بمجرد تسليمى نفسى للبوليس وافكر دى صورة معقولة للنظام الخاص .. نرجع بقى للخططة العامة في مسألة المعاهدة قيل بعد الاتفاقية ان الثورة تتجه بالبلاد بعيدا عن الاسلام ولا بد اننا نجيب حكومة أخرى تتجه نحو الاسلام ولا يحكم الاخوان لسببين الاول أن بعض الاخوان ما يمثلوش الاسلام وماية دروش يطبقوا الاسلام والسبب الثاني ان البلاد غير مستعدة لتقبل النظم الاسلامية ككل لا يتجزأ ولهذا يحسن ان نسير بالتدرج حتى تستقر صورة واضحة ولذلك

اقول انه لم يكن في ذهن الاخوان أو المسئولين أن يحكموا وعلى هذا الأساس رتبت الخطة على أن يعتدى على الرئيس جمال عبد الناصر وأعضاء مجلس قيادة الثورة والضباط الثانئين يعتقلوا أو يخطفوا أو شيء من هذا القبيل وإبراهيم الطيب قال أن فيه اتصال بالرئيس محمد نجيب والاتفاق على أساس أنه يبقى يهدى البلاد أثناء هذا الاضطراب وأنا سألت إبراهيم قلت له يا أستاذ إبراهيم أنتم عاوزين تستغلوا الرئيس محمد نجيب في فترة الاضطراب ده علشان يهدى الشعور العام والا انتم واثقين ان فيه صلة قال فيه صلة فسألته إيه كنهها فقال ما يصحش اننا نكشف كل أوراقنا - وبهذه المناسبة اذكر انه ليلة ماجه المرشد من سوريا كنا في البيت عنده في الصالون وبعدين الساعة اتناشر ونصف .. واحدة تقريبا ضرب التليفون فواحد من الاخوان لا اذكره الان رد على التليفون ولما سألناه مين قال ده الرئيس نجيب يبسال على المرشد وعازب يكلمه ضرورى وقال لما يقوم من النوم قولوا له ان الرئيس نجيب سأل عليك وأنا أذكر المحادثة على التفصيل كما رواها لنا ذلك الاخ .

- آله .. مين ؟

- أنا الرئيس نجيب .. الأستاذ الهضيبي موجود انا عازب اكلمه .

- ده جه من الساعة ٩ ونام .

.. أنا عاوز اكلمه - أنا سمعت انه جه دلوقت وعازب يكلمه ضرورى .

- لا ده جه من الساعة ٩ وراح المركز والتقى بالاخوان وخطب فيهم وهو دلوقت نائم .

- طيب لما يقوم قولوا له ان الرئيس محمد نجيب سأل عنك ده في ليلة ماجه المرشد من سوريا بالذات فلما يكون ده في ذهني ويقول إبراهيم الطيب ان فيه صلة .. معقول انى اصدق

•• ده من حيث الخطة العامة يافندم •

**الرئيس** - الادعاء عايز يناقشه !

**المدعى** - أيوه ... انت قلت ان الخطة العامة هي قتل الرئيس جمال ثم تهديئة الحالة هل كان مقصود ان تقوم ثورة شعبية او ايه دى عايزين تفسرها ؟

**الشاهد** - أيوه ... تفسيرها ان الاخوان كان مقصود انهم يعملوا ثورة شعبية

**الرئيس** - أيوه •

**الشاهد** - وبعدين فى الايام الاخيرة انتهوا الى انهم يقوموا بعملية ارهابية تنتهى باضطرابات فى البلاد يسيطر عليها الرئيس محمد نجيب وينتهى من اعضاء مجلس قيادة الثورة تكون حكومة تتجه بالبلاد اتجاه اسلامى لعل ده واضح •  
**الرئيس** - ايه الخطة ؟

**الشاهد** - الاعتداء على الرئيس واطعاء القيادة • والضباط الاحرار فيحدث اضطراب يسيطر عليه محمد نجيب •

**الرئيس** - ازاي الخطة بتوضع ومنين بتيجى ومنين بينفدها ؟  
**الشاهد** - الخطة بتوضع فى قيادة النظام السرى اولاولا اعرف منه الا اشخاص معدودين ويطلع عليها المرشد والمفروض ان يصادق عليها وانا اعرف المسئول عن قيادة النظام السرى والمسئول يعرف الى يليه وانا اعرف ابراهيم الطيب ويوسف طلعت فى القسم المدنى واعرف صلاح شادى وانه مسئول عن الضباط فى الجيش والبوليس والخطة بتوضع فى القيادة وتعرض على المرشد ليقرها او لا يقرها فان اقرها تنزل للاخوان لينفذوها •

**المدعى** - مين المهيم على النظام ... مين الرئيس بتاعه ؟

**الشاهد** - مكتب النظام انا اعرف منه ابراهيم الطيب باعتباره رئيس مناطق القاهرة ويوسف طلعت وصلاح شادى فيما اعتقد ودول يقرروا والمفروض انهم يعرضوا الامر على المرشد فيوافق او لا يوافق •

**المدعى - اذن النظام تبع المرشد ؟**

**الشاهد - لازم يتبع المرشد .**

**الرئيس -** فى ايام المرحوم الاستاذ البنا قلت انه كان يراس النظام بنفسه وان كان فيه رئيس آخر هو عبد الرحمن السندى .

**الشاهد -** ايوه كان يتلقى اوامره من البنا مباشرة .

**الرئيس -** يعنى النظام كان يتبع الاستاذ البنا مباشرة ؟

**الشاهد -** ايوه

**الرئيس -** وبعد المرحوم حسن البنا ؟

**الشاهد -** نفس الحال

**الرئيس -** يعنى استبدلت رئاسته برئاسة ؟

**الشاهد -** ايوه

**الرئيس -** وبعد قتل الاستاذ البنا هل تبعية هذا النظام لمكتب

الارشاد او الجمعية التأسيسية او المرشد ؟

**الشاهد -** للمرشد

**الرئيس -** بنفس الطابع القديم ؟

**الشاهد -** ايوه

**الرئيس -** افكر ده اللى المدعى عايز يعرفه ؟ .

**المدعى -** ايوه وعائزين نعرف كمان التسليح .

**الشاهد -** قبل ماييجى عبد المنعم عبد الرؤوف كان النظام

مقسم الى خمسات .

**الرئيس -** نسهل الموضوع شوية .

**الشاهد -** طيب .

**الرئيس -** فيه مرشد .

**الشاهد -** ايوه .

**الرئيس -** يتبعه نظام خاص له رئاسة منها ابراهيم الطيب

ويوسف طلعت وصلاح شادى .

**الشاهد -** صلاح شادى فيما اعتقد ... ولكن دكهم

من علم .

**الرئيس -** ينزل من هذه الرئاسة نظامين مدنى مسئول عنه ابراهيم الطيب ويوسف طلعت وعسكرى خاص بضباط الجيش والبوليس ومسئول عنه صلاح شادى .

**الشاهد -** قسم الضباط لا أعلم عنه شيئاً لانه كان أيام البنا تابع له مباشرة ولكن القسم المدنى مقسم الى فصائل وجماعات والفصيلة مكونة من ٣٠ شخص لها قائد ورديف له وبعدين يفضل ٢٨ ودول يقسموا أنفسهم الى ٤ جماعات كل جماعة منها ٧ أشخاص .

**الرئيس -** ايه اللى تعرفه عن النظام السرى الموجود الان وايه هى مناطقه تقدر تعددها ؟

**الشاهد -** كل منطقة فيها فصيلة أو أكثر حسب قدرتها .

**الرئيس -** القاهرة فيها كام منطقة ؟

**الشاهد -** ٧ مناطق والجيزة ٣ مناطق . منطقة امبابه .

**الرئيس -** ويرأسها ؟

**الشاهد -** أنا ومنطقة بين السرايات ويرأسها على القيوى والجيزة ويرأسها أخ اسمه يوسف مش فاكى بالضبط اسمه يوسف ايه ومنطقة الفسطاط ويرأسها فيما اعتقد الاستاذ عبد العزيز احمد والعباسية ويرأسها أخ اسمه الخضرى ومنطقة شبرا أخ اسمه محمد شديد ومنطقة وسط القاهرة ويرأسها أخ اسمه سيد أبو سالم .

**الرئيس -** مش فاكى المناطق الثانية ؟

**الشاهد -** هم بقو قد ايه ... هم تسع مناطق كل منطقة

بها فصيلة وقد يكون رئيس المنطقة لا يرأس الفصيلة لكبر سنه فيجوز أن يكون واحد تانى هو رئيس الفصيلة والمسئول عنها .

**الرئيس -** تعرف حد ... تقدر تضرب مثل ؟

**الشاهد -** فى منطقة امبابه مثلاً رئيس المنطقة الدكتور حسن ؟

الباشا وده مدرس فى كلية الآداب وكان لا يعلم عن النظام السرى



شيء ؟ وأنا وكيل المنطقة كنت المسئول عنه ورئيسه .  
**رئيس النيابة** - فيه منطقة جنوب القاهرة أو شرق القاهرة ؟  
**الشاهد** - أنا قلت الى جنوب القاهرة وشرق القاهرة الى هي  
العباسية .

**الرئيس** - الجزء الى شرحته خاص بالقاهرة المسئول عنه  
ابراهيم الطيب ؟  
**الشاهد** - ايوه .

**الرئيس** - فيه تنظيم آخر عن المناطق الثانية ؟  
**الشاهد** - جازل لكن ما اعرفوش .  
**الرئيس** - ماهي مسئولية يوسف طلعت ؟  
**الشاهد** - مسئول عن القسم الخاص في غير الضباط و ابراهيم  
الطيب عن القاهرة .

**الرئيس** - يوسف طلعت عن القاهرة وغير القاهرة والا  
ما تعرفش عنه حاجة ؟  
**الشاهد** - ايوه جازل ولكن الحقيقة النظام معظمه في  
القاهرة ؟

**الرئيس** - طيب المكتب بتاع رئاسة النظام لما يعمل خطة  
واذت أحد الاعضاء ورئيس منطقة ورئيس فصيلة ما تعرفش . .  
**الشاهد** - ما كنش في أمباه فصيلة حتى الآن ماكانش فيه  
غير انا ومحمود عبد اللطيف في الجهاز السرى .  
**الرئيس** - كنت ترأس الجهاز أو النظام الموجود ؟  
**الشاهد** - ايوه .

**الرئيس** - وانت كنت رئيس أحد الاجهزة السرية ؟  
**الشاهد** - ايوه في أمباه ومكنش في أمباهه ■ انا ومحمود  
عبد اللطيف في الجهاز السرى أما بقية الاخوان فكنا لسه رايعين  
نعمل منهم جهاز ■ اتسا ما كناش عاملين والاخوان الى كانوا  
موجودين كنا حنختارهم ■

**الرئيس -** مين اللي كان بيختارهم في امبابه ؟

**الشاهد -** أنا باعتباري رئيس منطقة .

**الرئيس -** على أساس ايه ؟

**الشاهد -** فهم الدعوة والتضحية من أجل مبادئها ونضع العضو فترة تحت الاختيار ونديله دراسات اسلامية كحفظ القرآن والاحاديث النبوية الشريفة الى أن يمر ستة شهور فاذا أثبت بعد ذلك انه قادر والشخص عنده استعداد نديله تدريبات عسكرية وبعد هذا كله اذا ثبت صلاحيته نفهمه أنه في النظام وبعدين ندرجه تدريبات عملية .

وهذه المراحل كلها لم تطبق في امبابه ، وكل ما طبق فيها أننا شكلناها .

**الرئيس -** باعتبارك شخص ذو نفوذ ومسئول في هذا النظام لابد ان تعرف قوانين هذا النظام او الطرق المتبعة . فمثلا اذا الرياسة اقترحت وضع خطة تعرضها على مين ؟

**الشاهد -** المكتب يتفق على خطة ثم يعرضها على المرشد ثم تنزل من ابراهيم الطيب الى لانفذها .

**الرئيس -** واذا لم يوافق المرشد ؟

**الشاهد -** امتنع

**الرئيس -** هل يبلغ لك القرار في هذه الحالة ؟

**الشاهد -** لايقول لي احنا نجعمل كذا ولايقول المرشد موافق او غير موافق وفي حادثة محمود عبد اللطيف لما الحواتكى قال لي هذا الكلام اضطررت ان أستفسر من ابراهيم الطيب .

**الرئيس -** عندك اعتقاد ؟

**الشاهد -** في كل حاجة لازم تيجي من المرشد العام .

**الرئيس -** ده النظام الموجود ؟

**الشاهد -** ابراهيم الطيب هو صلتى بهذا النظام .

**المدعى -** تعرف على نويتو وما وظيفته ؟

**الشاهد -** ايوه وعلى نويتو امين صندوق المنطقة .

المدعى - مش فى النظام ؟

الشاهد - لا

المدعى - مش رديف لك ؟

الشاهد - مفيش واحد فى النظام الا انا ومحمود عبد اللطيف ودليلى على هذا اننا لما جينا نخطر واحد تانى عشان يقوم بنفس عمل محمود عبد اللطيف جابوا لنا واحد من بره وهو محمد على نصيرى . وهذا دليل على انه ليس عندى احد غير عبد اللطيف وجايز يكون عندى اخوان كويسين انما لاعطى هذه التعليمات الا لشخص من الجهاز حتى يكون موافق على كل عمل اصدره اليه . ولم يكن فيه احد فى النظام الا انا ومحمود عبد اللطيف والاخوان فى امبابة احنا شكلناهم وعملناهم جماعات وفات عليها ٢٠ يوم لا تزيد او شهر ولسه لا اخذوا التدريبات ولا اخذوا اى شىء ولسه مجرد تشكيل اى نعلمهم كالاسرة .

الرئيس - فيه سلاح فى امبابة ؟

الشاهد - ايوه وانا سلمته للحكومة وكان بخصوص العمليات التى قلتها فى التحقيق .

المدعى - من فىن - وايه عدد السلاح ده ؟

الشاهد - الاستاذ ابراهيم لما وضعت الخطة للاعتداء على الرئيس جمال عبد الناصر جاب لى اربع عمليات عملية محمود عبد اللطيف بالطبنجة وعملية محمد على نصيرى بالطبنجة وجاب لى حزام فيه لغم وهذا الحزام يلبسه الشخص الذى يروح للعملية والمفروض انه يروح يتابط الرئيس ويوصل توصيلة معينة عشان يموتوا هم الاثنين وابراهيم الطيب جاب مدفعين كما قلت فى التحقيق ودول معدين على اساس ان ابراهيم يختار الناس اعمل كمين فى طريق الرئيس جمال عبد الناصر انما لم يكن عندنا اسلحة للفصيلة لانه لم يكن عندنا فصيلة .

الرئيس - فى اقوالك قلت ان النظام السرى كان له هدف

مخصوص ايام المرحوم حسن البنا ايه الهدف ده ؟  
**الشاهد -** كما قلت في اول الادلاء باقوالى ان هذا النظام اصلا  
وضع لمحاربة الانجليز وللجهاد في سبيل الله ولمحاربة الملك السابق  
فاروق لانه كان مقدر طفيلانه في البلد .

**الرئيس -** وماهو الهدف الذى تبلور اليه هذا النظام الخاص  
بعد الثورة ؟

**الشاهد -** والله ياسيدى قبل الثورة وقع النظام في اخطاء  
يعنى حصلت منه عدة اغتيالات مثل اغتيال المرحوم الخازندار  
وكان هذا ايام المرحوم حسن البنا ففهم ان هذا من تقاليد النظام  
اى لمحاربة اى شخص يعتدى على الدعوة فالنظام يحارب هذا  
الانجاء .

**الرئيس -** الغرض من هذا النظام كان عشان محاربة الانجليز  
والملك الفاسد ومحاربة او تعضيد وجهة نظر الدعوة لكن بعد  
اثورة كان بيحارب ايه ؟

**الشاهد -** الى ما قبل المعاهدة كان الانجليز لسه موجودين .

**الرئيس -** ده واحد من الاهداف ... وبعدين ؟  
**الشاهد -** الملك السابق فاروق مشى وفضل حماية الدعوة  
اى المحافظة عليها من اى شخص يعتدى عليها باعتبار انه موجود  
تحت تصرف الدعوة .

**الرئيس -** باعتبارك الشخصى هلا فكرت ان الثورة قامت  
وفتحت معسكرات للتجنيد العام واعادت تنظيم القوات المسلحة  
مافكرتش ان هذه المعسكرات كالحرس الوطنى ومعسكرات  
الشباب غرضها ايه ؟

**الشاهد -** غرضها تجنيد كل شخص له رغبة في خدمة البلاد  
لمحاربة الانجليز طبعا .

**الرئيس -** هل اعتقدت في داخلية نفسك ان الاخوان يقتدروا  
يعملوا تنظيم اقوى من هذه التنظيمات .

**الشاهد -** ■ ييجى وجه مقارنة وأنا لم يأت في ذهنى مقارنات

**الرئيس -** الهدف واحد ؟

**الشاهد -** مجاش في ذهنى وجه المقارنة ، وكان الاخوان يثيروا مسألة لازمة ها : النظام الخاص خاصة وانه كان يحارب من عدة جهات من الاسوان .

**الرئيس -** ليه ؟

**الشاهد -** كئن يحارب من مكتب الارشاد لانه كان يعتقد انه فيه افتيات على سلطته وكان يحارب من ناس في الاخوان وجدوا أن النظام انحرف عن أسسه من أيام حسن البنا واتجه الى اغتيالات معينة فكان يحارب لانهم يعتقدوا أن هذا وضع غير اسلامى .

**الرئيس -** ذكرت في أقوالك أن الاخوان ابتدأوا يشحنوا نفوس الاخوان ضد الاتفاقية .

**الشاهد -** أيوه .

**الرئيس -** ازاي شحنتوهم ؟

**الشاهد -** ينزل لهم بيان من مكتب الارشاد وبيان المرشد الى عمله في سوريا والبيان الاول عدت فيه أخطاء المعاهدة على أساس أن هذه المعاهدة ضارة بالبلد وكان هذا مقدمة لاقامة حكومة جديدة .

**الرئيس -** مين المسئول عن المنشورات ؟

**الشاهد -** كانت المنشورات تجينا من ابراهيم الطيب والنظام

**الرئيس -** مين المسئول عن المنشورات ؟

**الرئيس -** كانت تجيلك باعتبارك أحد أفراد النظام الخاص .

**الشاهد -** كانت تجينا من ابراهيم الطيب يعنى من قيادة النظام مباشرة .

**الرئيس -** الاوامر التى تصدر من النظام الخاص تناقش او لاتناقش

**الشاهد -** أقول يافندم . أيام الاستاذ حسن البنا كانت ثقة الاخوان فيه من الوجهة العلمية والتربوية ثقة لاحد لها ، فكانت

الأوامر لاتناقش على الإطلاق فلما وقعت الأخطاء في أيام الاستاذ حسن البنا من النظام السرى أصبحت الأمور لما تيجى تناقش وهذه حقيقة أقررها ، ولذلك أنا شخصيا قلت لمحمود أنت حائن تدب لعمل يمكن تتهم فيه أنك خائن وفكر في هذا أدامك ثلاثة أيام واسأله وأنه سيجيب على هذا .

انما الأصل ان هذه الأوامر لاتناقش ولكن أنا شخصيا كنت أناقشها .

الرئيس — وليه ماناقشتش ابراهيم الطيب لما سمعت من الحواتكى ؟

الشاهد — ناقشت وأكد لى أن هذا صادر من المرشد ، وما دام أكد لى ...

الرئيس — أكد لك كلاما يعنى قال لك بكلامه لا بيان .

الشاهد — أيره بكلامه شخصيا .

الرئيس — يعنى دكتاتورية ؟

الشاهد — طبعا .

الرئيس — نظام دكتاتورى .

الشاهد — فيه معنى من معانى الدكتاتورية .

الرئيس — وهل هذا يمشى مع الدعوة الإسلامية ؟

الشاهد — لا

المدعى — فيه نقطة الاسلحة : انت قلت ان قبل الحادث جاءت لكم اسلحة في امبابة فاين وضعت هذه الاسلحة .

الشاهد — الاسلحة التى سلمتها للحكومة هى التى جاءت والاخ عبد الحميد البنا هو من الاخوان ساكن في بلدة وراف العرب فجيت وقلت له اجر شقه لانه كان ساكن في أودة واحنا ناخذ أوده مالكن دعوة بيها وفعلنا أجرنا شقة اودتين واحنا أخذنا أوضه حطينا فيها الحاجة دى وعبد الحميد البنا لايعرف من أمرها شيئا وحقيقة أن ركن العلم مش متوفر عنده لانه لايعلم حقيقة هذه الحار وكنا ناخذ منها .



**المدعى -** يعنى عبد الحميد البنا ماكانش فى النظام .  
**الشاهد -** أناقلت لما جينا نكون الفصيلة وضعته فيها باعتبارها  
الاساس فى النظام لكن لم تتكون الفصيلة بعد . والفصيلة كانت  
فى البداية منى ومن محمود عبد اللطيف وعلى نويتو  
**المدعى -** قلت ان مكتب الهيئة التأسيسية كان فيه ثلاث  
شيع - فرقة برياسة بهى الخولى وفرقة اخرى برياسة الدكتور  
خميس وفرقة ثالثة فما هى هذه الفرقة الثالثة ومن رئيسها وما  
هى ميولها ؟

**الشاهد -** الفريق الثالث كان يرى ان الثورة تتجه اتجاها غير  
اسلامى وان هذا الوضع ضار بالدعوة الاسلامية ويمكن يكون  
رئيسه الاستاذ المرشد ولكنى لا أعرف احدا من افراد هذا  
الفريق أو رئيسه أو المسئول عنه وأنا لا يمكننى أن احدد شخصا  
بالذات لانى لست عضوا فى الهيئة التأسيسية .

**المدعى -** ما معنى عبارة « المسائل تحقق اسلاميا » ؟  
**الشاهد -** المقصود هو هل هذه الاعمال أو عملا بالذات  
جائز أو غير جائز من وجهة الشرع .

**المدعى -** يعنى قسم للافتاء وما طريقته او كيف تحقق  
التصرفات من الوجهة الاسلامية فى النظام ؟

**الشاهد -** مكتب النظام الى هم المسئولين عن قيادة النظام  
لما يقترح امرا يعرضه على الاستاذ المرشد والمفروض ان هذه  
القيادة لما تقترح شيئا يكون متفق مع الاسلام وهم فيما بينهم  
يحققون هذا الاسلام أى هل تجوز أو لا تجوز شرعا ثم يعرض  
المكتب بعد التحقق هذه الاقتراحات على الاستاذ المرشد .

**المدعى -** عاوزه توضيح .  
**الشاهد -** يرجعوا الامر الى الاصل العام فى الاسلام .  
**المدعى -** هل فيه قتل اسلامى وقتل غير اسلامى ؟  
**الشاهد -** الاسلام حدد خمس حالات على سبيل الحصر  
للقتل ولا يجوز قتل المسلم الا فى حدودها . وليس منها طبعا

فكرة الاغتيال السياسى باعتبار ان القتل السياسى قتل عمد  
وقاعله يدخل النار ومع هذا أصبح القتل من تقاليد النظام  
السرى من أيام الاستاذ حسن البنا فقتل النقراشى والغازندار  
أى أنها أصبحت مسألة مفترضة .

**الرئيس -** يفهم من كلامك ان الفرق الثلاث التى انقسمت  
اليها الاخوان هى الفريق الاول برياسة بهى الخولى والثانى برياسة  
الدكتور خميس والفريق الثالث برياسة المرشد ، والفريق الاول  
مع الثورة والفريق الثانى موقفه مائع والفريق الثالث كان ضد  
الثورة لانه معتقد ان الثورة متجهة اتجاها ضد الاسلام ومن  
سياق الحوادث فهم أنك كنت تتلقى الاوامر يعنى كنت عضوا فى  
النظام الخاص أى أنك تبقى من الفريق الثالث .  
**الشاهد -** هذا منطقى .

**الرئيس -** هل كنت فى الفريق الثالث ؟  
**الشاهد -** انا كان لى وضعين رئيس منطقة تابع لمكتب  
الارشاد وكأحد افراد النظام السرى اتبع النظام السرى .  
**الرئيس -** لكن فيه واحده تجيب الاخرى بمعنى أنى لما  
أضرب واحد واقتله فالقتل يجيب الضرب واحاكم لانى قتلته  
وانت قلت ان المرشد كان رئيس الجهاز السرى وهو مسئول عنه .  
**الشاهد -** لما يجينى أمر من النظام السرى أنفذه لكن هل  
هذا النظام السرى تابع لبهى الخولى أو تابع للدكتور خميس أو  
تابع للمرشد فهذا مالا أعرفه .

**الرئيس -** لكن انت قلت ان النظام السرى تابع للمرشد  
وانت تعلم أن المرشد كان متريس هذا الفريق لانه يعتقد أن  
الثورة متجهة بالبلد ضد الاسلام . والفروض أن المرشد هو  
الرئيس فى هذا الجهاز فى خصوص الهيئة وفى الوقت نفسه المرشد  
مسئول عن الجهاز وعن النظام السرى وانت أحد أفراد هذا  
النظام السرى واذا لم تكن متفقا معه فى الفكرة العامة كنت تسبب  
الجهاز السرى ولا تنتسب اليه .

**الشاهد -** الواقع أننا كنا بنتردد على هذه الأجهزة الثلاث .  
**الرئيس -** لكن أنت نفذت قرارات خاصة بالجهاز السرى .  
**الشاهد -** أيوه .  
**الرئيس -** أرجوك تمشى معايا ببساطة .  
**الشاهد -** حاضر .

**الرئيس -** انت كنت أحد أعضاء الجهاز السرى وهو يتبع المرشد باعترافك واقرارك كويس المرشد كان منتحى رأى وله هذا رأى وهو أن الثورة متجهة ضد الاسلام فهل انت متفق معه على هذا ؟

**الشاهد -** أقول لحضرتك بمنتهى الصراحة أنا كنت ماشى فيه كعضو فى النظام .

**الرئيس -** بدون تفكير .

**الشاهد -** الحته دى لم تتوضح وهى أنى ضد الثورة .

**الرئيس -** أنا لم أسالك هل انت ضد الثورة أو معاها ، انما انت كنت على الاقل فى داخلية نفسك من غير ما تبلورها تعتقد أن الثورة ماشية ضد النظام .

**الشاهد -** أيوه مادمت كنت عضو فى هذا النظام ابقى كده .

**الرئيس -** باعتبارك محامى ومتعلم وحاصل على أكبر درجة تعليم فى بلادنا بل فى العالم اجمع تقدر تفسر لى ازاى الثورة متجهة بالبلاد ضد الاسلام ؟

**الشاهد -** الثورة حققت أعمالا كثيرة وحققت أعمالا طيبة .

**الرئيس -** مليش دعوة بالأعمال ، نحن نتكلم عن النقاط التى أثارت فى نفسك فكرة أن الثورة متجهة ضد الاسلام .

**الشاهد -** دلوقتى مفيش .

**الرئيس -** وقبل الآن ؟

**الشاهد -** الاخوان كانوا يشحنوا بمنشورات أن الثورة على اتصال بالانجليز وهذه المعانى كانت مسيطرة على ذهن الاخوان لدرجة أنهم لا يفكرون فيها .

**الرئيس -** يعنى النقطة التى كانوا يشحنوا فيها أذهان الاخوان  
من أيام الاتفاقية .

**الشاهد -** أبوه .

**الرئيس -** وما هو الموقف قبل الاتفاقية ؟

**الشاهد -** كان الاخوان عامة زى ما تعرفوا مؤيدين الثورة أى  
مشوا فى طريق الثورة الى أن جاءت حوادث مارس فاختلف  
الاخوان مع الثورة على هذه المعانى وقبل مارس كان الاخوان  
مع الثورة (( صافى يالبن )) و ٢٤ قيراط انما بعد مارس بدأت  
هذه الخلافات تشور وكان يقال لنا دائما ان الثورة بتجيب  
ناس من الاخوان وتديلهم مناصب معينة وهؤلاء لا يصح أن  
يصرفونا عن أنه عمل خطير ضد الدعوة بقصد فركشة الاخوان .

**الرئيس -** لكن قبل مارس كان مامعنى قيام الجهاز السرى ؟  
**الشاهد -** الاخوان كانوا قبل مارس قلبا وقالباً مع الثورة  
أما استمرار بقاء الجهاز السرى فهذه مسألة استقرت مع  
الاخوان منذ أيام الاستاذ حسن البنا ومشيت كما هى .

**الرئيس -** هل الاسلام يرتضى وجود قوتين فى البلد ؟  
**الشاهد -** الاسلام يأمرنا بالسير وراء الحاكم فى أى اتجاه  
كما يأمرنا بأن نصلى وراء الامام حتى ولو علمنا أنه فاجر .

**الرئيس -** أى أنك ارتضيت قبل مارس أن تكون فى الجهاز  
السرى فهل يسمح الاسلام بوجود قوة عامة مكونة من افراد  
هذا الشعب وقوة مختفية كهذه وهل عللت حكم الاسلام فى  
داخلية نفسك حتى أنك قبلت هذا الوضع أن الاسلام لايجب  
هذا ، والا فأية دعوة هذه وأية رسل دعوة هؤلاء أرجوك أن  
تظهرها لى ؟

**الشاهد -** المسألة بقيت منذ الاستاذ حسن البنا واستمرت  
بعد ذلك كما سبق أن قلت ثم حصل الخلاف فيها بين الاخوان  
وبدعوا يفكرون فيما اذا كان هذا النظام يتفق مع الاسلام أو لايتفق  
ولو أن المسألة سارت بعد ما مات الاستاذ البنا وظل النظام كما

هو أما أنها قوة غير قوة الحكومة فهذا شيء آخر وإنما الذي حصل أن الامر استقر دون تفكير كمسألة تقليدية للاخوان .

**الرئيس -** مش تقليدية ؛ لأنها لو كانت تقليدية لبقيت حاجة مستمرة وإنما هناك نقط خاصة ثارت وتثور في أذهان الناس وهم أنهم يفكرون في هذا النظام السرى ولما فكر الاستاذ المرشد الهضيبي فكر في تغيير رئاسة هذا الجهاز وقال تصريحاً كبيراً أيامها تذكره أولاً ؟

**الشاهد -** لا اذكره . قال ايه ؟

**الرئيس -** قال ان الدعوة مافيهاش سرية .

**الشاهد -** ايوه قال هذا والمفروض ان الاستاذ المرشد لما يقول هذا لا يصح ان يقول ان هناك اشياء سرية لان هذا يكون اعترافاً بوضع غير مشروع في البلد .

**الرئيس -** يعنى كان نفاق وهل الاسلام وافق على نفاقه ؟

**الشاهد -** هذه مسائل يسأل فيها هو وإنما أنا اذكر ان هذه المسألة استقرت من ايام الاستاذ حسن البنا وظلت قائمة الى ما قبل المعاهدة وكان فيه سبب مشروع لقيامها وهو ان الانجليز كانوا موجودين في البلد اما بعد المعاهدة وهذه ايام قليلة فانا لا اجد مبرراً لبقاء الجهاز السرى .

**الرئيس -** الادعاء يحب يسأل الشاهد .

**المدعى -** الشاهد ما عندوش معلومات أن الحكومة طلبت حل هذا النظام قبل ٢٥ مارس ما عندكش فكرة .

**الشاهد -** لا

**الرئيس -** انت بتقول ان النظام السرى بعد الثورة كان من أهدافه ان يحارب الانجليز وبعدين جه الاستاذ المرشد الهضيبي ايام لما حصل فيه كلام عشان محاربة الانجليز في القتال بعد الثورة وقال انه مدخر قوة الاخوان ليحارب بها كيفما يشاء ان شاء الله في الجزائر اذا رأى الاسلام هذا ولم يقبل ان يصرح بأنه

سيحارب الانجليز مما يفهم من التصريح انه مش عاوز يشترك في حرب الانجليز في القنال فهل هذا لم يوجد في نفسك شك لتبين حقيقة الاتجاه الذي يستعمل من أجله هذا الجهاز ؟  
**الشاهد -** قطعاً مسألته متناقضة .

**الرئيس -** الحكومة الموجودة تقول انى أجهز لمحاربة الانجليز وتعلن هذا فما الذى يجعل المرشد يحجم عن التصريح بهذا ؟  
**الشاهد -** كان الاخوان يقولون فيما بينهم لازم نروح نجاهد في القنال اتما المسألة ان الاستاذ المرشد وهو الشخص المسئول قد يصرح بتصريحات لا يقصد من ورائها نفس التصريحات كما قال انه ليس لديه نظام سرى .

**الرئيس -** انت تعرضت في كلامك الى أن الجهاز السرى ذهب وحارب في فلسطين وفي القنال وكان من بينهم بعض الشهداء وهذا سبب من الاسباب الى جعلك تعتز أو يعتر الاسلام ببعض الناس انهم يدافعون عن دعوتهم والجهتين التى اشتركتهم فيها فلسطين والقنال والدولة فى واحد منهما اشتركت رسمياً وهى حرب فلسطين فهل قارنتم شهداءكم بشهداء الدولة ؟  
**الشاهد -** لا ، لم نقارن كان عندنا شهداء وكان الجيش فيه شهداء كثير .

**الرئيس -** الجيش والمتطوعين .  
**الشاهد -** كانت كتيبة الجامعة العربية معظمها من الاخوان يا سيدى الرئيس .

**الرئيس -** وده ماخلشك ليه تخش فى نظام الدولة بدل من ان تكون نظاما داخل نظام الدولة .

**الشاهد -** أيوه - كان الاستاذ حسن الهضيبى متصرف فى الشئون كلها وكنا نسمع ونطيع

**الرئيس -** كيف تسمح لنفسك وانت رجل متعلم أن تسير وراء شخص ومفروض أن تعرف أن فيه مشتركين فى هذا الجهاز أقل منك علما مثل محمود عبد اللطيف ازاى ترتضى لنفسك هذا

**الوضع وتفضلوا ماشيين وراء حاجة مغمضين باسم الدين كيف ترتضيه لنفسك كمتعلم ؟**

**الشاهد -** لو بقيت الحال خمسة أو ستة شهور لحل هذا النظام بطبيعته لسببين السبب الاول ان الاخوان بدأوا يناقشوا هذه المسائل والسبب الثانى هو ان بعد محنة ١٩٤٨ بعض الاخوان من النظام خرج .

**الرئيس -** زى مين ؟

**الشاهد -** فيه عدد من الاخوان خرج ، فيه ناس خرجوا فعلا وقالوا أن هذا اتجاه غير اسلامى وأنا من ضمن هذا الفريق وكنت أرى ان الأساس الفكرى للنظام من حيث محاربة الانجليز ومحاربة الملك السابق كما سبق ان قلت لحضراتكم بصرف النظر عن قيام الثورة أساس فكرى صحيح . **وانما الاخطاء التى وقع فيها النظام ما يصحش أن يبقى هذا النظام بعد ذلك** ولما قامت الثورة استمر هذا النظام باعتبار أنه تراث من أيام الاستاذ حسن البنا ، وائى واحد من الاخوان كان يريد أن يمس هذا النظام كانوا يصرخوا فى وجهه على أساس أن الاستاذ حسن البنا هو الذى عملته ولا يجوز مناقشته هذا هو الأساس الذى استمرت عليه الفكرة وكنا نحاول اصلاح الاخطاء التى وقع فيها النظام . ومفيش شك أن بقاء مثل هذا الحال خطأ وأنا سلمت به ولذلك قررت ان اضع كل مالى من بيانات تحت تصرف الحكومة .

**الرئيس -** عندما صدر أمر حل الاخوان فى يناير سنة ١٩٥٤

أصدرت الحكومة بيانا بحل الاخوان ، فايه اللى فهموه لكم ؟

**الشاهد -** قرانا هذا البيان وعرفنا أن من ضمن الاسباب التى من أجلها حلت الاخوان حاجة اسمها النظام السرى ، وهذا كان واضحا فى البيان والاخوان فى هذه الفترة كان شعورهم انهم معتدى عليهم لانهم لم يعملوا شيئا وعلى هذا الأساس قامت فى اذهانهم أن الثورة مش عاوزه بعد أن حلت الاحزاب حاجة من بقايا العهد الماضى يكون موجود هذا هو الذى استقر فى اذهانهم ولما الثورة افرجت عن الاخوان مشيت الامور كما كانت .



**الرئيس -** انت قلت في الاول كان فيه نظام سرى وهذا النظام كان قائما وقلت ان هذا النظام السرى من اسمه « السرى » انه غير شرعى .

**الشاهد -** هذا من وجهة نظر الدولة طبعاً .

**الرئيس -** هل تريد كمواطن ان تعيش في دولة لاتحترم فيها قوانينها ؟

**الشاهد -** قطعاً لا - وانا ابديت اسفى في اول اقوالى لهذا السبب وعشان كده سلمت نفسى لادلى بكل ما لدى من معلومات .

**الرئيس -** انا اتكلم الان عن يناير . فهل الدولة المحترمة تكون كذلك اذا لم تكون قوانينها محترمة وان تعين المواطنين ليعيشوا في كنفها ؟

**الشاهد -** انا لا ارضى هذا طبعاً .

**الرئيس -** وهل لما يكون مثل هذا النظام سبباً في حل الاخوان فهل لا يكون سبباً كافياً ؟

**الشاهد -** اعتقد هذا وانه سبب كاف .

**الرئيس -** ألم تفكر في هذا ؟

**الشاهد -** ولكن حل الاخوان لايحل النظام السرى لسبب واحد وهو انهم يتحولون جميعاً الى نظام سرى ولذلك فان اجراء حل الاخوان كفكرة لايحل النظام السرى . وعلى هذا الاساس يحل النظام السرى وانما لا يجوز حل الاخوان نفسها على اعتبار انها اعمال غير اسلامية لايجوز ان ياتيها مسلم .

**الرئيس -** مفيش مسلمين غير الاخوان المسلمين ومحدث يدخل الجنة غير الاخوان ؟

**الشاهد -** لا - فيه ناس اكرم من الخارج .

**الرئيس -** وهل يحل الاخوان تحل الدعوة الاسلامية ؟

**الشاهد -** أبداً .

**الرئيس -** اשמعنى قصرتم على انفسكم هذه الدعوة الا يوجد مسلمون في مشارق الارض ومغاربها ؟

**الشاهد** - فيه طبعاً فهناك جماعة شباب محمد وغيرها .  
**الرئيس** - كل مسلم يدعو ويطبق الاسلام في داخلية نفسه  
وفي عائلته دون أن يعمل نظاماً سرياً .

**الشاهد** - حل الاخوان كفكرة ومصادرة أملاكهم بطبيعة الامر  
ينتهي بأن الاخوان يظلوا على ترتيباتهم وهو النظام السرى .

**الرئيس** - معنى هذا أن فكرة الاسلام خرجت من جماعة  
تدعو الى الاسلام الى فكرة جماعة صاحبة نظام خاص يكون في  
العلانية تحت دعوة الاسلام واذا حلت ينزل تحت الارض ويستغل  
من تحت الارض .

**الشاهد** - أيوه

**الرئيس** - أظن الفكرة بعيدة عن دعوة الاسلام .

**الشاهد** - الفكرة أصبحت جماعة معينة .

**الرئيس** - الاسم للاسلام وحقيقتها لا يعلمها الا الله

**الشاهد** - نعم يعلمها الله .

**الرئيس** - في كلامك قلت ان الاخوان لا يفكرون في أنهم يقيموا  
حكومة .

**الشاهد** - الان على الاقل .

**الرئيس** وقلت في كلامك ان فيه ناس من الموجودين في رئاسة  
الاخوان لا يفهمون الاسلام ولا يعرفون كيف يطبق الاسلام فكيف  
ترضى أن تكون في جماعة تدعو للاسلام والرئاسة فيها لا تفهم  
الاسلام ولا تطبق الاسلام ومن هم هؤلاء ؟

**الشاهد** - الكلام من ناحية الهيئة التأسيسية فهذه الهيئة  
كانت معينة من أيام الاستاذ حسن البنا .

**الرئيس** - كانت عبارة عن « وش البترينة »

**الشاهد** - كيف أرتضى لنفسى هذا ؟ أنا كنت أعتبر هذا خطأ  
وكنا نحاول اصلاحها لان الهيئة التأسيسية في يدها التشريع  
والتنفيذ ولها القيادة وكان لها صفة الابدية والاخوان تحت كانوا  
« يرفسوا » ويتخانقوا ولكن مش قادرين يعملوا حاجة لانهم باقين

من تراث الاستاذ حسن البنا - كل هذا وقع - والاخوان كشعب قاموا بمجهود ضخم الى ان اقتنعت الهيئة بحل نفسها وفعلا في الاجتماعات الاخيرة عدل القانون على اساس اختيار أعضاء الهيئة التأسيسية بالانتخاب وهذا ولاشك اصلاح وضسع معين وهو البقاء في الهيئة التأسيسية باعتبار انها هيئة تدعو للاسلام . اما ان أشخاص الهيئة التأسيسية لم يكونوا من الاخوان ولا دراية لهم بالاسلام فقد ادى ذلك الى عدم احترام هذه الهيئة . وكما قلت ان الهيئة التأسيسية اخذت شيئا من القداسة والاخوان اعدوا يحطموا في انفسهم لدرجة انها فقدت سيطرتها وثقتها في نفوس الاخوان الى ان اضطرت الى حل نفسها بعد ان وجدت نفسها في عزلة عن الاخوان فعدل القانون . وهذا لا ينفي ان فيها اشخاصا مسلمين من طراز المسلمين . مع وجود الاشخاص الذين لا صلة لهم أصلا بالاخوان .

#### **الرئيس - احنا ما قلناش الكل - احنا قلنا البعض .**

**الشاهد -** مثلا فيه واحد اسمه الاستاذ أحمد مطر وهو مفتش في وزارة المعارف ولا صلة له بالاخوان وانما هو رجل مسلم والاستاذ عبد الحكيم عابدين وهو شخص تركه من ايام الاستاذ حسن البنا وهذه التركة عليها ديون ونحن كشعب شلناها . وكان لا يرضى عنه الاخوان لاسباب كثيرة انما كنا نعمل ايه . الهيئة التأسيسية تنتخب مكتب الارشاد وقد وضعوا عددا كبيرا من الناس في الهيئة التأسيسية فكل ما ييجي انتخاب ينتخبوه ويأخذ أغلبية ويبقى سكرتير عام رغم انف الاخوان ونحن كنا « نرفس » ولو امتد الاجل بالجماعة الى ان تجتمع الهيئة التأسيسية لكان حصل الكثير لكن هذه ارادة الله وأنا بقيت بعقيدة هي امكان اصلاح الاخوان لاننا كنا في جماعة من مبادئها اصلاح فممكن اني اصلح هذه الهيئة لالفرار منها وانا شخصيا اعتكفت سنة ولا ادخل فيها المركز العام للاخوان المسلمين كما اني احب الافراد الذين لم يحضروا درس الثلاثاء من ايام الاستاذ البنا .

**الرئيس** - في أقوالك قلت ان الشيخ حسن البنا سبب لكم تركة مثقلة في جماعة الاخوان وانكم استحملتوها الى ان تصلحوها معتمدين على الوقت فهل التركة الموجودة في الاخوان أثقل أو التركة الموجودة في البلد أثقل . كمواطن رأيك ايه ؟

**الشاهد** - التركة الموجودة في البلد أثقل بكثير جدا لان الاخوان جزء من قبلد

**الرئيس** - هل ممكن ان الاخوان يحاربوا الجمعية التأسيسية القديمة وفي الوقت نفسه يتفرغوا للدعوة ؟

**الشاهد** - لاشك ان الخلافات القديمة استنفذت جزء ضخمة من مجهودهم الى ان انتهينا الى هيئة ارتضت ان تحل نفسها .

**الرئيس** - هل نسيتم موقف البلد المثقلة بالديون ؟

**الشاهد** - انا كمواطن أترك هذا للحكومة .

**الرئيس** - وهل انت تركت لها فرصة ، ده انت اشتغلت في الجهاز السرى وعامل رئيس ويتضرب .

**الشاهد** - انا أعترف انى أخطأت .

**المدعى** - انت قلت ان فيه ناس لا يصلحون للحكم مثل عبد

الحكيم عابدين فايه الاسباب ؟

**الشاهد** - فيه أخطاء شخصية وخلقية وانا اعفى نفسى من ذكرها .

**الرئيس** - لاداع للتعرض للأشخاص بسبب أشياء شخصية .

**المدعى** - وايه وكيل النيابة اللى طلع بتهمة رشوة ؟

**الشاهد** - هذا مساس بشخص معين ، وماقدرش اقول اسمه خاصة اذا كانت النيابة قد حفظت القضية .

**المدعى** - قلت ان ابراهيم الطيب كان بيدليك منشورات فما نوعها ؟

**الشاهد** - بيان الاستاذ المرشد في سوريا .

**المدعى** - هل هذا البيان كان بموافقة مكتب الارشاد أو بدون موافقته ؟

الشاهد - بدون موافقته طبعاً .  
المدعى - اعمال خطيرة كهذه فهل يوافق عليها مكتب  
الارشاد ؟

الشاهد - لا أعلم  
الرئيس - هوه قال لك ان الامور ماشية دكتاتورى  
المدعى - كمل لنا مسألة المنشورات .  
الشاهد - جاء لنا خطاب الى الرئيس موجه من الاستاذ  
المرشد .

المدعى - بس  
الشاهد - كانت بتيجي لنا مجلة « اسمها الاخوان في  
المعركة » .

المدعى - كانت بتطبع في الجهاز السرى .  
الشاهد - نعم وهذه المجلة التي عنوانها الاخوان في المعركة  
عبارة عن نشرة دورية فيها تفسيرات للقرآن وأحاديث وتفسير  
للموقف السياسى من وجهة نظر الاخوان المسلمين .  
الرئيس - ليه ما رحتش انت تقتل الرئيس جمال عبد  
الناصر وانت راجل بتجند الناس وقرأت الاتفاقية على الاقل  
احسن من محمود عبد اللطيف خصوصاً وانك بتنفذ الاوامر  
في الجهاز السرى . ليه ما رحتش تنفذ ؟

الشاهد - انا غير مدرب تدريب كافى .  
الرئيس - ومحمود عبد اللطيف مدرب لانه كان في فلسطين  
والقنال ؟

الشاهد - المفروض ان كل واحد يسافر يكون مدرب ■  
الرئيس - هل تعلم انه كان مدرب على المسدس ؟

الشاهد - لا مش مدرب .

الرئيس - انتم تبقوا متساوين في التدريب ■

الشاهد - انا لم أطلق في حياتى اكثر من خمس رصاصات

في الحرس الوطني لانى أعدت خمس ايام فقط ولم يمكنى ان اوفق بين عملى فى المكتب وبين التدريب فى الحرس الوطنى اذ تراكت المذكرات على .

الرئيس - انما قدرت توفق بين فكرة التدريب فى الحرس الوطنى والتدريب لحاجة خاصة .

الشاهد - لو سألتنى عن عقيدتى فأنا كنت باتدرب للحرس الوطنى للفكرة الوطنية .

الرئيس - والنظام السرى ؟

الشاهد - مسألة تقليدية .

الرئيس - هل لدى المدعى اسئلة يريد توجيهها للشاهد .

المدعى - يقولوا ان البلد غير مستعدة لمحاربة الانجليز .

فليه ما استتوش لما تؤهلوا الراى العام . فليه عاوز تعمل حركة بدون تأهيل .

الشاهد - يسأل المسئولون .

المدعى - من يتولى الحكم من الناس دول ؟

الشاهد - المفروض انهم يكونوا ناس يتجهوا بالبلاد نحو

الاسلام ، وانا معنديش معلومات وانما كان بيدور فى اذهان

الناس بعض اسماء معينة مثل الاستاذ محمد العشماوى وافكرمش

بالتاكيد عبد الرحمن عزام اللى كان امين عام الجامعة العربية .

ومعلوماتى عن هذا الوضع انها اسماء تردددا لما ليه ما ستتناش

فلا اسأل لانى لا اعرف هذا ؟

المدعى - ألم تناقش فيه ؟

الشاهد - لا

المدعى - الحزام اللى جابه لكم الضباط - مين هؤلاء

الضباط ؟

الشاهد - لم يقل لى اسماء الضباط ، انما انا قلت ان هذا

الحزام غير عملى انما ابراهيم الطيب قال لى لا تتكلم لان اخواننا

العسكريين قالوا لى انه سلاح كويس فضلا عن انى مش من  
حقى أن أسأل لانى لو سألت عنهم تبقى الحكاية مكشوفة .

**المدعى -** مين صاحب الاقتراح بتاع الحزام ؟

**الشاهد -** ابراهيم الطيب على اساس انه اقتراح الجماعة  
العسكريين .

**المدعى -** ألا تعرف سبب اختفاء المرشد والرياسة بتاع  
الجهاز السرى ؟

**الشاهد -** ايوه اقول لحضراتكم ، لما اختفى المرشد انا  
سألت ابراهيم الطيب ليه اختفى المرشد فقال لى ان الاستاذ  
المرشد اعتقلوه المرة الماضية وفيه فكرة الآن لاغتياله فاخفى  
**واحنا محافظة عليه خليفاه يختفى** ، فانا قلت له هل معنى  
هذا انه راح يفلت مفيش طريقة الا اذا طلع بره البلد خالص ،  
وقلت له هذا كلام غير منطقى كما انى غير مقتنع وانا عاوز  
تحقيق وأطلب تحقيق لانه وضع غير طبيعى ومش كل ساعة  
يعتقل الاخوان ويحصل دربكة فيها . وبعد هذا اجتمعت  
بالاستاذ يوسف طلعت على اساس انه يحقق معى فى هذه  
المسألة وفى هذه الفترة قلت لابراهيم الطيب لا تنزل امبابه بعد  
هذا لانك تتصرف تصرفات هوجاء ، فجاء لى يوسف طلعت  
فسألته فقال لى ان الذى حصل ان المرشد بات بره فجاء  
البوليس وفتش منزله فى الليلة دى فرؤى انه لا يعود الى بيته  
فقلت له الا تعلم ان هذا الاختفاء يشير فزعا فى نفوس الاخوان  
**فقال دى غلظة وخلص ولا يصح أن تحدث** فقلت له لازم يظهر  
فقال لى مش دى الوقتى .

**المدعى -** المرشد اختفى انما ليه اختفى اعضاء الجهاز  
السرى ؟

**الشاهد -** اختفى اعضاء الجهاز السرى لانهم معروفون  
للبوليس



**الدعي** - ولكن هؤلاء الاعضاء كانوا معروفين للبوليس واذا  
ظهروا فان البوليس سيقبض عليهم وبهذا يتعطل الجهاز  
باعتبار انه تعطيل لقادته .

**الرئيس** - ما الدافع ان الحكومة تعتقل اعضاء الجهاز  
السرى ؟

**الشاهد** - لان الحكومة ميصحش ترتضى ان يكون في البلد  
مثل هذا الجهاز

**الرئيس** - لكن ليه ما اعتقلتهمش من زمان ، والا هم في  
داخلية نفوسهم كانوا عارفين انهم قادمين على الخطة دي  
سلفا فاستخبوا .

**الشاهد** - يصح يكون هذا في ذهنهم ومن الجائز الا يكون  
هذا قائم في ذهنهم

**الرئيس** - انت تعرضت في كلامك الى مسألة رئيس  
الجمهورية وقلت ان ابراهيم الطيب قال لك ان فيه اتصال  
بين محمد نجيب والاخوان ، عاوز هذه النقطة التي قالها لك  
ابراهيم الطيب انك تعيد الحادثة كما حصلت فسرهما ؟

**الشاهد** - ابراهيم الطيب لما جاني وقال لي خطة الاعتداء  
على الرئيس جمال عبد الناصر وبعدين قتل القادة والضباط  
الاحرار في هذه الفترة رايح الرئيس محمد نجيب يلقي بيان  
في الراديو يهدى فيه الخواطر وتشكل حكومة غير الحكومة  
القائمة ، فانا سألته هل معنى هذا ان فيه اتصال بينه او اتفاق  
على هذا المعنى والا حتبثقوا تستغلوه - وهذا نفس الكلام فقال  
لي فيه اتصال بالرئيس محمد نجيب . فانا سألته والاتصال  
ده كنهه ايه فقال لي الواحد ما يصحش يسأل واحنا لا تكشف  
اوراقنا . وانا لم اعتقد ان في هذا الكلام كذب لانه كان في ذهني  
مسألة اتصال محمد نجيب بالاستاذ المرشد ليلة ما حضر من  
سوريا فاعتقدت ان فيه اتصال واما وسيلة هذا الاتصال فلا  
أعرفها والا لقلتها بصراحة للمحكمة .

الرئيس - ما هي واقعة اتصال اللواء محمد نجيب بالاستاذ المرشد اذكرها لنا ثانية ؟

الشاهد - وصل الاستاذ المرشد الساعة ٩ أو ١٠ مساء وأعد مع الاخوان في المركز العام الى الساعة ١١ وبعدين راح البيت وراح معه عدد من الاخوان واعدنا في أودة الصالون .

الرئيس - كان مين موجود

الشاهد - عدد كبير

الرئيس - الا تذكر منهم أحدا

الشاهد - هم كانوا خمسين واحد ، والواقع ان الحادثة نفسها متعلقة بواقعة معينة وليست بأشخاص وانا لا اذكر اشخاص واما اذكر الواقعة .

الرئيس - اذكر الواقعة

الشاهد - بعض الاخوان انصرفوا ولكن بقي عدد كبير ، وبينما نحن اقعدين ضرب جرس التليفون حوالى الساعة ١٢٥٥ أو واحدة صباحا فقام واحد من الاخوان - والله لا اذكره - وتكلم في التليفون وكنا نسمعه يرد فيقول « لا يا افندم » - « جه من الساعة ٩ » - « نام ومانقدرش نقومه » وبعدين قلنا له مين ده فقال : الرئيس محمد ، فقلنا له اش عرفك فقال واحد بيقول انا محمد نجيب وطبعا تفاصيل المكالة حبيينا نعرفها لان لما الرئيس محمد نجيب يتصل بالاستاذ المرشد يثور في نفوسنا معرفة تفاصيل الحادثة فقال ان محمد نجيب قال هوه الاستاذ المرشد موجود فقلت له ابوه يا افندم فقال انه عرف انه وصل الساعة ١٢ فقلت له لا ده وصل الساعة ٩ وراح المركز العام واتصل ببعض الاخوان وجه المنزل نام . فقال له انا بلغنى انه جه البيت على طول فقلت له لا ده راح المركز العام اولاً . وقال لنا انه الرئيس نجيب لان صوته فيه لكنة معينة وظاهرة في الكلام ومفיש واحد ينتحل شخصية الرئيس محمد نجيب .

الرئيس - ألا تذكر واحدا ممن كانوا معك في هذه الليلة .  
الشاهد - بشرفي لا أذكر - والواقعة هذه تذكرتها اليوم ولو  
تذكرت أحدا لقلت .

الرئيس - واية التعليق اللى دار بين الاخوان الموجودين في  
الصالون ؟

الشاهد - هو لما قال قول له ان الرئيس محمد نجيب سأل  
عليك لم يخطر في ذهننا معنى غير أنه وصل من السفر فيسأل  
عليه وبعد ان ربطت بين الحكاية دي وبين كلام ابراهيم الطيب  
وان فيه اتصال بالرئيس محمد نجيب واعتقدت ان هذا معقول،  
وان فيه صلة منطقية ان واحد بيتجى من السفر الرئيس  
نجيب يتصل بيه .

الرئيس - جه في أقوالك في التحقيق . .  
الشاهد - أيوه يا فندم

الرئيس - ان المفهوم في شعب الاخوان ان هناك اتصالا بالرئيس  
محمد نجيب . .

الشاهد - أيوه يافندم .

الرئيس - انت لم تذكر هذا الكلام المحدد في أقوالك بتاعة  
حادثة التليفون . .

الشاهد - أيوه يافندم .

الرئيس - كان مفهوم في شعب الاخوان ان هناك اتصال  
برئيس الجمهورية

الشاهد - أيوه . . ولذلك لما سألت ابراهيم قال لى هذا  
الكلام . .

الرئيس - طيب ايه اللى خلى هذا الكلام يدور في صفوف  
الاخوان ايه هي الدوافع يعنى ؟

الشاهد - كان المفروض أواصل الخطة وان المفروض ان  
يعتدى على الرئيس وعلى أعضاء مجلس قيادة الثورة . وأن  
الرئيس محمد نجيب يبقى له (( رول )) معين . .

**الرئيس -** ايه الصورة اللى كنت تنتظرها ؟  
**الشاهد -** كنت منتظر أن الرئيس محمد نجيب يتكلم في  
 الراديو ويهدى الخواطر .. ده اللى كنت متصوره في نفسى .  
**الرئيس -** بفرض أن عملية اغتيال الرئيس جمال عبد الناصر  
 نجحت ، كان حيتبعها ايه .. ايه الصورة اللى في دماغك ؟  
**الشاهد -** كان حيتبعها محاولة الاعتداء على أعضاء مجلس  
 قيادة الثورة والضباط الاحرار يخطفوا أو يعتقلوا ، وعلى هذا  
 الاساس تبقى فيه دوشة في البلد والرئيس محمد نجيب ييجي  
 يهديها أو يخلصها وتتكون حكومة جديدة والكلام ده برضه أنا  
 قلته في التحقيق ..

**المدعى -** تعرف صلاح شادى ؟  
**الشاهد -** أيوه يافندم اعرفه ..  
**المدعى -** ايه صلتك به ؟  
**الشاهد -** أنا صلتى به .. كل صلتى به مرتبطة بانى أنا من  
 الاخوان وهو من الاخوان .  
**المدعى -** ما اشتغلتش معاه في حاجة ؟  
**الشاهد -** اطلاقا ..  
**المدعى -** هل كان له علم بهذه الخطة ؟  
**الشاهد -** هو المسئول عن الضباط فطبعاً لازم يكون عنده  
 علم ..

**المدعى -** ايه رأيك في الاتفاقية ؟  
**الشاهد -** رأيى أنا شخصياً  
**المدعى -** أيوه .. وانت رجل محامى ..  
**الشاهد -** أنا قلت في التحقيق أن الاتفاقية لما وقعت  
 بالحروف الاولى ..

**الرئيس -** مفيش داعى للتعرض لمسائل الدولة ..  
**المدعى -** أصل هو له رأى تانى قاله في التحقيق وهو أنه كان  
 فاهم الاتفاقية فهم غلط ..

**الشاهد -** موجهها كلامه لسيادة الرئيس - اذا ما كنتش سيادتك عاوزنى أتكلم فى الموضوع ده بلاش .

**الرئيس -** البلد مش مسئولة انها تفهم شخص فاهم غلط .. ومفيش داعى لمعرفة رأيه فى الاتفاقية ..

**المدعى -** ايه هو الحكم فى الاسلام .. كيف يكون الحكم بالاسلام فى تطبيق مبادئ الشريعة الاسلامية كما ورد فى القرآن الكريم .. الجماعة من أهدافها الحكم بالاسلام .

**الشاهد -** هدفها الوحيد الحكم بالاسلام .  
**المدعى -** وألم تضعوا أبحاثا عن كيفية الحكم بالاسلام زى الدستور والقانون الخ ؟

**الشاهد -** أيام الاستاذ البنا طلبت منه أن يكتب فى هذا فقال لى .. أذكر بالضبط أنه قال لى أن احنا شبعنا كتب وكتابات .. وأن المكتبة الاسلامية مليانة ، وأن مهمتنا مش اننا نعمل كتب ، بل مهمتنا اننا نعمل رجالة ، ومعنى هذا أن هو مهمته أن يربى الأمة تربية اسلامية تنتهى بأن نطبق ما هو موجود فى المكتبة الاسلامية .

**الرئيس -** ما هى التربية الاسلامية ؟

**الشاهد -** اعداد الفرد المسلم من حيث تطبيق الواجب اللى عليه نحو الله

**الرئيس -** ازاي ؟

**الشاهد -** الصلاة والصوم .. يعنى اعداد الناس وتفهمهم أن الاسلام دين صالح فى كل مكان وزمان ، وتكوين الجماعة التى تقوم على هذه المعانى .. ولما تتكون غالبية الشعب على هذا النحو ونيجي نطبق القرآن كما كان فى أيام الرسول صلى الله عليه وسلم يبقى معقول ومقبول .

**المدعى -** الحكم ازاي يكون يعنى ؟

**الشاهد -** يعنى شكل الدولة ؟

**المدعى** - شكل الدولة وقوانينها .. هذه المسائل الم يعمل لها أبحاث

**الشاهد** - انعمل لها أبحاث ، ولكن في شكل فردى .. أما شكل الدولة وكونه يبقى جمهورى ... ملكى ... حكم على أى صورة من الصور المعروفة لأ .. ما انعملش شيء في هذا الصدد ، وأما الشكل كان يتحدد في صورة اسلامية تختلف عن الديمقراطية وعن الدكتاتورية وعن الشيوعية ..

**المدعى** - يعنى مفيش تحديد ولا نص مضبوط ؟

**الشاهد** - الواقع ان الاخوان لم يعدوا هذا الدستور .. وأنا قلت لحضراتكم اننى قلت للاستاذ البنا احنا عاوزينك تفضى شوية على أساس أنك تكتب لنا ايه الى يطبقه الاخوان ، واذكر انه قال في مناسبة ما أن الناس يجتمعون على مبادئ لا على تفاصيل لاننا اذا دخلنا في التفاصيل فسنختلف ونفرع ولا ننتهى الى خير كثير ، وان احنا ماشيين على مبادئ اسلامية ، ولو تعرضنا للتفاصيل فيمكن ييجى فقيه ويختلف معنا ، وجايز نستهلك في مسائل فرعية ..

**الرئيس** - تستهلك لما تيجوا في الحكم .. مش كده ؟ طيب ايه شكل الحكومة الى هى الحكومة الانتقالية الى حتفرض حكم الاسلام وتنتظر منها ايه ؟ .. افرض انه حيحصل اغتيال فرد أو خمسين أو مائة وحيحصل هياج شعبي وبعدين ييجى محمد نجيب يهدى الخواطر ويكلف ناس علشان يحكموا .. والحكومة دى حتكون تحت وصاية الاخوان طبعاً ؟

**الشاهد** - ايوه المفروض هذا ..

**الرئيس** - يعنى زى ما الاخوان يقولوا لها تعمل وتؤهل الشعب والبلد علشان حكم اسلامى لان المرشد قال ان البلد غير مستعدة للحكم الاسلامى ورياسة الاخوان مفيهاش ناس أو ان أغلبيتهم لا يمثلوا الاسلام ولا يعرفوش يطبقوا الاسلام .. طيب افرض ان الجهاز نجح في تنفيذ الخطة .. طيبى هو

يرمى للوصول الى مأرب وهدف .. فايه الى كنت تنتظره من هذه الحكومة ... كانت حتعمل ايه ؟

**الشاهد** - آه .. الى كنت أنا أنتظره أو يعنى زى ما كان ثابت فى ذهننا أن يعلن الدستور الى يوضع وان تستقى مبادئه من المبادئ الاسلامية على أساس أنها مبادئ يعنى صالحة لحكم البلد ، وده يعنى الأساس ..

**الرئيس** - دستور تستقى مبادئه من المبادئ الاسلامية على أنها صالحة لحكم البلد ؟

**الشاهد** - ايوه يافندم ..

**الرئيس** - زى ايه كده ... قل لنا .. اضرب لنا مثل ..

**الشاهد** - الواقع ان دى كلها مبادئ ..

**الرئيس** - اذا كنت فاكرنى باتجنى عليك .. فمفيش مانع اذا كنت عاوز وتحب أن اى واحد من الى قاعدين يجاوبك ..

**الشاهد** - لا يافندم .. أستغفر الله أنا ماقلتش كده ..

**الرئيس** - أنت قلت ان ده مش متمشى مع الاسلام .. طيب يحصل ايه لما الوضع يتغير ، وتتغير الحكومة بحكومة ثاية ؟

**الشاهد** - من حيث ايه ؟

**الرئيس** - ايه النقاط المحددة .. هل أوافق مع الحكومة أو

اختلف مع الحكومة .. يعنى ايه النقاط المحددة الى تيجي الحكومة على أساسها .. مش لازم يكون فيه خط مرسوم لحكم

البلاد علوزين نعرف ■ هو هذا الخط ؟

**الشاهد** - مثلا التشريع الجنائى والتشريع المدنى .. التشريع المدنى يستقى كل مبادئه من التشريعات الفرنسية . وكان القانون القديم .. أقصد ان المفروض والظن ..

**الرئيس** - أنا بأسأل عن الجماعة مش عن ظنك انت .. يجوز انت تختلف مع الجماعة فيما تأتى به هذه الحكومة .. وكان موقفك موقف المعارض للاخوان المسلمين وتروح عامل

جهاز سرى ، ويبقى فيه كمان جهاز للطيب وآخر لمحمود  
وهكذا .. فإيه رأى الجماعة فى الموضوع ده ؟

**الشاهد -** الرأى مثلا بدل ماتستقى مبادئ التشريع المدنى  
من المبادئ الفرنسية تبقى تستقى من مبادئ ( أبو حنيفة ) ..  
**الرئيس -** هل هناك مبادئ وخطط ونقط موضوعة علشان  
الحكومة تيجى تشتغل على أساسها ؟

**الشاهد -** فى الجماعة لا ... مفيش وانما فى المكتبة  
الاسلامية مخلفات الائمة الاربعة وهى فيها ما يفى بهذا الغرض  
من الناحية الدينية .

**الرئيس -** يعنى الجماعة ما كتش عندها خطة مرسومة .  
**الشاهد -** لا ما كتش عندها .. وعلشان كده هم كانوا  
بيؤخروا انفسهم ؟

**الرئيس -** كيف كانوا بيؤخروا انفسهم وكيف بدءوا بالعملية ؟  
**الشاهد -** هم ما كانوا عاوزين ينفذوا الخطة فورا لانهم  
كانوا خافين لينكشفوا ..

**الرئيس -** طيب ما هو الغرض اللى تار فى نفسك .. يعنى ما  
هو الفرق بين الحكومة اللى حاجبوها والحكومة الموجودة ؟  
ما هما الاثنين فى « الهوا سوا » ..

**الشاهد -** الاخوان كانوا بيتهموا بانهم عاوزين يصلوا للحكم ،  
فيجوزهم عاوزين يداروا عن انفسهم هذه التهمة .

**الرئيس -** يعنى هم كانوا عاوزين يجيبوا حكومة صورية  
تكون زى ( الاراجوز ) وزى المثل اللى ضرب فى جماعة الاخوان  
اللى هو « وش الباترينة » بتاع الجمعية التأسيسية ..

**الشاهد -** يجوز ده اثر فى نفس الاخوان وترك طابع عميق  
فى نفوسهم ..

**المدعى -** ايه رأيك فى الاسلوب الذى اتبع فى القتل .. وهل  
هو يتفق مع أسس وأحكام الاسلام ؟؟



**الشاهد -** هذا الأسلوب من حيث شرعية العمل في الإسلام محرم ، ومحرم على الإطلاق ، وانما كيف وافقت عليه ؟ زى ما قلت لحضراتكم أنه كان من تقاليد الجماعة في أيام الاستاذ البنا القيام بمثل هذا العمل ، وعلى هذا الأساس أصبحت هذه التقاليد مستقرة .. وانما من الناحية الإسلامية لا يجوز القتل بهذه الصورة وده الى خلانى اهتزيت وده خلانى سلمت للحكومة بكل الحاجات اللى عندى علشان أوقف التيار الجارف من الارهاب ..

**الرئيس -** تقدر تقول لنا ايه القانون اللى يحكم الاخوان المسلمين ..

**الشاهد -** اللى يحكم جماعة الاخوان لائحة داخلية تشكل الاخوان الى مرشد عام ، وهيئة تأسيسية ، ومكتب ارشاد ، ومناطق ، ورؤساء مناطق ، .. يعنى تشكيل ادارى ... ده تشكيل العمل في الاخوان ، وبعد كده يستقوا المبادئ من القرآن نفسه ..

**الرئيس -** دلوقتى كل اللى فهمناه من الاسئلة والاجوبة عليها اننا وجدنا أن الحكم في الاخوان يرجع الى المرشد ، وهناك جمعية تأسيسية صورية ، وجهاز سرى للضغط عليها ، وهذا الجهاز السرى الحكم فيه دكتاتورى ، والحكم الدكتاتورى مستقى من المرشد ، اذ ان نظام الجماعة كله دكتاتورى . فلنفرض - وانت شخص متعلم في هذا النظام - لنفرض انك لاتوافق الحكومة اللى جايوها لاعداد البلاد نحو الاسلام واختلفت الجماعة ... فايه اللى يحددك من أن تنفصل أو أن تذهب اى مذهب من المذاهب أو أن تعمل عملا ايجابيا .. ايه اللى يحددك ؟

**الشاهد -** في حالة الاختلاف سواء مع الجماعة أو مع الحكومة ، المفروض لما الانسان يختلف يبقى لا يتبين وجه الحق . فالمفروض عليه اسلاميا انه يقعد في بيته ولا يأتى عملا معيناً

لما تبقى فيه فتنة - من حيث وجهة النظر - المفروض ان الانسان يقعد في بيته ..

**الرئيس -** انتم اصلا بتعتبروا الحكومة الموجودة في الحكم مش مسلمة ؟

**الشاهد -** ايه يا فندم ..

**الرئيس -** انت .... انت مش نفذت أوامر الجهاز السرى

**الشاهد -** أيوه ..

**الرئيس -** يعنى انت اعتبرت ان الحكومة الحاضرة والناس بتوع القيادة مش مسلمين .. بدليل انك لما اختلفت معهم ما قعدتش في بيتك ..

**الشاهد -** انا اعترفت ان ده كان خطأ ..

**الرئيس -** انت من يوم مسلمت نفسك كنت قاعد ولكن ..

**الشاهد -** ده كان رأى قيادة الاخوان ، وانما يجوز رأى

لا يختلف عن هذا ..

**الرئيس -** واذا واحد تانى اختلف رايه عن رايك ||

**الشاهد -** يقعد في بيته ..

**الرئيس -** واذا واحد تانى ما قعدتش في بيته ؟

**الشاهد -** يمشى تبع قيادة الاخوان ..

**الرئيس -** افرض انه مش موافق ..

**الشاهد -** ما دام مش موافق لازم يقعد في بيته ..

**الرئيس -** هل ده حكم الشورى بتاع الاسلام ؟

**الشاهد -** قطعاً دى حالة طبيعية من غير شك ..

**الرئيس -** الادعاء يحب يسأل حاجة .

**المدعى -** لا خلاص ..

**الرئيس -** طيب ترفع الجلسة لمدة ربع ساعة للاستراحة .

( رفعت الجلسة في الساعة الواحدة والدقيقة الاربعين

بعد الظهر ) .

( أعيدت الجلسة في الساعة الثانية والدقيقة )

( الخامسة والعشرين بعد انظر )

الرئيس - الادعاء عنده أسئلة ؟

المدعى - لا ...

الرئيس - الدفاع يجب يوجه للشاهد أسئلة |

الدفاع - لى سؤالان فقط ..

الرئيس - اتفضل ..

الدفاع - ما الذى يعرفه حضرة الشاهد عن أخلاق محمود

عبد اللطيف من حيث سرعة استجابته للتأثير عليه من عدمه |

الشاهد - ....

الرئيس - والله لو يتكرم السيد المحامى باعادة السؤال تانى ،

لانى أنا نفسى مش فاهمه ..

الدفاع - ما الذى يعرفه حضرة الشاهد - بحكم الصلة بينه

وبين المتهم - ما الذى يعرفه حضرة الشاهد عن طباع المتهم

محمود عبد اللطيف من حيث سرعة استجابته للتأثير من عدمه

.. هل هو الشخص الذى له قيادة خاصة أو شخص هوأى

يسهل التأثير عليه ؟ .. ارجو أن أكون واضحا ..

الرئيس - موجها كلامه للشاهد - فاهم السؤال ؟

الشاهد - ايوه أنا فهمت السؤال ..

الرئيس - طيب جابوب عليه ..

الشاهد - أنا سبق انى قلت أن محمود عبد اللطيف بالذات

كان متحمسا لهذا العمل « وسبق أن قررت في التحقيقات أن

محمود عبد اللطيف هو الذى اقترح أن يسافر الى الاسكندرية

لهذا العمل وان الاصل ان محمود عبد اللطيف كان سيركب

الحادث في القاهرة وهو الذى اقترح ان يسافر الى الاسكندرية

... ومعنى هذا أنه صاحب تفكير مستقل استقلالا كاملا

لا سيما وأنا أعلم أنه صاحب شخصية ولا يتأثر بسرعة وأنا بهذا لا أريد اتهامه وإنما هذه هي الحقيقة فهو شخص صاحب تفكير مستقل ويحفظ جزءا كبيرا جدا من القرآن وكان متحمسا بالذات لهذا العمل ■ وأدل شيء على هذا أنه هو الذي اقترح على السفر إلى الاسكندرية ■ ولما قلت له بلاش مشوار اسكندرية ده يا محمود قال لي لا ■ أنا عاوز أسافر اسكندرية ■ واعتقد أنه صاحب تفكير مستقل وأنه لا يتأثر بسرعة ..

( هنا أوما المتهم برأسه ومال تجاه الاستاذ حمادة الناحل المحامي يسر في أذنه بوضع كلمات )  
الرئيس — موجهها كلامه للمتهم — اتكلم اذا كنت عاوز تقول حاجة ..

المتهم — حضرته يقول اني كنت متحمس وأنا الذي اقترحت عليه السفر إلى الاسكندرية ..  
الرئيس — زعق شوية يا محمود ..

المتهم — حاضر .. أنا عاوز أقول أنه بصفته الرئيس بتاعى لو عاوزنى ما أروحش اسكندرية ، مش حاقدر أعصى له الأمر علشان هو رئيسى .. ولكن الحكاية مش حكاية تحمس — لو كان كده ...

الرئيس — المفهوم من كلام الشاهد أنك أنت طبيعتك لك شخصية وأنت متحمس فما بالك اذا كان هناك أمر بهذا .. تبقى متحمس لهذا الأمر ..

الشاهد — ورد على هذا أنه صاحب تفكير مستقل وأنه هو الذي اقترح السفر إلى الاسكندرية ..

الرئيس — يعنى هو كان متحمس للفكرة ؟  
الشاهد — أيوه .

الرئيس — موجهها كلامه للمتهم — يعنى المفهوم أن الأمر صدر لك وأنت تنفذ الأمر ده ... الدفاع ...  
الدفاع — أفندم ...

**الرئيس -** فيه نقطة أخرى ؟

**الدفاع -** هل كان يمكن لمحمود عبد اللطيف مش بوصفه الشخصى بل بوصفه عضواً فى النظام السرى أن يخالف الامر الذى صدر اليه ؟

**الشاهد -** كان ممكن يافندم .. ودليلى على هذا - وهو صادق ولو سألتوه يقول لكم اننى قلت له كده - انا قلت له ... فكر وشوف اذا كنت توافق على الفكرة أو لا ... وأقعد ثلاث أيام فكر .. وانت حر فى هذا ولك مطلق الحرية .. ولك أن تفكر ومن حقت أن تقول لا .. ولا ضير عليك فى هذا .. ومع هذا جاني وقال لى أنا مطمئن لآى عمل يصدر الى وكان من الممكن أن يخالف وان يرفض هذا الطلب ولا ضير عليه وما كنش النظام حيقتله .

**الدفاع -** فى حالة رفضه ، هل كان حيستمر عضواً فى الجهاز السرى رغم ترده ورفضه لما صدر اليه ؟

**الشاهد -** ما افكرشى .. المعقول انه هو طبعى ينحى بس من الجهاز السرى ويظل عضواً فى الاخوان المسلمين ..

**الدفاع -** قلت انه كان من المفروض بعد الفوضى التى تعم أن الرئيس نجيب يهدى الشعب بكلمة ثم بعد ذلك تتولى الامر حكومة أخرى .. من هم أفراد الحكومة الاخرى التى كانت فى ذهنكم كهيئة ترونها أداة انتقال من حال الى حال .. وقد قلت ايضا أن الاخوان ماكانوش صالحين أو الظروف مش ممهدة ..

**الشاهد -** بس عدالة المحكمة توافق على هذا السؤال .

**الرئيس -** اذا جيت تجاوب جاوب .. واذا ماحبتش بلاش .

**الشاهد -** بس هل هذا السؤال يخص الدفاع عن محمود عبد اللطيف .

**الرئيس -** انت شاهد ولك مطلق الحرية فى ان تجيب او لا تجيب ، فاذا كنت تعترض على السؤال قل هذا .... أنت شاهد ولك الحرية الكاملة فى الاجابة أو عدم الاجابة ..

**الشاهد** - سبق أني أجبت عن هذا السؤال في معرض التحقيقات واليوم في هذه الجلسة ، وعلى هذا الاساس فلا داعي للتكرار وانما اذا أمرتني المحكمة ان أعيد ما سبق ان قلته فأنا مستعد لذلك ...

**الرئيس** - اذا حببت .. عيد الكلام ..

**الدفاع** - احنا سمعنا منك اسمين .. اسم على وجه التوكيد واسم على وجه الاحتمال .. فهل دول اللي حيكونوا الحكومة ؟  
**حيحلوا محل مجلس القيادة** ... انا باسال عن اسماء افراد الحكومة اللي تتولى الحكم في مرحلة الانتقال وتسيطر على شئون البلد ..

**الرئيس** - هل يقصد الدفاع ان الافراد اللي كانت حتكون منهم الحكومة فيما بعد هذا الانقلاب أخذ رايه فيهم ام لا ..  
**الدفاع** - نعم ... أو جرى عليه نحو العرف .

**الرئيس** - موجهها كلامه للشاهد - هل أخذوا رايك في هذا ؟  
**الشاهد** - المسائل دى مايختصش بها افراد امثالنا ، بل احنا تيجى لنا تعليمات بهذا .. وفيه اسماء أنا ذكرتها في التحقيقات وانما هذه المسألة قطعيا أنا لا أعلمها ...

**الرئيس** - يعنى المسألة دى ليست من اختصاصكم ..  
**الشاهد** - أيوه .. ودى من مسئولية الناس اللي فوق على اساس اننا نعملها كاشاعة ، لان المفروض ان المسائل الخطيرة تيجى بهذا الشكل وتشاع على اعتبار انه كان ييجى بها الناس اللي في القيادة سواء وافق الافراد المختارون أو لم يوافقوا ... هذا مش من شأننا ..

**الدفاع** - قلت بأن بروجرامكم منذ ان تورط الجهاز السرى في الاخطاء كان اصلاح هذه الاخطاء .. هل كان يعاونكم لتحقيق هذا الهدف الاعتداء أولا على الرئيس وثانيا على أعضاء مجلس قيادة الثورة ثم الثالعالى الضباط الاحرار ... هل ده مما يوصلكم الى هذا التطهير ؟

- الشاهد - السؤال ده متناقض خالص . . .
- الرئيس - السؤال ده يمكن يكون خارج عن الموضوع . . .
- احنا عاوزين سؤال يتعلق بالموضوع اللي احنا بننظره الآن . .
- الدفاع - وهو كذلك يافندم . . . أنا مكتفى بهذا القدر . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - الادعاء عاوز يسأل حاجة ؟
- المدعى - لا يافندم . . .
- الرئيس - طيب . . . تؤجل الجلسة للساعة السادسة . .
- الدفاع - أنا لى طلب . .
- الرئيس - اتفضل . .
- الدفاع - احنا لنا شاهد دفاع واحد ممكن نحضره اذا ماوافقتم عليه . . شاهد دفاع واحد هو الاستاذ الهضيبي . . علشان اذا قررتم حضراتكم احضاره يبقى يجهزه الادعاء . . وانا اطلب سماعه كشاهد دفاع . . .
- الرئيس - هل الادعاء له اعتراض على هذا ؟
- المدعى - هو متهم وحييجى دوره . . .
- الرئيس - ليس هناك مانع؛ ويطلب الاستاذ الهضيبي كشاهد والآن ترفع الجلسة على أن تعود الى الانعقاد فى الساعة السادسة مساء . .
- « رفعت الجلسة فى الساعة الثانية والدقيقة الخامسة والثلاثين »
- بعد الظهر ■

## محضر

### الجلسة الثالثة لمحكمة الشعب

المنعقدة علنا في الساعة السادسة والدقيقة الخامسة عشرة مساءً ، بمقر قيادة الثورة في الجزيرة ، يوم الثلاثاء الموافق ٩ نوفمبر سنة ١٩٥٤ ، الموافق ١٣ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ ، الموافق ٥ ربيع الاول سنة ١٣٧٤ .  
بناء على المادة السابعة من الدستور المؤقت .

والمشكلة برئاسة قائد الجناح جمال مصطفى سالم عضو مجلس قيادة الثورة ، وعضوية القائمقام انور السادات ، والبكباشي ( ا.ح ) حسين الشافعي ، عضوى مجلس قيادة الثورة .

وبحضور البكباشي سيد سيد جاد المدعى ، والاستاذ على نور الدين وكيل النائب العام ، عضوى مكتب التحقيق والادعاء وتولى تسجيل المحاكمات بالاختزال الاساتذة : طلعت الصبان وممدوح توفيق ، وابراهيم فكرى احمد فوده مندوبو مصلحة الاستعلامات .

قدمت القضية رقم ( ١ ) لسنة ١٩٥٤ ( محكمة الشعب ) المتهم فيها محمود عبد اللطيف محمد ( حضر المتهم )

الرئيس - فتحت الجلسة ... الادعاء

البكباشي سيد سيد جاد - المدعى - الشاهد موجود ...  
محمد علي نصيري .



( نودى على الشاهد )

( حضر الشاهد )

الرئيس - اسمك ايه

الشاهد - محمد على نصيرى

الرئيس - عارف ده .

الشاهد - ايوه .

الرئيس - ايه .

الشاهد - مصحف .

الرئيس - طيب قول والله العظيم والله العظيم والله العظيم

اقول الحق و لا شيء غير الحق والله على ما اقول شهيد .

( ردد الشاهد صيغة اليمين )

الرئيس - المدعى

المدعى - هل انت من جماعة الاخوان المسلمين ؟

الشاهد - ايوه .

المدعى - من اى منطقة ؟

الشاهد - انا من الزقازيق اصلا وجيت فى بين السرايات .

المدعى - لك صلة بهنداوى ؟

الشاهد - اخيرا .

المدعى - متى كانت آخر زيارة لك بهنداوى ؟

الشاهد - يوم الحادث .

المدعى - ليه ؟ . . صف الموقف لآخر زيارة ؟

الشاهد - هو كان اتصل بى وادانى مسدسين ادانى الاول

وقال لى جربه فجربته وجدته مينفعش اديته له والثانى جربته

فى ملاعب كلية الزراعة ف ضرب طلقة ولم ينفع فاعدته له فقال

لى فيه حزام فيه مفرقات ليه تأمينين وشرح لى طريقة العمل به وقال لى تاخده وترتكب به جريمة فقلت له لا لا ما اقدرش آشيل حاجة زى دى وأنا شعرت بان فيه حاجة خطيرة فقال على العموم انت مش مكلف بحاجة فخذ المسدس ده جربه فاخذته وانصرفت وفى المساء سمعت الخبر فى الاسكندرية وكنت أزور صديق مريض اسمه على شاهين وقبض على .

الشاهد - لماذا وقع الاختيار عليك بالذات للذهاب الى هنداوى ؟

الشاهد - لا ادرى . أيام طرد محمد نجيب كنت قد اشتركت فى الحرس الوطنى وخرجنا فى مظاهرة ثم أخذنا نطالب بالكفاح المسلح ولما طلعنا الى قصر النيل البوليس اطلق علينا الرصاص وقتل اثنين من زملائنا فقلنا ان ده يبقى شىء خطير وثارث ثورة الجامعة فواحد صاحبى اسمه حسين عرفنى بهنداوى وطلب منى ان انضم الى مجموعة قبل الدور الثانى فقلت ما اقدرش لانى ما دخلتش الدور الاول لانى كنت مريض وبعدين دخلت قبل الدور الثانى .

المسئ - هل تذكر افراد المجموعة التى كنت تنضم اليها فى الجهاز ؟

الشاهد - ايوه السيد عواد واحمد الفيومى وعلى شاهين ويوسف عليان وطلعت ابراهيم وسلامة خليل وانا وفيه واحد اظن كمان بس مش فاكر اسمه داوقت .

المسئ - لماذا اعطاك هنداوى المسدس ؟

الرئيس - مين كان رئيس المجموعة ؟

الشاهد - سيد عواد

- الرئيس** - شغلته ايه الجهاز ده ؟  
**الشاهد** - كنا بنتمرن على القتال وحرب العصابات .  
**الرئيس** - حرب العصابات ؟  
**الشاهد** - أيوه .  
**الرئيس** - ايه الغرض ؟  
**الشاهد** - هو قال الغرض تكوين حكومة اسلامية .  
**الرئيس** - مين اللى قال ؟  
**الشاهد** - سيد عواد قال الغرض تكوين حكومة اسلامية  
وطرد المستعمرين وعمل جيش .  
**الرئيس** - هل كان كل واحد من جماعة بيدرب ؟  
**الشاهد** - لا مش كلهم بعد ما ينضم لفترة ويلاقوه صالح  
يدربوه وينضم للمجموعة .  
**الرئيس** - المجموعة داخله فى تكوين الشعب ؟  
**الشاهد** - كلها تابعة للشعب  
**الرئيس** - معروفة لافراد الشعب كلهم ؟  
**الشاهد** - لا مش كلهم .  
**الرئيس** - التنظيم ده مسمينه ايه ؟  
**الشاهد** - التنظيم السرى  
**الرئيس** - وغرض التنظيم السرى هو اقامة حكومة اسلامية ؟  
**الشاهد** - أيوه  
**الرئيس** - امال ايه غرض الجماعة كلها ؟  
**الشاهد** - تكوين حكومة اسلامية والفرد اللى يصلح بعد  
ما يأخذ دور التربية والتكوين ينضم للتنظيم  
**الرئيس** - يعنى الجماعة معموله علشان تكون دور تكوين  
للاعضاء علشان يخشوا الجماعة السرية وايه التنظيم السرى ده ؟  
**الشاهد** - انا دخلته اخيرا ولا اعرف قوانينه ونظمه معرفة  
وفيقة .

**الرئيس -** الطاعة عمياء ■

**الشاهد -** لا .

**الرئيس -** امال دخلت ازاي دون ان تعرف قانون الجمعية ؟

**الشاهد -** لما ادخل اعرفه .

**الرئيس -** لما تخش الجامعة تخش من غير ما تعرف قوانينها ؟

**الشاهد -** لا اعرف القانون الاول .

**الرئيس -** امال تدخل ازاي جماعة سرية من غير ما تعرف تنظيمها ، معقول الكلام ده ؟

**الشاهد -** لا .

**الرئيس -** طيب نحب انك تقول لنا الكلام المعقول . هو انت تبقى في سنة ثانية حقوق وتدخل جماعة متعرفش قانونها ■

**الشاهد -** لا يا افندم .

**الرئيس -** طيب قول الكلام المعقول يا تبقى بتخبى .

**الشاهد -** الجماعة : فيه فصايل والفصايل بتكون مجموعات والفصيـلة / ٢٨ والمجموعة فيها / ٧ افراد .

**الرئيس -** رئيس الجماعة بيتصل بمين ■

**الشاهد -** برئيس الفصيـلة .

**الرئيس -** ومين رئيس الفصيـلة بتاعتك ؟

**الشاهد -** اللي كان يـزورنا واحد انا استنتجت انه رئيس الفصيـلة ولكن مش فاكر اسمه .

**الرئيس -** انت انضميت للجماعة امتى ؟

**الشاهد -** سنة ٤٩ .

**الرئيس -** وانضميت امتى للجهاز السرى ؟

**الشاهد -** قبل الدور الثانى على طول .

**الرئيس -** امتى يعنى فى سبتمبر فى اكتوبر ؟

**الشاهد -** فى اواخر سبتمبر .

**الدفاع -** لما ادالك هنداوى المسدس قال لك ايه ؟

**الشاهد -** قال لى جربه .

**المدعى -** علشان ايه ؟

**الشاهد -** مقلش .

**المدعى -** عرفت ان فيه خطة وضعت .....

**الشاهد -** لايه ؟

**المدعى -** لتحقيق فكرة الحكومة الاسلامية والا مكنتش لسه

تعرف ؟

**الشاهد -** لا .

**المدعى -** والحزام تستعمله ازاي ؟

**الشاهد -** قال لى تربطه على وسطك وان فيه تأمينين وشرح

لى طريقة العمل به .

**المدعى -** وتروح فين ؟

**الشاهد -** مقلش انا لمسا قلت ان دي حاجة خطيرة مقدرش

اشيلها قال على كل حال انت مش حتتكلف بحاجة تنفيذية ودانى

المسدس .

**الرئيس -** طيب بعد الفصيلة اللي قلت عليها دي ...

**الشاهد -** أيوه رئيسها انا افكرت اسمه دلوقت اسمه سعد

زغلول .

**الرئيس -** د الرئيس بتاع بين السرايات ؟

**الشاهد -** أيوه .

**الرئيس -** ورئيس الجماعة بتاعتك . اسمه سيد عواد ...

**طيب ورئيس الفصيلة بيتصل بمين ؟ انتم بتعملوا لحسابه ؟**

**الشاهد -** لا لازم فيه واحد اعلى منه .

**الرئيس -** مين ؟

**الشاهد -** ما أعرفش .

**الرئيس -** شعبان كان معاك فى الجماعة ؟

**الشاهد -** لا دا فى المنطقة .

**الرئيس -** فى النظام السرى ؟

**الشاهد -** مادام بيدى أوامر يبقى فى النظام .

**الرئيس -** وانت تسمع كلامه على طول !

**الشاهد -** لا .

**الرئيس -** مش قال لك روح لدوير فرحت ؟

**الشاهد -** زى ما أى واحد يقول لى روح لفلان أروح . وهو

قال لى اتصل بهنداوى .

**الرئيس -** مقلش علشان ايه ؟

**الشاهد -** لا .

**الرئيس -** ولما رحت اتصلت بهنداوى وانت متعرفوش

وشعبان مقالكش الغرض من المقابلة وهنداوى قال لك خد

طبجعة وجربها مفكرتش ليه بيديك الطبجعة . مأثرتش فى نفسك

بعض الهواجس ؟ مفكرتش ان فيه حاجة ؟

**الشاهد -** هوه يوم ما ادانى الحزام قال لى انت مش مكلف

بعمل تنفيذى واحنا باعتين ناس وراهم وقال لى انت تراقب

الحفلات بس وانت مش مكلف بتنفيذ شىء . فلما قلت له انى

ما أقدرش أشيل الحزام اللى زى ده فادانى المسدس علشان

أجربه فقلت له الدنيا ليل .

**الرئيس -** انت مش جربت واحد ومضربش ؟

**الشاهد -** لا دا الثانى والأولانى ماضربش خالص .

**الرئيس -** يعنى جربته . ولما ما ضربشى ادالك واحد غيره

وجربته ؟

**الشاهد -** أبوه .

**الرئيس -** وقال لك تراقب مين ؟

**الشاهد -** قال لى تروح الحفلات وتراقب ، وتشوف مدى

استقبال الناس والحماس اذ ايه ورحت مؤتمر الموظفين وقت

اطلاق الصواريخ .

**الرئيس -** ايه الحماس اللى شفته ؟

**الشاهد -** كان فيه هتافات كثيرة وناس كثير وانا رجعت

قلت لهنداوى .

**الرئيس -** وهل مراقبة الهاتفات تستدعى اتك تشيل طبنجة ؟

**الشاهد -** لا وهوه قال لى وقت ماتروح ماتشيلش حاجة .

**الرئيس -** ما سالتش الطبنجة علشان ايه امال ؟

**الشاهد -** لا ماسالتش .

**الرئيس -** تحب تكون عاقلين شوية فى الاجابة . واحد

مانعرفوش ورحت تقابله وادالك طبنجة علشان تجربها مانفعتش

ادالك واحدة تانية نفعت وقال لك ماتشيلش السلاح معاك لما

تروح الاحتفالات امال تشيل السلاح امتى وليه ؟

**الشاهد -** قال لى خليك جاهز لما يطلب منك حاجة .

**الرئيس -** ماسالتش جاهز ليه ؟

**الشاهد -** علشان اقامة حكومة اسلامية . عندما يطلب منا

العمل .

**الرئيس -** ايه التعليمات الاسلامية اللى علموها لك ؟

**الشاهد -** حفظ القرآن والحديث .

**الرئيس -** القرآن قال انك تقيم حكومة اسلامية بالقتل

والسلاح ؟

**الشاهد -** السلاح لطرد المستعمر وطرد المستعمر يحتاج

الى سلاح ولازم تكون مستعدين لان العالم الاسلامى كله مستعمر

فلازم تكون جيش اسلامى علشان نموت فى سبيل الله وهم

عودونا ان نعد انفسنا لهذا .

**الرئيس -** لما رحت تقابل هنداوى دوبر قال لك ايه غير

حكاية السلاح ؟

**الشاهد -** اتكلم معايا عن المعاهدة وقال لى انها ضارة بالبلد

وان الانجليز ممكن يخرجوا لانهم عاوزين استقرار فى الشرق

الاوسط . واحنا دلوقت حانكون كقاعدة لهم وحنضر كثير جئا

لارتباطنا بالاحلاف العسكرية وحانظل مرتبطين بالشرق الاوسط

وده يضر البلاد فى حين اتنا لو حاربنا الانجليز ممكن يخرجوا .

وقال كمان ان البلد موجودة في ظل احكام عرفية ومحدث قادر يتكلم ودى حالة متسرش وشايقين الطلبة اطلق عليهم الرصاص لانهم ينادون بالكفاح المسلح للحرس الوطنى .

الرئيس - هو الحرس الوطنى الغى ؟

الشاهد - لا ماشى .

الرئيس - انت دخلت الحرس الوطنى ؟

الشاهد - ابوه .

الرئيس - دربتك الحكومة علانية او سرا ؟

الشاهد - علانية .

الرئيس - علشان تروح تنضم للجهاز السرى ؟

الشاهد - لا .

الرئيس - انت راجل فى كلية الحقوق وتقدر تفكر ... . ونجحت وانتقلت سنة ثالثة ؟

الشاهد - لا .

الرئيس - يعنى سقطت لما اتضميت للجهاز السرى ؟

الشاهد - أنا كنت مريض .

الرئيس - مين رئيس الجهاز ؟

الشاهد - أنا أعرف ان رئيس الجماعة بتاعتى السيد عواد .

الرئيس - ومين رئيسه ؟

الشاهد - ما أعرفشى .

الرئيس - يعنى ماشى عميانى كده ؟

الشاهد - لا . . فى الاول خالص ماكنشى فيه حاجه ولكن

بعد طرد محمد نجيب . قالوا مايصحش ان الرئيس يطلع ويرجع

من غير ان الشعب ما يفهم ايه المقصود من هذا وان ده يسىء الى

البلاد امام الدول الاجنبية ومصطفى البساطى فى الجامعة قال

يصح انكوا تطلعوا تعبروا عن شعوركم فطلعنا ، وبعدين اطلق

علينا الرصاص . وفضلت الجامعة نائرة مدة .



**الرئيس -** ازاي تسمح لنفسك انك تنضم في جمعية سرية  
ماتعرفشي أغراضها ايه أو نظامها ايه ۱۱

**الشاهد -** الغرض هو اقامة حكومة اسلامية .

**الرئيس -** لما انتوا ماشيين كده عميانى ليه ممشتوش ورا  
الحكومة عميانى لما طلعت رئيس الجمهورية وبعدين جابتوا ۱۱  
مش هوه ده المبدأ اللى خلاك تنضم للجهاز السرى ؟ ولا انت  
بتدين بمبدأين مبدأ سرى والاخر علنى ؟

**الشاهد -** احنا كنا بنعمل للوطن والاسلام .

**الرئيس -** ايه اللى عرفك ان الحكومة دى ماتعملش للوطن  
أو الاسلام علشان ماتمشيش وراها ؟

**الشاهد -** مظاهرة الجامعة كانت للوطن . صحيح كان الشعور  
ثائر لطرد محمد نجيب ولكن تحولت الى مظاهرة تطلب الكفاح  
المسلح .

**الرئيس -** ومين اللى يقرر الكفاح المسلح ۱۱

**الشاهد -** الحكومة .

**الرئيس -** يعنى اللى يقرر هو المسئول . . القائد ؟

**الشاهد -** أيوه .

**الرئيس -** ليه ماخرجتوش بالنظام بتاعكم وعملتوا عمل ؟

**الشاهد -** احنا في المعركة كنا بتدرب في تل بسطة وحاولت

النزول للميدان ولكن فاجأنى المرض .

**الرئيس -** انتوا كنتوا عاوزين حكومة اسلامية ؟

**الشاهد -** أيوه ودا احنا اعلناه في الجامعة وقلنا اننا نتعاون

مع الموجودين على قيام الحكومة الاسلامية لأن ما فيش حاجة  
بتيجى مرة واحدة .

**الرئيس -** عاوزه استعداد ؟

**الشاهد -** الجيش موجود يراقب البلاد مراقبة كويسة

والحكومة تضع لها الانظمة وتمشى .

**الرئيس -** وبعدين ايه اللي غير الحال ؟

**الشاهد -** مافيش تغيير .

**الرئيس -** أمال شلت السلاح ليه في الخفاء ؟

**الشاهد -** أنا رديت له السلاح .

**الرئيس -** انت رديت المسدس الأول والثاني ولكن الثالث فضل معاك ؟

**الشاهد -** أبوه لآنى ماخرجتش من البيت .

**الرئيس -** شلت معاك سلاح ليه قبل الحادث ؟ وقبل ما تعرف أن في الامر جنائية وأن الامر خطير ؟

**الشاهد -** هنداوى قال لى خد المسدس وجربه .

**الرئيس -** يعنى بتشتغل مجرب أسلحة ؟

**الشاهد -** هوه قال لى كده وماكنتش عارف ايه اللى عايزينه .

**الرئيس -** تبقى انت طالب في الجامعة ودرست الدين وعرفت أنك انت عاوز تكون حكومة اسلامية وبتقود مظاهرات الجامعة بدون ما تعرف سببها ؟ وبتنضم للجهاز السرى وما تعرفش مين اللى يبقوده وواحد يديك سلاح تجربه وترجعه وتانى وتالت وترجعه وما تعرفش الغرض ايه . . . الكلام ده لو أخوك قاله لك كنت تصدقه ويخس دماغك ؟

**الشاهد -** دا اللى حصل بالضبط . ولكن في مظاهرات الجامعة كنا فاهمين اللى بنعمله .

**الرئيس -** كنت فاهم ايه ؟ وايه غرضها ؟

**الشاهد -** قالوا . . .

**الرئيس -** مين اللى قال ؟

**الشاهد -** الوعي السياسى اللى موجود .

**الرئيس -** موجود فين ؟

**الشاهد -** في الجامعة .

**الرئيس -** مع مين ؟

**الشاهد -** مع الطلبة .

**الرئيس -** طلبة ايه ؟

**الشاهد -** طلبة الجامعة .

**الرئيس -** زى مين ؟ تفكر مين منهم ؟

**الشاهد -** كان موجود عدد كبير منهم وهم قالوا الجيش  
حيختلف مع بعضه والاحسن ان الجيش يكون موجود .  
ويراقب الحكم وييجى ناس فى الحكم يراقبهم الجيش وده كان  
الراى الموجود . . . يعنى الجيش يوجد بره الحكم ويقوم على  
الحكم افراد يراقبهم الجيش .

**المدعى -** ايه ميل البساطى الى انت سمعت كلامه . ؟

**الشاهد -** من الاخوان

**المدعى -** جابها منين الاوامر دى ؟

**الشاهد -** لازم من المركز العام .

**الرئيس -** يعنى من مكتب الارشاد ؟

**الشاهد -** ايوه وهو مقسم الى اقسام : قسم الطلبة - قسم  
العمال الخ . . . وهو الى يرسم السياسة .

**الرئيس -** ايه العلاقة بين خروج محمد نجيب وبين انكوا  
تتجندوا تجنيد مسلح ؟

**الشاهد -** دكه فى فبراير او يناير واحنا فى ابريل دلوقت .

**الرئيس -** احنا دلوقت فى ابريل ؟

**الشاهد -** لا فى اكتوبر .

**المدعى -** ايه تسليح الجماعة ؟ نظامه ايه ؟

**الشاهد -** واحد يكون معاه طينجه وواحد يكون معاه برن  
واتنين استن والباقي بنادق .

**الرئيس -** ايه تانى غير السلاح ده ؟

**الشاهد -** بس كده .

**وكيل النيابة -** حصل فى مارس بمناسبة المظاهرات مؤتمر  
للطلبة اعلن فيه الكفاح المسلح .

**الشاهد -** ايوه

**وكيل النيابة -** يعنى ايه الكفاح المسلح ■

**الشاهد -** يعنى نروح القنال .

**وكيل النيابة -** ايه علاقة انكوا تعملوا مظاهرة عشان محمد نجيب بالكفاح المسلح ؟

**الشاهد -** المظاهرة بدات بخروج محمد نجيب وانتهت الى مطالبة الحكومة بالكفاح المسلح والنزول الى القنال .

**وكيل النائب العام -** وهل يكون الكفاح المسلح بعمل مظاهرة ■

**الشاهد -** الغرض من عمل المظاهرة هو لتكوين الراى العام والحكومة تسمع رايه .

**وكيل النائب العام -** بالنسبة لهنداوى لما رحلت له آخر مرة وقال لك انت مش مكلف فسرهما شوية .

**الشاهد -** ساعة ما ادانى الحزام شرح لى عمل الحزام فقلت له أنا ما أقدرش أشيله فقال لى طيب جرب المسدس ده .

**الرئيس -** يعنى خفت على نفسك .

**الشاهد -** شعرت ان المسألة بقت خطيرة .

**الرئيس -** الحزام اخطر من المسدس .

**الشاهد -** لما أجرب المسدس مفيش حاجه .

**الرئيس -** لكن لما تجرب المسدس تروح ■ فهل هذه هي

الشجاعة اللى علمها لك الدين الاسلامى ؟

**الشاهد -** هوه ما قالش جرب الحزام انما قال لى بس خليك

دايما على استعداد ■ فقلت له أنا ما أقدرش أشيل حاجة زى دى

**الرئيس -** خفت لتتسلف بيته ؟

**الشاهد -** الحزام خطر على الموجودين وهنداوى قال لى احنا

باعتين ناس وراهم .

**وكيل النائب العام -** ايه معنى عبارة « احنا باعيتين ناس

وراهم » ■

**الشاهد -** هو قال لى انت مش مكلف واحنا باعيتين ناس

وراهم .

**وكيل النائب العام -** ورا مين ؟

**الشاهد -** ورا رجال الثورة .

**وكيل النائب العام -** لكن هنداوى أعترف انه كلفك بأنك

تشيل مسدس وتستعد لضرب الرئيس جمال عبدالناصر إذا

اتاحت لك فرصة ، وان الحزام ده تلبسه ولما تقابل الرئيس

جمال عبد الناصر تبقى توصل سلكين فينسفكم الحزام .

**الشاهد -** هو قال لى خذ الحزام الى أن نطلبك فى عمل

تنفيذى فقلت له أنا ما أقدرش أشيله .

**الرئيس -** مارايك فى كلام هنداوى فى انه قال لك خذ -

المسدس ده عشان تقتل بيه الرئيس جمال عبد الناصر .

**الشاهد -** جاز عنده التيه دى لكن لم يصرح لى بيها وأنا

معرفتش منه حاجة .

**الرئيس -** لكن هوه صرح لك بيها .

**الشاهد -** ماعرفتش منه حاجة .

**الرئيس -** هل تعرف محمود عبد اللطيف ؟

**الشاهد -** لا .

**الرئيس -** ماشفتوش !

**الشاهد -** لا ما أعرفوش ( نظر الى الجهة التى يجلس فيها

المتهم محمود عبد اللطيف )

**الرئيس -** دى اول مره تشوفه فيها ؟

**الشاهد -** ايوه .

**الرئيس -** انه واحد فيهم .

**الشاهد -** اللى أعد جاره الشاويش ولازم هو ده ( أشار

على المتهم ) لان الى جانبه لابس كويس ( أشار على الاستاذ

حماده الناحل ) .

**الرئيس -** مفروض أن محمود عبد اللطيف لابس مش كويس

**الشاهد -** بعد الاعتقالات يكون لابس الواحد وحش .

**الرئيس** - اشمعنى انت لابس كويس ؟  
**الشاهد** - عشان كنت قالع هدومي ولايس ملايس ثانية .  
**الرئيس** - تعرف ايه عن رياسة الاخوان المسلمين والجمعية التأسيسية والناس اللي بيشتغلوا فيها ؟  
**الشاهد** - طبعا المرشد هو الرئيس وفيه مكتب الارشاد والجمعية التأسيسية وبعدين فيه مناطق والمناطق تضم الشعب . هذا هو النظام .  
**الرئيس** - ايه الحاجات اللي حصلت في الجمعية التأسيسية ومكتب الارشاد ؟

**الشاهد** - يقال ان فيه راى يقول انه يجب ان نمشي مع الحكومة لانها خطوة كويسه ونساعدھا وكان فيه راى ثانى يقول انه يجب ان تقام حكومة على اسس سليمة وكان ممكن في المعاهدة ناخذ حقوق اكثر من هذا وكان فيه خلافات على مناصب لانعرفھا بالضبط ولكن هذا حسب ما سمعته .

**الرئيس** - هل تعرف اعضاء الجمعية التأسيسية ؟  
**الشاهد** - بعضهم .

**الرئيس** - ناس كويسين ؟

**الشاهد** - الذى اعرفهم من جهة الشرقية ناس كويسين .

**الرئيس** - كلهم كويسين ؟

**الشاهد** - اللي عندنا في الزقازيق في الجمعية التأسيسية كويسين .

**الرئيس** - زى مين ؟

**الشاهد** - الشيخ احمد نار وفارس فريح مدرس .

**الرئيس** - بيشتغلوا ايه ؟

**الشاهد** - فارس فريح مدرس .

**الرئيس** - فين ؟

**الشاهد** - مدرس ابتدائى في ههيا .

**الرئيس** - تعرف انه كويس ازاي ؟

- الشاهد - كان يعمل كتائب تربوية ، كان مربى .  
الرئيس - مربى ازاي ؟  
الشاهد - يربى الفرد على النواحي الاسلامية .  
الرئيس - ازاي ؟  
الشاهد - يلقي محاضرات .  
الرئيس - انت أعدت كام سنه في سنه اولي في الكلية ؟  
الشاهد - انا طول عمرى بانجح بس المرض هوه السنه دي  
الى خلانى أسقط .  
الرئيس - والا لما دخلت الجهاز المرى سقطت ؟  
الشاهد - سقطت مره لما رحت القنال وبعد ذلك مرضت  
بالكلى ولم ادخل الامتحان بأمر الطبيب .  
الرئيس - الادعاء عايز يسأله ؟  
المدعى - لا .  
الرئيس - الدفاع عايز يسأله ؟  
الدفاع - لا .  
الرئيس - هات الشاهد اللي بعده .  
المدعى - الشاهد يحيى سعيد .  
( نودى على الشاهد يحيى سعيد فحضر )  
الرئيس - اسمك ايه ؟  
الشاهد - يحيى سعيد محمود سعيد .  
الرئيس - عندك كام سنه ؟  
الشاهد - حوالى ٣٥ سنه .  
الرئيس - بتشتغل ايه ؟  
الشاهد - موظف في مخازن مصلحة التنظيم .  
الرئيس - درجة ايه ؟  
الشاهد - باليوميه .  
الرئيس - من اد ايه موظف ؟  
الشاهد - من سنة ١٩٣٦ .

- الرئيس - وقبل سنة ١٩٣٦ ؟  
 الشاهد - ما كنتش موظف .  
 الرئيس - وكنت بتشتغل ايه ؟  
 الشاهد - كنت باشتغل في جريدة كوكب الشرق .  
 الرئيس - بتشتغل فيها ايه ؟  
 الشاهد - في المطابع .  
 الرئيس - عارف ايه ده ( وأشار سيادته الى المصحف )  
 الشاهد - أيوه مصحف .  
 الرئيس - قول والله العظيم أقول الحق ولا شيء غير الحق  
 والله على ما أقول وكيل  
 ( ردد الشاهد الحلف )  
 وكيل النائب العام - يا يحيى ايه معلوماتك عن جمعية  
 الاخوان المسلمين ؟  
 الشاهد - مشترك .  
 وكيل النائب العام - في أى شعبه ؟  
 الشاهد - قديما في شعبة اولاد علام بالدقى ثم نقلت الى  
 امبابه من ثلاث سنوات فذهبت الى اخوان امبابه وكنت في  
 شعبة خارطة المنيرة بامبابه جنب مدينة العمال لانى سكنت بها  
 منذ ثلاث سنوات تقريبا .  
 وكيل النائب العام - هل تعرف شيئا عن النظام الخاص في  
 الجماعة ؟  
 الشاهد - لو كانت هناك انظمة .  
 الرئيس - انت مشترك في الجمعية زى ما تكون في الاتوبيس  
 او الترامواى . قول عضو بين نوع الاشتراك !  
 الشاهد - اسمها كده من جماعة الاخوان المسلمين .  
 الرئيس - المشترك يدفع اشتراك في جهة معينة ليستفيد  
 منها ؟  
 الشاهد - انا كنت ادفع اشتراك عضوية .



**الرئيس -** ايه اللى ضمك للاخوان ؟

**الشاهد -** احد الاخوان فى المصلحة ، ذهب مع مره واتنين .

**الرئيس -** سنة كام ؟

**الشاهد -** سنة ١٩٤٧ او ١٩٤٨ فالحقنى بهم وكنت ساكن

فى عزبة اولاد علام وكنت احضر معهم واذكر مذاكرتهم واعمل  
كما يعملون دراسات فقهية وروحية معهم حتى ازمة سنة ١٩٤٨  
فحلت الجماعة وما كانش لى اى شىء ملحوظ فيهم ولذلك لم  
اعتقل لانى كنت بعيد وعضو جديد فى الوقت ذاته . ولما رحت  
امبابه انضميت اليهم وكان لهم مقر فى المنيرة فكنت اتردد عليه  
باستمرار حتى انى اعرف جميع الاخوان الموجودين فيها وكثرة  
معارفى فيهم كثيرة نظرا لانى كنت قديم وكنت اتقابل بأكثرهم .

**الرئيس -** متى انضممت الى النظام الخاص ؟

**الشاهد -** لم انضم الى النظام الخاص او حاجة من هذا

القبيل .

**الرئيس -** ما علاقتك بهنداوى ؟

**الشاهد -** ليس لى به علاقة اطلاقا ولم اره سوى مرتين

اتنين لانه فى امبابه وانا فى المدينة بعيد .

**وكيل النائب العام -** مش تعرف ان فيه نظام خاص فى

امبابه ؟

**الشاهد -** سمعت هذا الكلام منذ شهرين من على نويتو

بالمنيرة ان الاخوان يعملون جيش اسلامى ويعملوا اسر وترتيبات  
من هذا القبيل فكنت اسمع منه الكثير عن هذه الحاجات فقلت  
له ما القصد من هذا الجيش تعملوا بيه ايه فكان يقول طرد  
المستعمر من البلاد العربية . وانا تمللى يمر على على نويتو  
باستمرار فى المنزل وكنت اسمع منه لانى احب اسمع كل حاجة  
عنهم فقال ان هناك فكرة لانشاء جيش اسلامى وهذا الجيش  
لتحرير ارض الاسلام من المستعمر - عرفت هذا منه

حوالى شهرين ولكنى لم انضم لهذه العملية نظرا لانى رب أسرة  
وعندى من الاولاد اربعة .

**وكيل النائب العام -** ما نظام الجيش وكيف يكون فى شعبة  
امبابه ؟

**الشاهد -** سمعت ذلك من على نويتو أنهم يقسمون أنفسهم  
الى مجموعات كل مجموعة من سبعة افراد او ثمانية وافتكر  
سبعة اشخاص ويعملوهم وحدات صغيرة او جماعات صغيرة .

**وكيل النائب العام -** فيه فى امبابه كام مجموعة ؟

**الشاهد -** كان يقول لى هناك اربع مجموعات .

**وكيل النائب العام -** تعرف مين قائد هذه المجموعات ؟

**الشاهد -** كنت أعلم من على نويتو انه هنداوى دوير .

**وكيل النائب العام -** ما وظيفة على نويتو ؟

**الشاهد -** بعد هنداوى دوير على طول مساعده او الى معاه  
على طول بعده على طول .

**الرئيس -** اسمه ايه ؟

**الشاهد -** مساعد .

**الرئيس -** الكلمة اللى ناسيها .

**الشاهد -** مش ناسى حاجة هو كان مساعد هنداوى فى هذه  
الجماعة .

**الرئيس -** يعنى الرديف ؟

**الشاهد -** الرديف معروف مساعد له .

**وكيل النائب العام -** هل تعرف محمود عبد اللطيف ؟

**الشاهد -** اعرفه - اعرف محمود عبد اللطيف من زمان  
وسمعت من على نويتو فى مرة من المرات انه هو وسعد حجاج  
فصاوهم من النظام يتاعهم او التشكيل فأردت ان اتعرف فكان  
يقول لى لان اهم مهمة وهى حراسة الاستاذ المرشد اثناء اختفائه

في المدة الاخيرة هذا ما قاله لني على نويتو .

**الرئيس -** المرشد اختفى ليه ؟

**الشاهد -** لا اعرف .

**الرئيس -** مش يهكم تعرف ده ؟

**الشاهد -** والله لا يهمنى ذلك ، وما يهمنيش اختفاؤه او ظهوره والذي يختفى طبعاً الجبان .

**وكيل النائب العام -** انت بتحب تسمع فماذا سمعت ؟

**الشاهد -** سمعت انه اختفى بعد حادث منيل الروضة فخاف على حياته .

**الرئيس -** ما هو هذا الحادث ؟

**الشاهد -** حصل في اثناء الصلاة في منيل الروضة مظاهرة او حاجة من هذا القبيل وبعدها اختفى .

**وكيل النائب العام -** شفت محمود عبد اللطيف امتي ؟

**الشاهد -** صبيحة يوم الحادث جاني الساعة ٧ ونده فنزلت فقال لي تسمح انا عاوز شنته وعلى يقول اى شنته فقلت له مفيش غير بتاعة ابني الصغير وهيه ناقصة البطانة فقال لي وريهالى فشافها واخذها ومشى الى جهة المنيرة .

**وكيل النائب العام -** ما عرفتش عبد الطيف كان رايع فين ؟

**الشاهد -** لا والله شأنه شان اى اخ اعطيتها له بسلامة نية وحسن الضمير .

**وكيل النائب العام -** قلت ان التنظيم اللي عاملينه بقصد

تكوين جيش اسلامى ايه اللي سمعته عن أهداف الجيش ده - وعاوز يعمل ايه او ينقذ ايه وتشكيله في السر ؟

**الشاهد -** احياناً يقول لي مش في السر وهذا الجيش الاسلامى الغرض منه طرد المستعمر من البلاد العربية وتحريرها من الاستعمار كما يقول فكانت مهمة هذا الجيش هي انهم يعدوا انفسهم للمحاربة في الجزائر او تونس او مراکش او في

أى بلد عربى آخر كما سافروا من قبل فى فلسطين .  
**وكيل النائب العام** - ما سمعتش أن الجيش ده له مهمة فى مصر |

**الشاهد** - كنت سمعت من على نويتو هذا الجيش معمول علشان ايه والقصد منه ايه وسألته هل تريدون به الحكم أو عمل انقلاب داخل البلاد فقال لى لاما نقدرش نعمل حاجة ولا نقدر أن نصل الى الحكم ولا بعد سبع سنين ولا نعمل شيئا الا اذا كان الجيش او تنظيمه اللى موجود فى قلبه يعمل وما علينا ان نجحت الا أن تؤيدهم .  
**وكيل النائب العام** - ازاي يعنى ويحصل ايه والخطة كانت ايه |

**الشاهد** - اذا بدأ التنظيم اللى فى قلب الجيش وعملت عمل أو حاجة من هذا القبيل ونجح فيها يبقى تؤيدهم .  
**وكيل النائب العام** - هل المجموعات مسلحة |

**الشاهد** - أنا ما كنتش أسمع عن التسليح شىء لان على نويتو قال ما جابولناش أسلحة .

**وكيل النائب العام** - واذا جت أسلحة ما الغرض منها ؟  
**الشاهد** - والله ما كترتش عليه وكنت اخشى أن يحرم عنى بعض الكلام فكنت أسمع منه شوية شوية .

**وكيل النائب العام** - مفروض تقوم هذه المجموعات بانقلاب |

**الشاهد** - المجموعات كانت تؤيد من يقومون بالحركة .

**وكيل النائب العام** - مين يقوم بالحركة . ؟

**الشاهد** - الاخوان الذين يقولون عنهم فى صفوف الجيش .

**وكيل النائب العام** - والمدنيين فى المجموعات ؟

**الشاهد** - يناصروهم .

**وكيل النائب العام** - الا يستعملون الاسلحة التى معهم |

**الشاهد** - هوه قال يساعدوهم ويناصروهم .

**وكيل النائب العام -** اذا تحقق الانقلاب يحصل ايه ؟  
**الشاهد -** في الحكم مش عايزين يغيروا رئاسة الجمهورية  
الا بعد مدة ويعملوا اى رئيس وزارة زى ما يقولوا لمدة وبعدين  
يصلوا فقلت له القصد امتى وتحكموا ازاي فقال لى الكلام ده  
بعد مدة ولا سبع او ثمان سنين للوصول الى هذا ، لان فيه  
خطوات طويلة امامنا .

**وكيل النائب العام -** ما هى هذه الخطوات التى سمعتها ؟  
**الشاهد -** البلد ما نقدرش نحكمها لانها عايزه .....  
**وكيل النائب العام -** لو حصل انقلاب ماذا سيحصل ؟  
**الشاهد -** الشعب يطالب بالاشياء التى يقولونها له .  
**وكيل النائب العام -** شكل الحكم ازاي ؟  
**الشاهد -** كما هو عليه مش حيفروه ، مفيش نية التغيير  
دلوقتى والقرآن كما يقولون الآن الحكم به يأخذ وقت طويل فى  
مرحلة سبع سنوات او اكثر .  
**وكيل النائب العام -** الناس اللى يتولوا الحكم مين ؟  
**الشاهد -** مرة قالوا عبد الرحمن عزام ومرة قالوا .....  
مش فاكرا .

**الرئيس -** ماهو عملك فى الاخوان ؟  
**الشاهد -** كنت سكرتير سنة ١٩٥٠ واعرف اكثر الاخوان  
وبعدين قفلت فى مدة الشهرين فلم أعمل معهم ولانه لم يكن لهم  
مكان وبعدين جه وقال لى انت ومحمود ومحمد زكى وعبد اللطيف  
انتم الاربعة تعملوا اسرة وكوناكم اسرة عشان تزودونا بالاخبار  
فقلت له اخبار ايه فقال لى كل شائعة تمس الاخوان تقول لنا  
عليها ونديكم حاجات تدرسوها وتقرأوا فيها وجبلى كتساب  
المعذبون فى الارض فقرانه وبعد كده لم يجيبوا لنا برنامج او اى  
شئ نقرأه .

**الرئيس -** بس المعذبون فى الارض ؟

**الشاهد -** هذا حصل وبعدين اجتمعنا حوالى ٣ - ٤ اجتماعات لحفظ سورة آل عمران فحفظنا ٣٠ آية على ثلاث مراحل ثم اتقطعنا واتحلينا من انفسنا لانهم بعدوا عنا ومفيش ميل منهم الينا اما علاقنى بعلى نويتو فكانت مستمرة فكان يمر على وكان يتكلم معى عن كل شىء .

**الرئيس -** يعنى شमित ان حكاية الدعوة مش ماشية ؟

**الشاهد -** عرفت انها كلام فارغ .

**الرئيس -** والحقيقة ؟

**الشاهد -** الحقيقة يعلمها الله . وهذا زيف وخداع وغش

ونفاق منهم والمقصود حيل لجذب الناس اليهم او شغل ظلام مش حاجة متورة .

**الرئيس -** علشان ايه يجذبوا الناس اليهم ؟

**الشاهد -** عشان يلماوا الناس حوالهم .

**الرئيس -** فرحانين بالهيصة دى ؟

**الشاهد -** يكسبوا الناس حوالهم .

**الرئيس -** بالاشتراقات ؟

**الشاهد -** طبعا اقله .

**الرئيس -** قول لنا اذا كنت تعرف شىء عن الاشتراكات .

**الشاهد -** لا اعرف الا منتهى الصراحة . وانا قلت كل ما

اعرفه واى خدمة انا مستعد للافادة بيها .

**الرئيس -** خدمة ... مش عايزين نخدم .

**الشاهد -** اى حاجة يعنى اذا كانت اى حاجة مش باينة انا

قلتها اقولها الان واقولها لانى ما عنديش شىء اخبيه .

**الرئيس -** رحت اول مرة قابلت هنداوى فين ؟

**الشاهد -** فى مكتبه مع على نويتو .

**الرئيس -** خدك ليه ؟

**الشاهد -** عشان يعرفنى بيه .

**الرئيس -** مش عشان يكشف عليك كشف هيئة يشوفك  
تليق والا لا ؟

**الشاهد -** هذا ما يعلمه الله وطبعاً ما اليقش لانه سألنى  
هل انا مدرب على النظام العسكرية فقلت له انا ما خدمتش  
مسكرى وما عنديش وقت للتدريب فقال لى انت متزوج قلت  
له ايوه وعندك اولاد قلت له ايوه فلقيته تبرم وبص لعلى وعمل  
اشارات انى ما انفعش .

**الرئيس -** ما اثر هذا فى نفسك ؟

**الشاهد -** ما اتأترتش .

**الرئيس -** ايه الإخبار بتاعة الشعب ائلى كنت بتودىها ؟

**الشاهد -** والله مفيش حاجة ...

**الرئيس -** مش كنت عامل ضابط مخابرات ؟

**الشاهد -** ولا ضابط ولا حاجة ... ده اللى عمله ، قال  
يعنى بينظم اما الحقيقة اللى كان يقولها لى هات اخبار او اى  
حاجة ... وفيه واحد اسمه حمزة الجوهري ، فانا كنت  
وحت مع زميلى اللى اسمه حمزة الجوهري .. رحت معاه  
وشفت الاستاذ البهى الخولى ووجدت الجماعة التانيين اصدق  
وحضرت جلساتهم مرة واثنين .. مرة فى مسجد السرفاعى  
ومرة فى مسجد الحسين ومرة فى المركز العام .. انا رحت  
هناك يوم الثلاثاء - يوم الحادث وغادرت المركز العام الساعة  
ثمانية وثلاث تقريباً وكانوا موجودين بعد المحاضرة نفسها ..  
**الرئيس -** انت قلت فى الإقوال بتاعتك ان على نويتو كان  
يقول لك كل حاجة خاصة بالنظام السرى

**الشاهد -** ايوه ..

**الرئيس -** قل لنا كل حاجة خاصة بالنظام السرى . ؟

**الشاهد -** انا قلت ده فى التحقيق ..

**الرئيس -** احنا ملناش دعوه بالتحقيق .. احنا عاوزين

نسمع هنا كل حاجة من اول وجديد .. قل لنا كل حاجة  
قالها لك عن النظام السرى .. يعنى عاوزينك تقول لنا الحكاية  
من الالف للباء ..

**الشاهد -** اولاً هو ما كلمنيش عن كلمة النظام السرى على  
اعتبار ان ده معناها الفصائل السرية ، بل على أساس ان  
الفصيلة تتكون من سبع افراد تقريباً .. كل مجموعة تتكون  
من سبع افراد يبقى سبعة فى أربعة بثمانية وعشرين واحد .  
و كنت أسأله هل فلان منهم او ضمتوه يقول لا .. او فلان ده  
منهم يقول ايوه .. وبالطريقة دى عرفت اكثرهم ..  
**الرئيس -** تقدر تقول لنا عن أسمائهم .. هه .. توكل على  
الله وقل لنا عنهم ..

**الشاهد -** على طول مفيش حاجة .. أنا كنت قلت بعض  
أسماء منهم زى محمد رهونى ... سعد حجاج .. على نويتو  
طبعاً .. حامد نويتو .. عبد الخالق او الحاج عبد الخالق فى  
امبابة .. عبد المنصف البحرى .. عبد القادر سلمانى ..  
صلاح خليفة .. محمود الصياد .. عبد الحى ابراهيم ..  
أظن .. وكثير بس مش قادر اتذكرهم الا اذا سمعت أسماؤهم  
**الرئيس -** لا احنا مابتقولش ..

**الشاهد -** أصلى مش قادر احصر الاسماء كلها ..

**الرئيس -** انت ذاكرتك زى الحديد ..

**الشاهد -** لا والله .. ( ضحك ) ..

**الرئيس -** تقدر تقول لنا الاقسام بتاعة الناس دول ، ده جاى  
منين وده جاى منين ؟

**الشاهد -** منين ازاي ؟ لاما أعرفشى .. أنا أعرف خطط ،  
لان المعلومات ما كانتش بتجبنى صح فى الحقيقة ..

**الرئيس -** طيب لما لقيت الجماعة كلها ماشية كده ؟  
اتصلت بهم ليه ؟



**الشاهد -** أنا انقطعت عنهم قبل الحادث بشهر تقريبا ..

**الرئيس -** ليه ؟

**الشاهد -** علشان لقيت أحسن منهم .. لان دول كانوا ناس بتوع شغل الظلام والاختفاء ..

**الرئيس -** مين دول ؟

**الشاهد -** الهضيبي وشلته ..

**الرئيس -** دول بتوع شغل الظلام والاختفاء ؟

**الشاهد -** ايوه ..

**الرئيس -** ايه شغل الظلام والاختفاء ده .

**الشاهد -** اللي يختفى ده معناه ايه ؟

**الرئيس -** تفكر انت ايه ؟

**الشاهد -** افندم

**الرئيس -** تفكر انت ايه ؟

**الشاهد -** اللي يختفى هو ده اللي بيعمل في الظلام « هو اللي كان يبت الدعايات في الشعب والحاجات انلى كان بيعملها ضد الحركة ، والشهرة والتشهير والكلام العارغ اللي كنا ينسمعه

**المنعنى -** هل تعرف عبد المنعم عبد الرؤوف ؟ وما معلوماتك عنه ؟

**الشاهد -** تانى يوم عيد الاضحى الماضى اخذنى على نويتو صباحا الى منزل مصطفى الوردانى بالمنيرة وكان غائبا في بلدته .. ده مصطفى الوردانى .. ودخلت فوجدت شخص متوسط وحليق وقاعد يشوح على ترايبزه بعلب كبريت مناورات حربية ويبيدرس فيها وبعدين انا مارضيتش اقول ده مين ولا حاجة .. ولكنه قال لى ده الضيف أو الأسد . فقال لى انت ما شفتش الشكل ده في المركز العام قبل كده ، قلت له لا فقال لى ده عبد المنعم عبد الرؤوف وبعد كده قال لى الضيف منى .. ده كان

رابع او خامس يوم عيد الاضحى الى فات بالضبط فصورته في  
ذهنى لاني قعدت معاهم اكثر من ساعة .

**الرئيس -** ايه الحاجات الحربية اللي كان بيشرحها ؟

**الشاهد -** والله ما فهمتش منه الا انه كان عامل أمشاط

كبريت وقاعد مرصصها على تراييزة أكل كبيرة .

**الرئيس -** مين ؟

**الشاهد -** الضيف نفسه ..

**الرئيس -** وكان بيشرحها لمين ؟

**الشاهد -** كان موجود أربعة من اللي ذكرت أسماؤهم ..

**الرئيس -** تقدر تذكر لنا أسماؤهم تاني ؟

**الشاهد -** أعرف منهم حسن عبد المنعم وعلى نويتو واتنين

تانيين مش متذكر حقيقة مين هم .. وهو كان قاعد يشرح لهم

وكان يرتدى بيجامة على فائلة بحمالات .

**الرئيس -** ألم تسمع عن على نويتو ؟

**الشاهد -** سمعت انهم كانوا في كرداسة مقيمين في معسكر

للتدريب ..

**الرئيس -** تدريب ايه ؟

**الشاهد -** في المعسكرات بتاعة الاخوان للتدريب وكان موجود

فيها عبد المنعم عبد الرؤوف ..

**الرئيس -** تدريب روجي يعني ؟

**الشاهد -** لا .. ده تدريب جبل .. تدريب عسكري في

كرداسة ، وبعدين هاجمهم البوليس وهربوا وما مسكوش حد

.. واللى قال لى الكلام ده على نويتو بعدها بأسبوع أو أكثر ..

**الرئيس -** انت عندك معلومات كويسة أوى عن الجهاز-

السرى من على نويتو .. فايه شغلة الجهاز ده في الجمعية ؟

**الشاهد -** الحقيقة اللي أنا أفهمه عنه انه زى ما قال لى في

الاول .. قال لى دى فضائل او نواة جيش اسلامى .. ده

الاصل الحقيقى الى انا فاهمه ، اما انه جهاز سرى فهذه كلمة ثقيلة على سمعى ..

**الرئيس -** والجيش الاسلامى ده ايه كانت علاقته ■

**الشاهد -** علاقته بايه ■

**الرئيس -** بجماعة الاخوان ..

**الشاهد -** جماعات ..

**الرئيس -** يعنى كل واحد يقدر يتطوع فى هذا الجيش ؟

**الشاهد -** لا .. كانوا هم يياخذوا ناس مخصوصة ..

**الرئيس -** باعتبارك عضو فى جماعة الاخوان وهى تقوم بعمل

نواة جيش اسلامى ، وهذا الجيش غير معلوم لدى جميع الناس ■

ويشتغل من تحت الارض .. ما تعرفش ايه هى علاقة الجيش

ده بهذه الجماعة اللى انت عضو فيها ■

**الشاهد -** والله ده اللى سمعته منهم ..

**الرئيس -** موقفك انت .. تعتقد ايه .. شفت ايه ؟

**الشاهد -** اعتقادي ان هناك فيه شىء فى الظلام .. ان هناك

غموض ..

**الرئيس -** تعتقد مين اللى بيبكون هذا الجيش ؟

**الشاهد -** والله كان على نويتو بصفته هو اللى ماسك العملية

دى فى امبابه اصلا ، اما هنداوى فمالوش اتصال بها ..

**الرئيس -** غير يوم الكشف ..

**الشاهد -** ماحصلش علاقة تانية .. وعلى نفسه كان بيتكلم

وفى دردشة الحديث قال لى يعنى انى اشترك .. اما كونى

اشترك ..

**الرئيس -** قال لك ان فيه فضائل حتتكون ، وهذه الفضائل

فيها جماعات ..

**الشاهد -** ما قالش غير دول اللى حضرتهم فى امبابه ..

- الرئيس** - يعنى نواة الجيش الاسلامى بدأت فى امبابه ■
- الشاهد** - امبابه دى حاجة من ضمن ..
- الرئيس** - من ضمن ايه ؟
- الشاهد** - من ضمن الجيش الاسلامى .. لما يطلبوا منهم فى امبابه يقوموا يكونوا ..
- الرئيس** - مين اللى يطلب منهم ؟
- الشاهد** - الاخوان نفسهم ..
- الرئيس** - مين الاخوان دول .. انت ؟
- الشاهد** - الاخوان اللى اعلى من على وهنداوى ..
- الرئيس** - مين هم دول يعنى ■
- الشاهد** - الكبار بتوع الاخوان ..
- الرئيس** - مين ■
- الشاهد** - الهضيبى وشلته .. هو فيه حاجة تتعمل من غير ما يعرف عنها رئيسها او المسيطر عليها ■
- الرئيس** - لازم يعرفها رئيسها ؟
- الشاهد** - لازم يعرف بها ده المعتقد ودى الحقيقة ..
- الرئيس** - دى الحقيقة ؟
- الشاهد** - ايوه لازم يعرف .
- الرئيس** - مين هم الناس المتصلين بالهضيبى وبرياسة الاخوان ؟
- الشاهد** - هنداوى .. وهنداوى يدى لعلى ..
- الرئيس** - بواسطه مين ؟
- الشاهد** - انا ماعرفشى التسلسل ..
- الرئيس** - انت تعرف على وهنداوى وبعض الاسماء التى ذكرتها .. وبعدين السلسلة من اول هنداوى لحد المسئول الحقيقى اللى هو الهضيبى .. ما تعرفش حد ■

الشاهد - لا ..

الرئيس - خالص ؟

الشاهد - لا ..

الرئيس - تعرف انه كان فيه ناس ؟

الشاهد - اعرف من على انه كان يقول دائما ان المسئولين

يلفونى هذا ..

الرئيس - يعنى انت كنت واثق ان العملية مش من بنات افكار

على او هنداوى ؟

الشاهد - مش معقول انها تكون من بنات افكار على او

هنداوى .. لازم تكون من فوق خالص اعلى من على وهنداوى .

الرئيس - باعتبارك عضو فى الاخوان ، مين اعلى جماعة فى

جماعة الاخوان ؟

الشاهد - مكتب الارشاد على طول ..

الرئيس - ومين رئيس مكتب الارشاد ؟

الشاهد - الرئيس بتاعه هو الهضيبي اللى هو رئيس جماعة

الاخوان نفسها ..

الرئيس - افرض مكتب الارشاد لم يوافق على رأى

الرئيس ؟

الشاهد - يبقى العبرة برأى المكتب وما يهمش الرئيس ..

وله الحق انه يشيله ..

الرئيس - اختلف معاه وما شالوش ؟

الشاهد - لازم يقر كلام المكتب والهضيبي واحد من ضمن

اللى فيه .. وده اللى افهمه من نفس القانون .

الرئيس - يعنى مكتب الارشاد هو المسئول عن نواة الجيش

والا الهضيبي ؟ .. انت قلت الهضيبي مرة ومكتب الارشاد

مرة ..

**الشاهد** - الهضيبي يعلمه ، اما المكتب فهو مختص بالتنفيذ  
في كل شيء ..

**الرئيس** - الادعاء ... يحب يسأل حاجة ؟

**المدعى** - لا .. مفيش حاجة .. بس عاوز اعرض على الشاهدة  
الشنطة ..

وهنا اشار البكباشي سيد سيد جاد الى شنطة اخرجها من  
بين الاحراز الخاصة بالقضية وقال للشاهد ( :

**المدعى** - دى شنطتك ؟

**الشاهد** - ايوه يا فندم ..

**الرئيس** - دى من غير بطانة ..

**الشاهد** - ايوه من الداخل .. مش كاملة ..

**الرئيس** - ايه الخطة اللى قال لك عنها على نويتو ؟

**الشاهد** - عن ..

**الرئيس** - خطة الاخوان .. فيه خطة قال لك عليها نويتو ..

خطة يقوم بها جماعة الاخوان بتاعة عمل انقلاب ..

**الشاهد** - سبق أن تكلمت فى الحقة دى امام سيادتكم ..

**الرئيس** - معلش .. قول لى مرة واثنين وتلاته يمكن

لكون ذاكرتى ضعيفة ..

**الشاهد** - معلش حاضر .. الخطة انهم يكونوا جيش

اسلامى فى قلب الاخوان .. .. هذا الجيش يتكون من فصائل

ووحداث أو جماعات ، وبصدين الغرض منه تحرير البلاد

العربية من المستعمرين .. امثال الجزائر وتونس والبلاد

العربية ..

**الرئيس** - أنا باتكلم عن خطة الانقلاب اللى كنت قلت عليها ..

**الشاهد** - أنا باقول له ايه يعنى الجيش ده .. هل انتم

مالكوش هدف آخر للجيش ده ؟ او ايه يعنى لازمة هنا

الجيش .. أو أنتم عاوزين تغيروا الحكم ! فهو كان يقول لا ..  
احنا لنا تنظيماتنا الخاصة وتشكيلاتنا في كل حنة ، ولما نعوز  
نعمل حاجة زى دى ، ماعليناش الا ان تؤيد الجيش أو الحركة ،  
لانهم هم ما يقدروش يقوموا بحاجة زى دى ..

الرئيس - جاء في كلامك في التحقيق ردا على السؤال الاتى :  
الم يذكر لك على نويتسو ماهى الخطة التى يسعى النظام  
لتنفيذها ؟ .. فكان لك جواب والجواب بتاعك كالاتى ..  
الشاهد - اتفضل ..

الرئيس - الجواب بتاعك كان كالاتى : - ان يقوم الاخوان  
جميعا بعد تدريبهم على اوسع مدى عسكريا بعمل انقلاب وهم  
الآف يريون ان يتموا اعداد انفسهم تدرييبا وتسليحا جيدا  
وبمعاونة تشكيلات الاخوان داخل الجيش ورجال البوليس ،  
وانتظارا لاشارة البدء بهذه الخطة يقوم النظام السرى الوجود  
في الاخوان بتأييد الانقلاب الذى ييسده البوليس والجيش ،  
وذلك باحتلال المنشآت العامة ، وبعد ذلك يستولى الاخوان على  
الحكم بشرط أنهم ...

الشاهد - أبوه ...

الرئيس - فاكركلام ده !

الشاهد - صح ..

الرئيس - الكلام ده مضبوط ؟

الشاهد - أبوه ..

الرئيس - اذن كنت تعرف ان هناك نظام سرى !

الشاهد - مش جيش ، بل جيش اسلامى ..

الرئيس - تقدر تكمل لى بقية الكلام ده ؟

الشاهد - أبوه .. سيادتك جيت وقلت لغاية ما يقوم

الاخوان ...

الرئيس - ويحتلوا المنشآت العامة .. ايه هي المنشآت العامة ؟

الشاهد - يعنى يساعدوا الجيش فى توطيد الحركة نفسها ۥ وبعد كده يجيبوا حد تانى من غير الاخوان ليمسك الحكم .. منهم أنفسهم ..

الرئيس - مين ؟

الشاهد - اى حد من الناس اللى يثقوا فيهم ..

الرئيس - زى مين ۥ

الشاهد - حاجة زى عزام .. حاجة من هذا القبيل ، ومحمد نجيب قالوا يبقى مكانه وبعدين تشيله لاننا مش راضيين عنه .. يعنى فيه بينهم وبينه حاجة زى كده .. مش عاوزه انا هم يصلوا الى الحكم .. لسه .. فيه مراحل بعيدة كى توصلهم الى الحكم المزعوم ..

الرئيس - ومحمد نجيب بعد ما يخلوه فى رئاسة الجمهورية يشيلوه ليه ؟

الشاهد - مش راضيين عنه ..

الرئيس - ويخلوه فى الاول ليه ؟

الشاهد - عاشان الشعب اوحاجة زى كده ... زى ما قال لى . يستنوا عليه شويه وبعدين يغيروه .. وانا ما غيرتش من اقوالى ..

الرئيس - يعنى يضحكوا عليه .. يلفوه تحت باطهم وبعدين يتركوه .. ده اسلام ؟

الشاهد - برئت من ذلك ..

الرئيس - برئت من الاسلام ؟

الشاهد - لا من ذلك .. فالاسلام نور ولا خفاء فى الاسلام ..

الرئيس - ما فيهش كذب او نفاق ؟



**الشاهد - لا ...**

**الرئيس -** وليه فضلت في الجماعة دي من سنة ١٩٣٦ ؟

**الشاهد -** لما أراد الله انى أروح مع الجوهرى واسمع الفريق

الأخر والاستاذ البهى الخولى في مسجد الرفاعى ، واسمع عن المرشد وعن انهم فصلوا وفصلوا ، بدأت انتظم في سلوكهم وانقطعت عن الجماعة ...

**الرئيس -** ايه الاستعداد اللى كانوا يعملوه علشان حركة

الانقلاب

**الشاهد -** تدريب انفسهم في الجيش الاسلامى ..

**الرئيس -** ايه التسليح بتاع الجماعة ؟

**الشاهد -** تسليح الجماعة .. كان بيقول انهم حيحبوا لكل

جماعة في فصيلة طنجتين ومدفع وثلاث بنادق ..

**الرئيس -** مدفع ايه ؟

**الشاهد -** مدفع رشاش ..

**الرئيس -** تعرف اسمه ؟

**الشاهد -** أى نوع من هذه الانواع ..

**الرئيس -** كان عندهم أسلحة ؟

**الشاهد -** والله ما شفتش .. حقيقة الامر ان على كان

يفغضب ويقول لى باستمرار . ما جابولناش اسلحة علشان

التدريب .. وبعدين قال انهم جابوا طنجتين ..

**الرئيس -** امتى الكلام ده ؟

**الشاهد -** من أكثر من شهرين .. وبعدها انا طبعى لم

اسأله في حاجة من هذا القبيل ، سوى يوم الشنطة بالليل ،

كان مارر على وكنت انا جاي من المركز العام الساعة تسعة فقال

لى حصل حادث .. حصل كذا وكذا ، فقلت له يا على انت بعث

محمود ياخذ الشنطة منى وما كان منى الا انى لطمت على وشى

واترمت على الارض ! وقلت له كده تفشنى .. حرام عليك  
خربت بيتى .. ده عندى أولاد صفار ووالدتى ..

الرئيس - ايه اللى يخلى على نويتو يضع سره فيك ؟

الشاهد - لكل شخص ان يأخذ واحد أو حد يقدر يتكلم

معه ، فكان على يجالسنى لقربى من بيته وكان كثير التردد على

.. فلما كان يشطح كده والا كده كان يتردد على ..

الرئيس - الادعاء ...

المدعى - مفيش حاجة ...

الرئيس - يوم مؤتمر الموظفين كنت فين ؟

الشاهد - انا ما عنديش تذكرة وكنت فى البيت .. كنت

قاعد امام البيت ، وجيرانى يشهدوا بذلك .

المدعى - مؤتمر الموظفين كان سابق على الحادث .. كان يوم

الخميس ..

الشاهد - والله لم اغادر البيت اطلاقا نظرا لانى كنت تعبان

وأعصابى تلفانة عقب الحادث ..

الرئيس - ليه ؟

الشاهد - لانى من بعد ما عرفت حكاية الشنطة قلت كفاية

الرئيس - انا بأسألك عن مؤتمر الموظفين .. كنت فين يوم

الحادث ؟

الشاهد - ( يفكر قليلا ) عاوز اتذكر ..

الرئيس - عاوز تتذكر ايه !

المؤتمر ده ؟

الشاهد - سيادتكم بتقول ان مؤتمر الموظفين كان قبل

كده ..

الرئيس - ( موجه كلامه للسيد المدعى ) سيبه يتكلم ..

الرئيس - علشان الحادث !

**الشاهد** - سيادتك بتقول ان ده كان قبل الحادث .. اذا كان المؤتمر قبل الحادث فانا لم انتقل من البيت .. بس انا عاوز اتذكر كان يوم ايه ..

**الرئيس** - يوم مؤتمر الموظفين ؟

**الشاهد** - ايوه .. علشان اتذكر ، وعلشان أوضح الحجة دي .. كان يوم ايه من الايام اللي قبل الحادث .. يوم الخميس أو الاربعاء ؟ علشان اقدر اقول بالضبط أنا كنت فين في الحصة دي بالذات ..

**الرئيس** - تعرف واحد اسمه ابراهيم الطيب ؟

**الشاهد** - محامي في مكتب عبد القادر عوده ..

**الرئيس** - شغلته ايه ؟

**الشاهد** - محامي .

**الرئيس** - في الاخوان بيشتغل ايه ؟

**الشاهد** - ما اعرفشى ..

**الرئيس** - هو عضو في الاخوان ؟

**الشاهد** - أنا اعرف انه من الاخوان من زمان ..

**الرئيس** - من الناس البارزين ؟

**الشاهد** - ليس لي علاقة به ، نظرا لانه في وادي وأنا في وادي

آخر ..

**الرئيس** - هو في أي وادي ؟

**الشاهد** - أنا اصلي في امبابه مش في مصر ..

**الرئيس** - امبابه بتاعتنا دي ؟

**الشاهد** - ايوه ..

**الرئيس** - أمال مش في مصر يعني ايه ؟

**الشاهد** - اقصد يعني مش في وسط القاهرة ..

**الرئيس** - هل قابلته ؟

**الشاهد -** قابلته مرة مع على نويتو لغرض .. كان هذا الغرض من ثلاثة أشهر ، كان قال لى على انا سانتظرك فى ميدان الاوبرا ، وبعدين طلعنا ورحنا على المكتب بتاعه ، فعلى خبط على الباب فطلع لنا ولقيته لابس نضارة ، وهو شاب صغير .. قعدوا يتكلموا مدة طويلة وبعدها على قال له ان يحبى اللى فى مخازن التنظيم مع حمزه الجوهري ف يظهر ان حمزه ده من الجماعة اياهم ..

**الرئيس -** من الجماعة اياهم يعنى ايه ؟

**الشاهد -** يعنى من الجماعة المختلفين مع الاخوان ..

**الرئيس -** حمزه ده اللى اخذك ووداك لابراهيم الطيب ؟

**الشاهد -** حمزه ده اللى رجعنى للاخوان .. يعنى فصلنى من الاخوان وودانى مع الاخوان التانيين البعيدين عن الهضيبي ..

**الرئيس -** الاخوان كانت منقسمة الى قسمين ؟

**الشاهد -** ايوه .. قسم مع الهضيبي ، والقسم الآخر مع الاستاذ صالح عثماوى والاستاذ عبد الرحمن البنا والاستاذ البهى ..

**الرئيس -** الادعاء .. فيه اسئلة ؟

**المنعى -** مفيش ..

**الرئيس -** والان ترفع الجلسة للاستراحة لمدة نصف ساعة .

( رفعت الجلسة فى الساعة السابعة والدقيقة الخامسة والاربعين مساء )

### اعادة الجلسة

( اعيدت الجلسة في الساعة الثامنة والنصف مساء )

الرئيس - فتحت الجلسة . . المدعى . . الشاهد الذي

المدعى - عبد الحميد البنا .

( نودى على الشاهد فحضر )

الرئيس - اسمك ايه ؟

الشاهد - اسمى عبد الحميد البنا .

الرئيس - بتشتغل ايه ؟

الشاهد - عامل بمصلحة العامل بوزارة الصحة .

الرئيس - سنك كام سنة ؟

الشاهد - ٢٤ او ٢٥ سنة . . - ٢٥ سنة .

الرئيس - تعرف ده ايه ؟

الشاهد - ايوه . . مصحف .

الرئيس - قول والله العظيم والله العظيم والله العظيم أقول

الحق ولا شىء غير الحق والله على ما أقول وكيل .

( ردد الشاهد صيغة اليمين )

الرئيس - المدعى

وكيل النيابة - ايه علاقتك بالاخوان المسلمين ؟

الشاهد - من الاخوان يافندم .

وكيل النيابة - فى اى شعبة ؟

الشاهد - وراق العرب .

وكيل النيابة - من امتى ؟

الشاهد - بقالى حوالى تسعة اشهر .

وكيل النيابة - انضميت للنظام ؟

الشاهد - ايوه يافندم .

### وكيل النيابة - وازاي انضميت .. وليه .. قول للمحكمة !

**الشاهد -** من مدة شهرين حضر على نويتو وقال احنا عاوزين منكم اسرة تحفظ سورة آل عمران وتفسرها .. وكنا نجتمع كل اسبوع ونحفظ ثلاث آيات وتفسرهم .. وبعد ثالث اجتماع على نويتو قال لى انتقل من الشقة الى الت فيها لاننا عاوزين اودة ثالثة فانتقلت من الشقة الى انا فيها لاني متزوج جديد الى شقة مكونة من اودتين وجه على نويتو ومعه واحد ماعرفوش .. وقمت اعمل لهم الشاى وعبال ما عملت الشاى كانوا بيتحدثوا مع بعض فقال لى الاودة دى بتساعة الفرش والاودة الثانية ليست بتطبخ فيها .. فقلت له ايوه .. فقال لا المكان مايصلحش وبعد كده بعشرة ايام او اسبوع .. ارسل لى على نويتو سبت وطلع منه حاجات ورصها فى صندوق وقال لى دى حاجات فاضية ماتخافشى منها .. وبعدها باسبوع ارسل لى اخوه حامد نويتو ومعه شنت قماش فيها قطعتين وقاللى على اخويا قال لى حطهم جنب الحاجة الثانية .. ويوم السبت قبل حادث الرئيس كنت مريض فارسلت خطاب للمصلحة للكشف الطبى على ولما علموا الاخوان زارونى يوم الاثنين وصلاح خليفة كان ضمن الى جم هم وعلى .. جم زارونى .. فعلى قال له مفيش حاجة وصلت المنطقة لحد دلوقتى . فقال له صلاح لا .. وانا حاولت الاتصال بعلى ماعرفتش .. وبعد مامشيوا بنصف ساعة ارسل لى على اخوه حامد فقال لى احنا عاوزين عشر ظروف من صنف الظرف ده .. فقلت له انا ماعرفشى .. فدخل تقاهم من الحاجات الى كانوا جايينها .. الكلام ده يوم الاثنين .. ويوم الثلاثاء قبل حادثة الرئيس الساعة ثمانية الا ثلث جاب ظرف من الصنف ده واخذ عشرة تانيين .. وبعد ذلك يا حضرة الرئيس

لم يتصل بى حامد أو على وأنا مريض وملازم الفراش لحد  
ماجت مباحث الجيزة وقبضت على واخذت الحاجات .

وكيل النيابة - امتى جابوا الاسلحة ؟

الشاهد - قبل الحادث .. فى سبعة اكتوبر تقريبا بعد  
ما سكنت فى الشقة بحوالى ٩ أيام .

وكيل النيابة - انت فى مجموعة رئيسها مين ؟

الشاهد - صلاح خليفة .

وكيل النيابة - ايه غرض المجموعة ؟

الشاهد - والله يا حضرة الرئيس ما اعرفش .. وهما

قالوا المطلوب حفظ سورة آل عمران وتفسيرها .. واجتمعنا  
مرتين وحفظنا بعض آيات ..

الرئيس - المجموعة دى كانت علنية او سرية ؟

الشاهد - علنية .. وكنا بنجتمع فى بيت أحد الاخوان ..

الرئيس - الشعبة كانت تعرف ؟

الشاهد - ابوه والتعليمات كانت حفظ القرآن .

الرئيس - والسبت .. كانت الشعبة تعرفه ؟

الشاهد - لا على قال لى ما تفهمشى لواحد من الاخوان ودى

حاجة ما يعرفهاش الا انا وانت وهنداوى .. ولحد الآن ما

حديث من الاخوان يعرف عنها اى حاجة .

وكيل النيابة - ما سالتش ايه الفرض ؟

الشاهد - قال دى حاجات كلها فاضية ومتخافش .

وكيل النيابة - كانت ازاي ؟

الشاهد - حاجات ملفوفة فى ورق جرايد .

وكيل النيابة - شكلها ايه ؟

الشاهد - كانت ملفوفة فى ورق جرايد .

وكيل النيابة - مفتحتهاش ؟

**الشاهد -** هو رصها بإيده في الصندوق ■

**وكيل النيابة -** ما قالكش انها خطرة ؟

**الشاهد -** لا هو قال كلها قزاير فاضية متخافشي منها ■

**وكيل النيابة -** عرفت امتى انها اسلحة ■

**الشاهد -** لما ضبطت .

**وكيل النيابة -** مش قبل كده جه حامد وأخد عشرة أظرف .

**الشاهد -** أيوه عرفت ان فيها ظروف لما جه ومعاه ظرف

وقال عاوزين من الصنف ده .. وفك علبة من اللعب وأخد  
أظرف .

**وكيل النيابة -** شفت ايه ؟

**الشاهد -** لفف محظوظة في الصندوق ■

**وكيل النيابة -** ما شفتش قنابل وقوالب جلجنايت ■

**الشاهد -** لا ما شفتش .. هي كانت ملفوفة في ورقها زى

ما هي .

**وكيل النيابة -** ضبط عنده خمس قنابل يدوية من طراز

ميلر .. و ١١ انبوبة حارقة وقوالب مواد متفجرة ولغم متفجر

وحزام دمور بشریط فيه ١٠ أصابع جلجنايت .. وبين المجموعتين

حجر بطارية واجهزة للتفجير ومدفعين وادواتهم و ٣٤٦ طلقة

من عيار ٩ مللى من نوع الطلقات التى استعملت في الحادث ■

**الرئيس -** أول اجتماع حدث امتى ؟

**الشاهد -** بقاله حوالى ٤٥ يوم ..

**الرئيس -** كان فين ■

**الشاهد -** في منزل عبد القادر حنفى سلمان ■

**الرئيس -** مين حضره ؟

**الشاهد -** كل المجموعة ■



**الرئيس** - اتكلمتم في ايه . ؟

**الشاهد** - حفظنا ٤ آيات من آل عمران .

**الرئيس** - ما تكلمتوش في حاجة خاصة بالاتفاقية !

**الشاهد** - جالنا منشور بعنوان لن تمر الاتفاقية .. وجه

منشور خاص بالرئيس محمد نجيب وآنه طلب ان يطلع على  
المعاهدة وما وافقوش .. وفيه شوية كلام كمان وانا راجل  
عامل ما افهمش .

**الرئيس** - صلاح ما قلش الاتفاقية بطالة وله طعن عليها .

**الشاهد** - صلاح سأل عن المنشور اللى بعنوان لن تمر

الاتفاقية فلماذا الاتفاقية حتمضى .. فقال على احنا الاخوان  
المسلمين ٢ مليون يا اما ياخذوا برأينا يا اما ما ياخذوش .

**الرئيس** - وبعدين .

**الرئيس** - وبس .

**الرئيس** - لما سألتو صلاح احنا فايدتنا ايه ...

**الشاهد** - صلاح ؟

**الرئيس** - أو على فقال لكم انتم جماعة احتياطي .

**الشاهد** - سأل صلاح على فقال انتم جماعة منظمينكم

ومفيش حاجة جات لنا عنكم .. استمروا في القرآن والتفسير  
لان دوركم لم يات .

**الرئيس** - انت قلت في التحقيق انه قال لكم يا اما تشتركوا

أولا ...

**الشاهد** - نشترك في ايه ؟

**الرئيس** - مش ده كلامك وقلت انك قلت لصلاح انكم غير

مدربين عسكريا .

**الشاهد** - نعم يافندم .. حضرتك عايز تقول ايه ؟

**الرئيس -** حضرتي عاوزك تتكلم .. وانت مش قلت له احنا مش مدربين علشان ايه ؟

**الشاهد -** مش أنا اللي قلت له .

**وكيل النيابة -** ما قالش صلاح خليفة او على نويتو ان فيه خطة ضد الحكومة لمنع توقيع الاتفاقية او القيام بعمل .

**الرئيس -** ما قالش انتم جيش اسلامي تعتمد عليه الجماعة وقت الحاجة .

**الشاهد -** هو قال لي احنا ٢ مليون يااما ياخذوا براينا اولاً .

**الرئيس -** الجماعة اللي كانت بتقعد برئاسة صلاح كانت بتعمل ايه ؟

**الشاهد -** احنا اجتمعنا ثلاث اجتماعات ... اجتماعين حفظنا فيهم قرآن وفي الاجتماع الثالث جانا المنشور بتاع لن تمر

الاتفاقية وبعدين الاجتماع اللي فيه المنشور بتاع محمد نجيب .  
**الرئيس -** مين اللي كان مدرب عسكري ؟

**الشاهد -** صلاح خليفة ومحمد الغريتل وصفوت سيدهم وأنا .

**الرئيس -** وانت اتدربت فين ؟

**الشاهد -** في معسكر الحرس الوطني .. قعدت حوالي ٢٦ يوما .

**وكيل النيابة -** انت قررت في التحقيق ان المفروض ان السلاح سيستعمل في تكوين جيش اسلامي في الثورة الشعبية اذا تلقى الاوامر بذلك .

**الشاهد -** ازاي ما اعرفشي السلاح وازاي اقول كده واقول انه حيستعمل في ثورة .

**الرئيس -** انت قلت في مرة ثانية اننا كنا في منزل عبد القادر سلمان وكان صلاح معاه منشورات في الشنطة ووزع علينا هذه

المنشورات وفهمنا هذه المنشورات وان فيها عدة بتود .. البند الاول ان الاخوان مستعدين للقيام بثورة شعبية وانهم حيمعلوا زجاجات عادية تعباً بمواد وتلقى اثناء المعركة وفيه اخوان مستعدين بالسلاح .. هذا الاجتماع قبل الحادث بأسبوع - وقلت ان على نويتو قال ان شاء الله ثورة موفقة وان صلاح قال ازاي الاسلحة مجتش للآن .. احنا مفيش عندنا اسلحة ولا سكاكين .. فاذا اعتقلت نعمل ايه .. فقال نهرب واذا ما قدر توش يضع الواحد كل حاجة في بيته من اثاث خلف الباب لمنع الدخول حتى ياتي باقي الاخوان للمساعدة وضرب البوليس .. مشده كلامك .. ما تطولش معانا خرينا نخلص .. مش دي اقوالك اللي انت ماضى عليها قول الكلام اللي انت عايز تقوله .

**الشاهد -** على نويتو قال كده لما حضر المنشور الاخير وفيه منشور صغير وبتسأله الاخوان عليه .

**الرئيس -** لما انت عارف كده ماتكلم .

**الشاهد -** قالوا له ازاي حتقوم بثورة شعبية واحنا ما عندناش حاجة .

**الرئيس -** ما قالش علشان ايه الثورة الشعبية . ؟

**الشاهد -** قال حتيجي الاوامر من المنطقة .

**الرئيس -** علشان ايه .. ؟ أنت مش عضو في الاخوان وهو قال حتعملوا ثورة شعبية ما سالتش ليه ؟

**الشاهد -** ما سالتش .

**الرئيس -** فيه واحد ينضم لثورة شعبية ما يعرفش غرضها .. انت معذور يا ابني انت عامل .. ويمكن كمان تجهل القراءة والكتابة .

**الشاهد -** والله صحيح .

**الرئيس -** كنت بس بتشيل اسلحة ؟

**الشاهد** - قالوا ان فيه ثورة شعبية وافقت عليها الجماعة وطبعا مش حتشترك الا لما تيجى الاوامر ..

**الرئيس** - انت مش عارف تتكلم .. كنت بتحفظ دين ازاي .. وكنت بتحفظ آل عمران ازاي

**الشاهد** - كنا بنحفظ ٧ أو ٨ آيات فى الاسبوع .

**الرئيس** - عارف معنى الايات اللى انت حفظتها ؟ تقدر تقول لنا آية واحدة منها ؟

**الشاهد** - زى ايه

**الرئيس** - حاجة من الحاجات اللى حفظتها .

**الشاهد** - زى ايه ؟

**الرئيس** - الادعاء فيه أسئلة تانية

**المدعى** - حد طلب انك تحتفظ بزجاجات فاضية فى بيتك

**الشاهد** - على قال كل واحد يحفظ زجاجتين فاضيين .

**المدعى** - علشان ايه

**الشاهد** - معرفش .. وواحد قال ان كان على القرايزنشتري

ماية او مايتين - فقال ان كان يحصل شرا بلاش .

**الرئيس** - مين اللى كان بيحبيب المنشورات

**الشاهد** - على قويتو .

**الرئيس** - ومين تانى ؟

**الشاهد** - وصلاح خليفة .

**الرئيس** - اتفقتم انكم تسموا انفسكم بغير اسماءكم الحقيقية

**الشاهد** - لا ..

**الرئيس** - تعرف محمود عبد اللطيف

**الشاهد** - ايوه .

**الرئيس** - تعرفه منين ؟

**الشاهد** - من اخوان اميابه وجالتنا فى حفلة الفطار فى رمضان

الى فات .

الرئيس - تعرفه من امتى |

الشاهد - من ٧ - ٨ شهور

الرئيس - صاحبه ؟

الشاهد - لا .

الرئيس - انت متبرى منه ؟

الشاهد - انا ما اعرفش حتى بيته .

الدفاع - انت كنت فى الجهاز السرى بتاع امبابة .. كان

عددكم كام |

الشاهد - انا من الوراق وما اعرفش حاجة عن الجهاز السرى

الدفاع - قالوا لكم جيش اسلامى ..

الشاهد - احنا مجموعة وراق العرب .

الدفاع - برياسة مين |

الشاهد - صلاح خليل

الدفاع - وهنداوى تعرفه ؟

الشاهد - رئيس المنطقة فى امبابة .

الدفاع - المجموعة بتاعتكم كام ؟

الشاهد - سبعة .

الدفاع - تبقى احدى المجموعات .

المسئ - هل تذكر السبب فى تسليح المجموعة |

الشاهد - ما حصلش تسليح .

( انصرف الشاهد )

( مثل الادعاء البكباشى ابراهيم سامى جاد الحق والاستاذ

عبد الرحمن صالح )

الرئيس - الشاهد الذى يليه .

المسئ - السيد عبد الله الرئيس

( نودى على الشاهد فحضر )

الرئيس - اسمك ايه ؟

الشاهد - السيد عبد الله الرئيس

الرئيس - سنك كام سنة ؟

الشاهد - ٢٦ سنة .

الرئيس - بتشتغل ايه ؟

الشاهد - طالب في كلية الاداب .

الرئيس - في سنة كام ؟

الشاهد - في آخر سنة .

الرئيس - قل والله العظيم والله العظيم والله العظيم أقول الحق ولا شيء غير الحق والله على ما أقول شهيد .

( اقسم الشاهد اليمين )

الرئيس - المدعى .

وكيل النيابة - هل انت عضو في جماعة الاخوان المسلمين ؟

الشاهد - نعم انا عضو في جماعة الاخوان المسلمين ؟

وكيل النيابة - منذ متى ؟

الشاهد - منذ سنة ١٩٤٦

وكيل النيابة - في اى شعبة انت ؟

الشاهد - في شعبة بين السرايات .

وكيل النيابة - هل ما زلت بها ؟

الشاهد - نعم

الرئيس - الى الان ؟

وكيل النيابة - الم تكن في منطقة اخرى ؟

الشاهد - لا .

وكيل النيابة - مالكنش اى نشاط في شعبة اخرى ؟

الشاهد - لا .

**وكيل النيابة -** ألم تكن في وقت ما في منطقة عرب جهينة ؟  
**الشاهد -** نعم .

**وكيل النيابة -** ماذا كنت تعمل بهذه الجهة ؟

**الشاهد -** كنت أعمل في النظام السرى للاخوان المسلمين .  
**وكيل النيابة -** أشرح هذا النظام للمحكمة .

**الشاهد -** حينما كنت في شعبة بين السرايات وحدثت مشكلة الاستاذ المرشد العام وبعدين رحنا عند المرشد العام نسأله عن سبب فصل عبد الرحمن السندى وزملائه عاتبنى شخص يدعى محمود يونس عن هذا العمل وتعرفت به والحقنى بالنظام السرى فى عرب جهينة وكنت اعمل مع سبع اشخاص وزارنا فى عرب جهينة ابراهيم الطيب وقال لنا فى هذا الاجتماع اننا سنتخذ موقف ايجابى من الحكومة فسألته لماذا سنتخذ هذا الموقف فقال لأحد سببين عشان نعرفل المعاهدة من ناحية ومن ناحية ثانية اذا الحكومة حلت الاخوان نتخذ هذا الموقف الايجابى فبدأت أفكر من ذلك الحين فى هذه السياسة ثم بعد ان غادر ابراهيم الطيب عرب جهينة جاء الحاج محمود يونس وقال ان فيه تنظيم جديد سرى سيعمل للفصائل والجماعات وكل فصيلة من اربعة اشخاص والجماعات من ثلاث اشخاص مقاتلة وقال لى انت تبقى قائد الفصيلة وبعد ذلك كلفنى ابراهيم الطيب ان اجرد الاسلحة الموجودة لدى الاخوان المسلمين وفى هذه الاثناء بدأت افكر لماذا هذا العمل وجردت الاسلحة الموجودة فى عرب جهينة وكفر حكيم والدقى وهناك وجدت اسلحة فى الدقى اثارى انتباهى لماذا توجد فى شقة وسط القاهرة ؛ كل هذه الاشياء اثارى انتباهى ، وكلفت بنقل اسلحة الى حلوان والمعادى فنقلتها فعلا وبدأت أفكر جديا فى هذه السياسة فكتبت

خطابا الى ابراهيم الطيب ليرفعه الى الاستاذ المرشد عن هذه السياسة وناقشت الامر من وجهة نظرهم ووجهة نظرى وخرجت بالثلاث نتائج الآتية :-

**الاولى -** الا نتخذ موقف ايجابى من الحكومة وان نقول رأينا في المعاهدة رأى حر وأن تكون المعركة معركة رأى .  
**والثانية -** ألا يكون رأى الاخوان رأيا ملزما لأننا لسنا أغلبية في البلاد .

**والثالثة -** ان هناك فترة انتقال حددتها الحكومة وستنتهى وبعدها سيجرى انتخابات وسيعقد مجلس النواب وفي الحياة الدستورية المتبع ان القوانين التى تصدر فى غيبة البرلمان تعرض على أول برلمان يعقد فلو أخذنا أغلبية فلا مانع أن نقول رأينا في المعاهدة بصراحة ولم ازد فى هذا الخطاب عن هذا . ثم رد على ابراهيم الطيب عن طريق حسين شعبان وقال لى هل انت مستعد لتنفيذ غير ما ارسلته فى خطابك . فاثارتنى هذه العبارة فقلت له فى الخطاب الاخر الذى ارسلته الى ابراهيم الطيب اننا لا يمكن ان يكون هناك رأى ولا يناقشه احد ، ولا بد ان يناقش الامور بالحب والصفاء ونخرج بحل يشرف الدعوة ويحفظ هذه الدماء التى ستسيل واصريت على مقابلة الاستاذ المرشد لشرح الموقف وقلت له فى اخر خطاب انى اعتكف فى المنزل حتى اقابل الاستاذ المرشد ثم اعتقلت فى ٤ اكتوبر سنة ١٩٥٤  
**وكيل النائب العام -** متى بدأ التنظيم الجديد للنظام السرى فى الجماعة ؟

**الشاهد -** منذ حوالى خمس شهور .  
**وكيل النائب العام -** وما هو الغرض من التنظيم الجديد ؟  
**الشاهد -** لغاية ما اعتقلنا لم يقل لنا احد الغرض منه . وانما فهمت ان التطور الطبيعى للنظام السرى للاخوان المسلمين هو



عرقلة المعاهدة أو أن نتخذ موقف ايجابي اذا حلت الحكومة  
الاخوان .

**وكيل النائب العام -** ماهو الغرض من التنظيم الجديد في  
الفترة الاخيرة ؟

**الرئيس -** تنظيم الجهاز السرى .

**الشاهد -** هو كان استمرار أو اعادة تنظيم جديد .

**الرئيس -** اعادة تشكيل .

**الشاهد -** لم يقال لنا الغرض من ذلك .

**الرئيس -** ماهو الغرض الذى تستهدف به الجماعة من ايجاد  
النظام السرى - انت قلت فى صدر الكلام انك احد أعضاء الجهاز  
السرى فباعتبارك مشترك فيه ماهى الاغراض من وجوده ؟

**الشاهد -** حينما عدت من فلسطين كونونا الى مجموعات ، كل  
مجموعة من خمسة أشخاص ولم نعرف من سنة ١٩٤٩ او اواخر  
١٩٥٠ لغاية ماذهينا الى معركة القنال اننا من الجهاز السرى الا  
عند سفرنا الى القنطرة لمحاربة الانجليز فى هذه الليلة فقط عرفنا  
اننا من الجهاز السرى للاخوان - والله على ما أقول شهيد - وحينما  
عدنا بقينا فى هذه المجموعات . وانا كشاب لم افعل فى حياتى  
ما يضر بلدى ولم أكن اتصور الا حينما بدأت الاسلحة توزع اننا  
سننتخذ موقف ايجابي أو ان الشعب سيحارب بعضه ولم أكن  
اتصور مطلقا هذا وبدأت افكر فى هذه السياسة ثم بعد ذلك  
بدأت اعارضها بكل شدة .

**وكيل النائب العام -** وضع للمحكمة اجزاء الفصيلة التى كنت  
ترأسها فى عرب جهينة يعنى اسمها ورؤساء المجموعات وما تعلمه  
من الاعضاء بصفتك كنت قائد لهذه الفصيلة ؟

**الشاهد -** لقد وضحت هذا فى التحقيق وساذكر ما تذكره الان .

انا كنت قائد الفصيلة ورديفى محمد الديب وكان قائد الجماعة الاولى شخص يدعى سيد ناصر وقائد الجماعة الثانية محمد سليمان الهضيبي وقائد الجماعة الثالثة احمد الصاقورى وقائد جماعة الخدمات امام حجر وهناك اشخاص آخرين مذكورين فى المحضر .

**وكيل النائب العام -** ذكرت الان احمد الصاقورى وسيد ناصر وامام حجر وقلت اسماعيل سليمان الهضيبي . فهل كان اسماعيل الهضيبي احد رؤساء المجموعة الرابعة او له وظيفة اخرى ؟  
**الشاهد -** وظيفته مخزنجى وقائد جماعة المخبرات .  
**وكيل النائب العام -** فمن اذن قائد الفصيلة الرابعة ؟  
**الشاهد -** محمد سليمان انا ذكرت سيد ناصر ومحمد سليمان واحمد الصاقورى وامام حجر

**وكيل النائب العام -** وما وظيفة امين درويش مأمون ؟  
**الشاهد -** سيد ناصر اخذوه مننا وجاء مأمون درويش مكانه .  
**وكيل النائب العام -** هل تعرف افراد هذه المجموعات وفى هذه المنطقة بالذات ؟

**الشاهد -** انا قلتها فى التحقيق واذكر منهم محمد امام ابراهيم وسعيد عماره وعبد الوهاب البحرى وعبد السلام عماره ورضوان عزام زريق ومحمد بدر الدين قصبى وسيد المشتولى واحمد شعلان ودول اللى فاكرهم مع انى ذكرت ١٨ اسم فى التحقيق .  
**الرئيس -** مين اللى جند دول ؟  
**الشاهد -** محمود يونس .

**الرئيس -** هل كان يرأس هذه الفصيلة قبلك ؟  
**الشاهد -** احنا قسمناهم مع بعض ولا اعرف هل كانت هذه الفصيلة موجودة قبل هذا اولا ؟  
**الرئيس -** من الذى جمع لك هذه الاسماء ؟

**الشاهد -** محمود يونس .

**الرئيس -** وراح فين بعد كده ؟

**الشاهد -** كان اسماعيل عارف هو اللى يعطينا الاوامر لانه

كان المسئول عن الاتصال بقيادة الفصائل .

**وكيل النائب العام -** والقيادة لمن ؟

**الشاهد -** لابراهيم الطيب وهو اتصل بى شخصيا . وانا

بلغت عن جميع المخازن وقادة الفصائل التى اعرفها وذلك بعد ان

اقتنعت انه لابد من حقن الدماء وخشية ان الشعب يضرب فى

بعضه .

**الرئيس -** ولما تريت على الفصيلة ما عرفتش ايه واجباتها ؟

**الشاهد -** كنا بتتدرب ولم يصدر لنا اى امر والله على ما اقول

شهيد ، اما ما هى مهمتنا او جنعمل ايه فحتى ان اعتقلنا فوالله

والله على ما اقول شهيد لم يرد علينا بجواب وهذا مما دفعنى على

ان اكتب هذا الخطاب الذى كتبتة .

**وكيل النائب العام -** انت بررت وجود النظام السرى قبل

الثورة فما معنى وجود سرية هذا النظام المسلح فى عهد الثورة ؟

خاصة وقد اعيد تنظيمه منذ ٥ شهور كما ذكرت ؟

**الشاهد -** انا كمواطن طبعا لى عقل افكر وطبعيا لم اعمل او

افعل مايضر بلدى ولن افعل مايضر بلدى وهذا مما دفعنى الى

الاعتراف على من اعتدوا على سيادة الرئيس واعتقدت انهم

« يلبخوا » حينما سألت عن هذه الاشياء وقتها بصراحة ، والذي

كنت افهمه هو اننا نخدم البلد وقد نحارب الانجليز

وقد .. وقد .. وقد ..

**وكيل النائب العام -** اذا تمشيننا معك بالرغم من انك خرجت

عن السؤال ومع اعتقادك ان الغرض من وجود النظام السرى هو

محاربة الانجليز ، فهل قصرت الثورة فى حق البلد من هذه الوجهة

حتى يستلزم الامر وجود نظام سرى مسلح في جماعتكم ■  
**الشاهد** - تنظيم الفصائل كان موجود قبل المفاوضات ، وعلى  
اية حال رأى الاخوان كان رأى جماعى وقالوا اننا غير موافقين على  
المعاهدة انما مش رأى افراد ولا اعتقد ان الثورة قصرت في حق  
البلد .

**وكيل النائب العام** - انت مش عارف ان فيه تدريب للحرس  
الوطنى فهل كان هذا التدريب سرى او علنى وسمح فيه لكل  
الافراد بالاندماج ، وهل كانت هناك استعدادات للمعركة اذا لم  
يتم الاتفاق أولا فما الذى دعاكم الى انشاء هذا النظام السرى ■  
وخاصة في العهد الاخير الذى وضعتموه ؟ ألم تكن هناك  
مفاوضات كانت على وشك الانتهاء بالاتفاق فما المقصود اذا من  
عمل مثل هذا الجهاز السرى ؟

**الشاهد** - انا في هذا برضه كمواطن كنت احب الخير لبلدى  
ومش معقول اشترك كما ذكرت في شئ يضر بلدى .  
**الرئيس** - ماهو هدف الاخوان المسلمين الذى من اجله وجدت  
النظام السرى ؟

**الشاهد** - ذكرت فيما قبل ان ابراهيم الطيب قال حاجتين  
وهى اننا سنحارب الانجليز ونعرقل المعاهدة والثانية اذا الحكومة  
حلت الاخوان فنتخذ منها موقف ايجابى وانا شخصا لم اوافق .  
**الرئيس** - كان جماعة الاخوان تبلورت في شيئين الاول  
اذا ما كانش فيه معاهدة يبقى ماكانش فيه اخوان مسلمين لان  
الاخوان هدفهم عرقلة المعاهدة .

**الشاهد** - الجماعة لها رسالة وهى نشر الاسلام .

**الرئيس** - وجهاز سرى .

**الشاهد** - الحالات التى يجوز شرعا فيها قتل المسلم هى

الزنا . .

**الرئيس -** لا داعى لهذا لان احنا شفتنا الى علموه لكم عن الاسلام انما انا باسأل هل تعليم الاسلام يكون بواسطة انشاء جهاز سرى مقسم الى فصائل ومخابرات واسلحة وجهاز سرى ومخازن تجرد ورئاسات وسرية هل هذه هى الدعوة الاسلامية ■  
**الشاهد -** لا

**الرئيس -** اذن ما هو الغرض من ايجاد هذا النظام باعتبارك انك اخ مسلم ومتعلم وانت من رؤسائه ، فليه هذا النظام كان موجو في هذه الجماعة ؟

**الشاهد -** انا فهمت الآن انه غلط وفهمى قبل كده كان خطأ  
**الرئيس -** قل لنا فهمكم قبل الآن كان ايه ■

**الشاهد -** الى كنت فاهمه ان هذا النظام لمصلحة الوطن لحرب الانجليز او اى حاجة بعيدة عن البلد ولم اكن افهم اطلاقا اننا نضر البلد .

**الرئيس -** اذا كنت عايز تحارب الانجليز فما هى الفكرة في انك تعمله جهاز سرى، مكنش علنى ليه ؛ مع ان فيه منظمات عملتها الحكومة علنية زى الحرس الوطنى ، فليه السرية ومتى تجوز ؟

**الشاهد -** السرية تجوز كما علمت من التاريخ وانا شاب في قسم التاريخ بكلية الاداب انها تجوز للثورة او اى شىء من هذا القبيل .

**الرئيس -** لتغطية موقف ، وهذا الموقف غير مصرح به فايه الموقف الى عاوزين تغطوه ؛ هل هو دعوة الدين اظن مفهش هنا هل هو محاربة الانجليز برضه مش عاوز تغطية فاذا كان لا هذا ولا ذلك فايه هو الموقف الذى انتم عاوزين تغطوه ويحتاج الى السرية وانت متعلم وفي الليسانس قسم التاريخ قل لنا ما الداعى

واحنأ نحب نسمع بقدر ماتفرضه عليك تعاليم الاسلام من  
صدق وامانة .

**الشاهد** - انا كما ذكرت من قبل يجوز انا كنت فاهم غلط .

**الرئيس** - مين فهمك غلط ■

**الشاهد** - قيل لنا حينما كنت في المجموعات انا نستعد  
لمحاربة الانجليز في القتال وفي النظام السابق كل الشعب خرجت  
الى القتال فاطمئنت الى انا نعمل لمصلحة الوطن .

**الرئيس** - حرب القتال ما كانش فيها سرية وكنتم بتمونوا  
بالاسلحة وكانت الاسلحة الى بتروح لكم بدل ما توردوها  
القتال كنتم تخزنوها .

**الشاهد** - والله انا لا اعرف شيئاً عن هذا وانا مكنتش لغاية  
حركة القتال اعرف انى في النظام السرى .

**الرئيس** - انت مكنتش تعرف انك في الجهاز السرى وبعد  
ما عرفت .

**الشاهد** - بعد هذا فهمونا انا بنعمل لمصلحة البلد وخرجنا  
قبل هذا الى محاربة الانجليز في القتال .

**الرئيس** - ايه مصلحة البلد دى . حاجة تتاكل او تشرب  
عاوز اعرف ايه معنى كلمة مصلحة البلد اشرح لى ايه مصلحة  
البلد ومدى انطباق هذا على التنظيم السرى المسلح وايه الدعوة  
الاسلامية هذه الاشياء الثلاثة لا يمكن فكهم من بعض فيبينهم لى .  
**الشاهد** - ... ( لا يجيب )

**وكيل النائب العام** - اذن سأتلو اقوالك الآن امامك وهى التى  
قلتها فى التحقيق امس فقد سئل عما هى أهداف هذه  
النظام السرى المسلح والذي لم ينشأ الا منذ خمسة شهور  
فأجاب ■ بان ابراهيم الطيب عندما زار شعبة جيهينة وكان

هناك الصاقوري ومحمد سليمان الهضيبي وأمين درويش في منزل اسماعيل الهضيبي بعد العصر قال اننا يمكن نتخذ اجراءات ايجابية ضد الحكومة لعرقلة الاتفاقية التي كانت المفاوضات جارية بشأنها وكذلك اذا حلت الحكومة الاخوان نتخذ ضدها اجراءات ايجابية لذلك صدرت بعد ذلك تعليمات التي بلفها لنا محمد يونس بتشكيل الجهاز السرى المسلح فلما اردت ان استفسر منه عن معنى الاجراءات الايجابية فافصح وقال تعرقل اتمام الاتفاقية وذلك اما بضرب الانجليز او عمل ثورة مسلحة للقضاء على الحكومة الحاضرة » .

اظن الاهداف حددها ، ( موجها كلامه للشاهد ) هل هذه اقوالك ؟

**الشاهد - ايوه**

**الرئيس -** انت قلت في الخطاب الذي ارسلته الى ابراهيم الطيب « انه اذا لم يكن هناك قوة في الجيش او البوليس فان مأساة سنة ١٩٤٨ ستتكرر لان الشعب دائما مع القوى ولا وعى له ولا نضوج وفي رأيي اذا كان الوعي في داخل نفوسهم فانه لا يتعداه الى الخارج لذلك فهو سيقف موقف المتفرج ويصفق للغالب » هذا الكلام الذي ورد في خطابك تقدر تفسره لنا وما كان يدور في خلدك عند ما ذكرت القوة التي في الجيش او البوليس .

**الشاهد -** انا كان غرضي الاول من ارسال هذا الخطاب ان يكون هناك ود بين الحكومة والاخوان وما يكنش فيه حزازات .

**الرئيس -** لكن هذا يتنافى مع ما قلته في هذا الخطاب من انك عاوز تعمل بينك وبين الحكومة معركة راي حروان تقول بكل صراحة رايك وتتحمل نتائجه ؛ هذا اولاً وثانياً اقريت ان هناك معركة بينك وبين الحكومة ولكن عاوز تقلبها الى معركة راي حر

ومش عايز تبدأ بالعدوان .

**الشاهد -** كان غرضى الا اعتدى لان الاسلام لا يقر الاعتداء .

**الرئيس -** يعنى انت مش عايز تبدأ بالعدوان الى أن تكون قوة فى الجيش أو البوليس حتى لا تتكرر مأساة سنة ١٩٤٨ يعنى يا أستاذ يابتاع الاداب ان ده مش مسالمة . يا اخوانا شوية منطق بين لنا بصراحة وببساطة .

**الشاهد -** قلت لحضرتك قبل هذا سبب كتابة هذا الخطاب من وجهة نظرى حيناً أو من وجهة نظرهم حيناً آخر وهو الا يكون هناك صدام هذا كل الذى أقصده من كتابة هذا الخطاب .

**الرئيس -** لكن هذا ينفى كلامك فى رابعا وهى ان « القوة التى فى ايدينا لاتكفى فى رأى لاحداث شىء كبير وقد تؤدى بعض الاعمال ولكنها لن تستمر ان لم يكن كما قدمت آنفاً - لنا قوة فى الجيش أو البوليس » دى وجهة نظر مين ؟ لان ساعة تقول دى وجهة نظرى وساعة تقول وجهة نظرهم ، عاوزين نعرف دى وجهة نظر مين فيكم ؟

**الشاهد -** الواحد لما يعرف نفسه ضعيف يجب الا يدخل معركة وقلت لحضرتك بعد هذا انهم عايزين يعملوا معركة مسلحة اذا الحكومة حلت جماعة الاخوان المسلمين .

**الرئيس -** آه .. معركة ايه اللى انت عايز تدخلها مع الحكومة

**الشاهد -** اذا الحكومة حلت الاخوان .

**الرئيس -** تحلها ليه . ليه منتظرين الحل ؟

**الشاهد -** انا افرض فرض ؛ وكل هذا الفرض فرضته بينى وبين الله والله لم أقصد الا كده والله ما أقصد شىء ابدا .

**وكيل النائب العام -** تمشى شوية فى أهداف الجهاز السرى قلت ان فصيلتك التى ترأسها انها تتلقى الاوامر من ابراهيم



الطيب عن طريق اسماعيل عارف . فهل يتصرف ابراهيم الطيب في شئون هذه الجماعة أو في هذه الفصائل السرية تلقائيا من نفسه دون رئاسة ؟

لقد سألناك هذا السؤال وأجبت عليه .

**الشاهد -** ابراهيم الطيب لا يمكن أن يتصرف من نفسه ولا بد فيه رئاسة أعلى .

**وكيل النائب العام -** مین

**الشاهد -** لا اعرف ولا بد أن تخضع لتعليمات الاستاذ المرشد .

**وكيل النائب العام -** اذا أصدر ابراهيم الطيب تعليمان الى رئاسة الفصائل للقيام بحركة مسلحة فهل في مكنته اصدار مثل هذا الامر دون أن يكون معه امر من رئيس أعلى أو من المرشد .  
**الشاهد -** بحسب تسلسل القيادة لازم أخذ امر قبل هذا .  
**وكيل النائب العام -** انت قلت في الحقة دى أن المرشد اصطدم بعبد الرحمن السندي وأعلن أن لا سرية في الدعوى ؛ وانتهى الامر بفصل عبد الرحمن السندي لانه اختلف مع المرشد وأبى أن يخضع لقيادته . فما هو السر في أن يلجأ المرشد مرة أخرى الى تشكيل جهاز سرى آخر بأفراد وبنظام جديد ؟

**الشاهد -** السر في كده انه عاوز يسيطر على الجهاز ..

**وكيل النائب العام -** جهاز ايه ؟

**الشاهد -** الجهاز السرى .. وهو أعلن ذلك من قبل ثم فصل عبد الرحمن السندي وشكل الجهاز ..

**وكيل النائب العام -** ايه الغرض ؟

**الشاهد -** يسأل الاستاذ المرشد في هذا ..

**وكيل النائب العام -** انت فهمت من كده ايه ؟

**الشاهد -** حضرتك اقرأ الكلام بتاعى ..

**وكيل النائب العام -** قل انت الكلام ده .. اذكر الكلام الى قلته في التحقيق ..

**الشاهد -** يجوز انى نسيت الكلام ده من امبارح لغاية النهار ده ..

**وكيل النائب العام -** انت مش نسيت ؛ بل انت قلت هذا الكلام فى جو بعدما شربت حوالى عشر كوبيات ميه .. ( ضحك ) .. بعد ان يعلن على الملأ ان لا سرية فى الدعوة ، لماذا يلجأ الى تنظيم سرى وبأسلحة اخطر من الاول

**الشاهد -** لازم له اهداف .. يسأل هو فى هذا .. انا يمكن اقول ظن ، وانما هو عنده الخبر اليقين ..

**الرئيس -** جاء فى كلامك لابراهيم الطيب ، لقد حدد الامام الشهيد العدد الذى ندخل به المعركة كما قرره رسول الله صلى الله عليه وسلم وهو اثناسر الف ؛ وقال المرشد فى المؤتمر الخامس اذا بلغ عددكم هذا فامرونى ان اخوض بكم البحار وأن احارب بكم الدنيا جمعاء وانى لفاعلهاء .. تقدر تقولى الاتناشر الف دول تدربوهم ازاي وتسليحوهم ازاي ؟

**الشاهد -** بس حضرتك كمل الفقرة ..

**الرئيس -** ده كل ما ورد فى الفقرة « ثامنا »

**الشاهد -** ما هو « تاسعا » تتعلق بالنقطة الى قبلها ..

**الرئيس -** « تاسعا » .. وفى رأى ان معاهدة تعقد ولا تعقد تمضى او لا تمضى لا يغير من سياستنا فى شىء .. انكرناها ونحن سائرون فى طريقنا الى أن تبلغ دعوتنا مبلغها من النفوس ، وحينئذ فقط تبدأ المعركة التى لا هوادة فيها . أما ان تضطربنا الظروف لدخول معركة طارئة فهذا امر مستحيل او تنفيذه يحتاج الى تفكير واخذ ورد والاتفاق .. على رأى نهائى فيه ..

الشاهد - مكتوب بعد كده ..

الرئيس - تحب أقرأ « عاشرا » ؟ ..

الشاهد - أيوه ..

الرئيس - أقرأ الجواب كله يعنى ؟

الشاهد - معلش يا فندم ..

وكيل النائب العام - آمال امبارح كنت بتتناقش فى ايه ؟ ..

( ضحك ) ..

الرئيس - والله أنا ما باشتغلشى مقرئ .. ( ضحك ) ..

الى كاتب الجواب ويضع خطة ويقدر موقف ، لازم يفهم معنى

تقدير الموقف بتساعه . . ومع ذلك أنا حاقرا الجواب كله

علشان اخواننا المواطنين جميعا يعرفوا . . باسم الله الرحمن

الرحيم والصلاة والسلام على سيدنا محمد رسول الله . . .

تقرير عن الموقف من الحكومة الحاضرة السيد الكريم . السلام

عليكم ورحمة الله . . ربنا افرغ علينا صبرا وتوفنا مسلمين . .

ربنا وآتنا ما وعدتنا على رساك ولا تخزنا يوم القيامة . ربنا

اهدنا سواء السبيل واجعل هذا خالصا لوجهك الكريم . . اخى

الكريم . - بعد دراسة واقفية للموقف الحاضر من جميع وجوهه

خرجت بعدة نتائج ، ولكل نتيجة أسباب لا يسمح الوقت

والمكان بذكرها ، أعرضها عليكم ، وعلى الله فليتوكل المؤمنون

ده تقدير الموقف بتاع حضرتك ..

الشاهد - أيوه ..

الرئيس - وعارف تقدير الموقف وتقسيمه كويس أوى ..

ده ما هواش جواب غرام عاشان تنساه . . بس أنا عاوز اطلع

بالفكرة اللى تناقض كلامك اللى انت بتقوله داوقتى .. ده

خطاب منسوخ ولم تكتبه ايام الاعتقال . بل كتبته ايام ان كنت

حرا طليقا لابراهيم الطيب وجالك رد منه ثم أرسلت له رد آخر وهو موجود كذلك ..

قل لنا بأه ايه الغرض من تكوين جهاز سرى فى الجماعة ..  
انت اقريت ان هذا مش للاسلام . واقريت بأنه للانجليز  
والانجليز مش عاوزين سرية ؟ يبقى كان سرى ليه ؟

**الشاهد -** يبقى احنا وقعنا فى غلط ..

**الرئيس -** كويس .. كان يتبع مين هذا النظام ؟

**الشاهد -** كان يتبع الاستاذ المرشد ..

**الرئيس -** هل كان يجوز او هل يجوز ان يقوم هذا النظام  
بأى عمل بدون علم الاستاذ المرشد الذى هو يتبعه هذا  
النظام ؟

**الشاهد -** الى افهمه مش ممكن طبعا ..

**الرئيس -** لين رياسة هذا النظام الى بيشتغل مع الاستاذ  
المرشد ؟

**الشاهد -** لا أعرف ..

**الرئيس -** تعرف ابراهيم الطيب ؟

**الشاهد -** كمسئول عن منطقة القاهرة ..

**الرئيس -** كام منطقة فى القاهرة ؟

**الشاهد -** ذكرت اننى اتصلت بهم وبلغت عن اسمائهم ، واذكر  
وعرب حلوان ومصر القديمة ووسط القاهرة والجيزة والعباسية  
وعرب جيهنة وبلغت عن اسمائهم ومخازنهم وضبطت ..

**الرئيس -** قل لنا من باب المثال .. عرب جيهنة كان لها فى  
المخازن ادايه ؟

**الشاهد -** ده مدون فى كشف ..

**الرئيس -** يعنى مش فاكرو ؟

**الشاهد -** يعنى مثلا .. كان فيه مثلا بنادق كاملة وبنادق غير كاملة .

**الرئيس -** بنادق غير كاملة ؟

**الشاهد -** يعنى من غير دباشك ..

**الرئيس -** عددها كام ؟

**الشاهد -** حوالى ١٧ بندقية كاملة .. مش عارف ييجى ٢٥

او ١٧ تانيين بدون دباشك ..

( وقد أثار كلمة « دباشك » الانتباه ، ففسرها السيد رئيس المحكمة بقوله « الدبشك يعنى ايد البندقية )

**الشاهد -** وماسوريتين بتوع المدفع .. يمكن براوننج وله ماسوريتين تبريد وانما ماشفتش الجزء الكبير بتاعه .. شفت المواسير بس ..

**الرئيس -** وايه تانى ؟

**الشاهد -** مش فاكرك .. وهم عند حضرتك ..

**الرئيس -** انا عارف انهم عندى ..

**الشاهد -** بس مش فاكرك دلوقتى ..

**وكيل النائب العام -** انت تحدثت فى خطابك الذى كان يناقشك فيه سيادة الرئيس مع ابراهيم الطيب عن مسائل تخص الجهاز السرى ...

**الشاهد -** ايوه ...

**وكيل النائب العام -** وطلبت فى النهاية اما ان ياخذ برايك او تبقى حتى تقابل المرشد اربط بين موضوع الخطاب وطلب مقابلة المرشد .. ليه ؟

**الشاهد -** لان المرشد هو المسئول عن الدعوة ، واعتقد ان الاخوان لا يعملون شيئا الا بأمر الاستاذ المرشد .. انا كنت عاوز اقابل المرشد ولكنه كان مختفى .. رحى المركز العام فلم اجد ..

**وكيل النائب العام** - هل معنى هذا ان المرشد هو الذى يسيطر على هذا النظام ؟

**الشاهد** - قطعاً ..

**وكيل النائب العام** - ولذلك أردت ان تقابله لتعرض عليه اراءك ؟

**الرئيس** - هو كان قطعاً ، وقبل كده قال انا اعاوز اعرف ماهى الدماء التى ستحقق ..

**الشاهد** - فى هذا الموقف ستسيل دماء ..

**الرئيس** - ايه الموقف الايجابى اللى كنت تنتظره واللى اتكلم معاك عليه ؟

**الشاهد** - لو هو حب يعمل حاجة ضد الحكومة ..

**الرئيس** - ايه الحاجة دى اللى ضد الحكومة ؟

**الشاهد** - لا اعرف ايه الاشياء اللى حتعمل .. لم اكن اعرف والله على ما اقول شهيد ..

**الرئيس** - نظام سرى واسلحة تدريب وتدريب الجماعات مش كامل .. كل ده ماتعرفشى علشان خاطر يعملوا به ايه ؟ .. علشان يعملوا حلاوة طحينية ؟

**الشاهد** - لا يا فندم ..

**الرئيس** - علشان يعملوا به ايه ؟

**الشاهد** - لغاية تاريخ ماعتقلت لم اكن اعرف بالضبط الخطة اللى جيعملوها انا باقول هذا وانا صادق ، وانا اعترف على كل حاجة اعرفها ولم اعترف الا لمصلحة البلد وحقنا للدماء ..

**وكيل النائب العام** - انت قلت فى التحقيق ان المقصود هو ضرب الانجليز فى القنال او عمل ثورة مسلحة القصد منها القضاء على الحكومة الحاضرة فهل دى هى الاهداف ؟

**الشاهد** - ولذلك انا عارضت فى ذلك ..

**وكيل النائب العام -** أنت قلت في التحقيق ان مخزن اسلحة جهينة .. مخزن الاسلحة هناك هو الذى كانت تجمع فيه جميع الاسلحة الخاصة بمنطقة القاهرة ، ثم توزع من هناك على المناطق او على الفصائل الاخرى فلماذا اختيرت جهينة لتخزين السلاح فيها دون غيرها من انحاء القاهرة ؟

**الشاهد -** طبيعى انا استلمت السلاح في جهينة ..

**وكيل النائب العام -** لماذا اختيرت جهينة بالذات لتجميع السلاح فيها ثم القيام بتوزيعه منها ؟

**الشاهد -** انا استلمت السلاح في جهينة ؛ وطبيعى هم اللى يقدروا هذا الموقف ...

**وكيل النائب العام -** انت كنت في الصورة ..

**الشاهد -** في الصورة انتهى .. انا كنت في فصيلة عرب جهينة فاستلمت السلاح من هناك ..

**وكيل النائب العام -** ايه الحكمة ..

**الرئيس -** يعنى لا يمكن تجميع الاسلحة في جهينة الا اذا كان الرجل المسئول عن عرب جهينة يعلم بجميع الاسلحة في جميع المناطق بدليل انهم اعطوك الاشراف على جرد المخازن ..

**الشاهد -** انا قلت انهم كلفونى بجرد المخازن ..

**الرئيس -** ما اسس النظام السرية ؟

**الشاهد -** فيه غيرى يعرف .. اسماعيل الهضيبى يعرفها

**الرئيس -** اسماعيل الهضيبى مخزنجى .. ومحمود يونس سلمك ونزل ، وابراهيم الطيب رئيس وبينك وبينه همزة وصل ..

**مين اللى يجيب الاوامر من ابراهيم الطيب ؟**

**الشاهد -** اسماعيل عارف ..

**الرئيس -** وواحد تانى كمان ..

**الشاهد -** محمود يونس ..

**الرئيس -** وواحد ثالث كمان ..

**الشاهد -** فكرنى به يافندم ..

**الرئيس -** حسين شعبان ..

**الشاهد -** أيوه .. وأنا لم أتصل به الا بخصوص الجواب ده بس .. حتى الجواب الكبير أعطيته لعارف ومنه للطيب ثم للاستاذ المرشد اما الجواب الثانى فاعطيته لحسين شعبان ..

**الرئيس -** ايه حسين شعبان ده ؟

**الشاهد -** كل صلتى به علشان الجواب ..

**الرئيس -** تعرف انه اخ ومن الجهاز السرى ؟

**الشاهد -** أيوه اعرف انه من الجهاز السرى ؛ واصله كان معنا فى بين السرايات ..

**وكيل النائب العام -** اختفى المرشد وبطانته فجأة ، فما الذى استشعرته من هذا الاختفاء وقد طال أمده ؟

**الشاهد -** ذكرت فى خطابى ان اختفاء المرشد لا اوافق عليه لان هذا يؤدى الى توتر وصدام بين الاخوان والحكومة .

**وكيل النائب العام -** ما الذى استشعرته من هذا الاختفاء ؟  
.. عباراتك فى الخطاب كان شعورك ايه .. ليه عملت هذا ؟

**الشاهد -** احسبت ان الاختفاء فيه خطر وحيحصل توتر ..

**وكيل النائب العام -** ايه هو التوتر ده ؟

**الشاهد -** الاخوان يقولوا ليه يختفى الاستاذ المرشد .. سيقولون ان الحكومة حقبض عليه ...

**وكيل النائب العام -** ألم تطلع على البيانات المتتالية من جانب الحكومة بأنها لم تصدر الامر بالقبض على المرشد وانها لا تنتوى ذلك مستقبلا ؟

**الشاهد -** قرأته فعلا ..

**وكيل النائب العام -** ايه شعورك ؟



**الشاهد -** يبقى في الامر شيء ..

**وكيل النائب العام -** وما هو هذا الشيء ؟

**الشاهد -** حاتبقى ثورة .. حتكون ايه ؟

**وكيل النائب العام -** اقرا لك كلامك !

**الشاهد -** أيوه ..

**وكيل النائب العام -** قلت .. سمعت ان الحكومة لم تصلح

امروا بالقبض على المرشد ثم قلت ان هذا الاختفاء يتعلق بهذه

الحركة المسلحة .. مش دى اجابتك ؟

**الشاهد -** أيوه ..

**وكيل النائب العام -** وبرضه سئلت - هل يفهم من تعبيرك

هذا ان المرشد كان يصدر تعليمات وهو في مخبئه .. « ج » نعم

مش ده جوابك ؟

**الشاهد -** أيوه ..

**الرئيس -** ذكرت في كلامك عبارة « حقنا للدماء » فهل هذا

الكلام في حقيقته حقنا للدماء او خوفا او التشكك من النصر في

دخولكم معركة مع الحكومة ؟

**الشاهد -** ده سؤال جميل وانبسطت منه ... ( ضحك )

**الرئيس -** الحمد لله رب العالمين .. ( ضحك ) آه يعنى

ميسوط منى علشان سألتك السؤال ده !

**الشاهد -** اوى ...

**الرئيس -** يعنى حتنام الليلة دى مستريح !

**الشاهد -** أيوه .. ان شاء الله ..

**الرئيس -** طيب ابسطنى زى انا مابسطتك وسألتك السؤال ده

وجاوبنى اجابة تريحنى انا كمان .. ( ضحك )

**الدفاع -** يعنى تجاوب في وضوح واخلاص ..

**الرئيس -** انا يا قولاك انك قررت في كلامك انك انت قصدت

بهذا الخطاب الى بعته لبراهيم الطيب حقن الدماء الى هى ممكن  
أن تنتج من نشوب عراك بين الاخوان والحكومة اذا ما الاخوان  
بدأوا فى اى معركة .. بأقول هل حقيقة أنك كنت تبغى بهذا  
الجواب حقن الدماء ، أم كنت تبغى تجنب المعركة لانك كنت  
متشكك فى النصر فيها ؟

**الشاهد -** أنا حقيقة كنت ..

**الرئيس -** أنت انبسطت من السؤال ده .. فجواب عليه  
بصراحة ؟

**الشاهد -** أنا كنت أود حقيقة تجنب هذه المعركة والله على  
ما اقول شهيد وأنا مسئول عن هذا اليمين امام الله فى يوم القيامة  
حين اقبله

**الرئيس -** يا أخ يامسلم يالى حتقابل ربنا يوم القيامة ،  
وبتدرس الاسلام وتعلمه للناس ..

**الشاهد -** طيب اقرا الجواب لو سمحت ..

**الرئيس -** بتقول فيه . خير لنا أن نستمر فى أعدادنا مستتين  
بهذا النشاط وبعدين مشطوبة ومكتوب فوقها .. فى نشر دعوتنا  
مستتين ونستعد من ان ندخل معركة قد لاتكون فى جانبنا ..  
ده واحد .. وبعدين .. التدريب لازال ضعيفا جدا جدا لايسمح  
بالقيام بمهام كبيرة ۝ وكان قد تقرر أن يدخل كل أخ معسكر  
للتدريب ولكن شيئا من هذا لم يتم .. ورجال بدون تدريب  
لايكفون لاحتراز النصر .. افكر الثوية دول كفاية ؟

**الشاهد -** كفاية يافندم ..

**الرئيس -** ولكن ليس فى ايدينا مايبلغنا هذا ، فأولى بنا ان  
نصبر ثم نصبر الثلاث فقرات اللى قرأتهم دول .. الا يدلوا  
بأيمان الله اللى حلفتها يا أخ يامسلم يالى حتقابل ربنا يوم القيامة  
على أنك كنت متشكك فى نتيجة المعركة ؟ .. فهل أنت كنت

تقصد حقن الدماء أو التشكك في المعركة والأولى أن تنتظر الى أن تدرب رجالك حتى اذا وقعت المعركة يبقى النصر في جانبك ؟

**الشاهد -** نيتي ... يمكن التعبير خائني ..

**الرئيس -** التعبير خائنك ؟ .. آمال محمود عبد اللطيف يحصل له ايه ||

**الشاهد -** نيتي ان نتجنب المعركة حقنا للدماء والله على ما اقول شهيد

**الرئيس -** يا راجل يا متعلم يا بتاع ليسانس الآداب ... ده انتم بتعلموا ناس بتوع ابتدائية وناس عمال ما يعرفوش يكتبوا وتعلموهم ... تقول لى ان التعبير خائنك || وتقول لى انك كنت بتبغى تجنب المعركة حقنا للدماء .. دى تعاليم ومبادئ الاسلام ؟ .. انت بتتكلم وتقول ايه || .. اتكلم الكلام اللى يشرفك حتى وانت واقف امام القضاء ..

**الشاهد -** يبقى علشان تجنب المعركة ..

**الرئيس -** واليمين اللى حلفته تعمل فيه ايه ؟

**الشاهد -** علشان ابرىء ذمتى كان غرضى تجنب المعركة حقنا للدماء ..

**الرئيس -** واليمين اللى حلفته كنت تقصد به التقرير بالمحكمة ؟

**الشاهد -** انا لا أقصد ذلك ..

**الرئيس -** والا دى الطريقة اللى بتتبعوها انكم تحلفوا على حاجة جزءها صح .. زى ويل للمصلين ..

**الشاهد -** لا .. انا شاب وابويا من صغرى ..

**الرئيس -** انا مالى ومال ابوك .. سيب ابوك بره ارجوك .. الادعاء ..

**وكيل النائب العام** - تقدر تقول امام المحكمة .. تقدر تشرح للمحكمة عمليات نقلك للسلاح من المخزن بتاعك في جهينة للجهات اللى نقلت لها وعدد وانواع هذه الاسلحة ؟  
**الشاهد** - ايوه يافندم ..

**وكيل النائب العام** - يعنى تقول لنا طريقة نقلها وعددها والفرق او الفصائل التى سلمت لها ..

**الشاهد** - نقلت مرتين اتنين .. المرة الاولى نقلت ١٦ بندقية فى اربع لفات .. كل بندقية فيها اربعة وعشرين مشعل «مولوتوف» كل عشرة فى ربطة علشان نوديهم لفصيلة مصر القديمة وفصيلة حلوان .. وصلنا بعربية .. قمنا من عرب جهينة وكان معنا واحد اسمه محمد فؤاد مكاوى والسواق ، وكان منتظرنا واحد عند مصر القديمة اسمه محمود ، فقلت له انا حا قابل واحد اسمه على صديق .. وبعدين رحنا وديناهم عند واحد اسمه السعدنى فى حلوان .. فى المرة الثانية محمد فؤاد مكاوى قلت له تستنى عند صديق فى مصر القديمة علشان نودى السلاح لعلى .. فانتظرنى وبعدين رحنا المعادى .. وقد ارشدت ايضا عن هذا المكان الذى كان فى المعادى وقبض على صاحبه .. وطبيعى الانواع كلها انا لا اعرفها بالضبط وانما على طلع صندوق ذخيرة ٣٠٣ ■ واخذ قنبلتين ..

**الرئيس** - ما سبب الخلاف بين جماعة الاخوان والحكومة ■

**الرئيس** - لم يكن هناك خلاف ..

**الرئيس** - هناك خلاف كان قايم او بالضبط او بالعربى علشان تكون عارف من رمضان اللى قبل اللى فات .. فما هو سبب هذا الخلاف ■

**الشاهد** - مش فاكر بالضبط ..

**الرئيس -** ألم يقل لك ابراهيم الطيب ان الحكومة طالبت جماعة الاخوان بحل الجهاز السرى ، لان مامعنى قيام جهاز سرى فى جماعة فى داخلية البلد فى الوقت الذى يصرح فيه مرشد هذه الجماعة ان ليس هناك سرية فى الدعوة ؟

**الشاهد -** ماسمعتش ...

**الرئيس -** ماقالكش ..

**الشاهد -** لا ..

**الرئيس -** يعنى هناك يعطوكم المعلومات اللى هم عاوزين يعطوها لكم وانتم ماتتناقشوش ...

**الشاهد -** انا ناقشت ..

**الرئيس -** انت ماناقشتش وانما قلت لهم ان هذه الطريقة لاتوصلنا للهدف بتاعنا ... طولوا بالكم علشان نستعد احسن لانى انا الى ماسك السلاح وباقول لكم الفصائل مش مستعدة مش ده كلامك ؟

**الشاهد -** ايوه ..

**الرئيس -** اذن ده موقف الناصح الامين على نفس الاهداف ونفس الاغراض الا انك ترى تأجيل العملية لضمان الوقت ..

**الرئيس -** على نفس الاهداف والاغراض الا انك ترى فى الوقت ذاته تأجيل العملية لضمان النصر يعنى كنت تعرف .

**الشاهد -** اعرف الخلاف بين الحكومة والاخوان .

**الرئيس -** مش معقول ان واحد مطلع زيك مايكونش عارف ؟  
**الشاهد -** ماكنتش اعرف ان الحكومة طلبت حل النظام السرى

**وكيل النيابة -** مطلوب من برنامجكم الحكم بالاسلام ان برنامجكم الى رسمتوه علشان تحكموا البلاد حكما اسلاميا .  
عاوزين نعرف حدوده وأسسـه .

**الشاهد -** احنا من مبادئنا الحكم بالقرآن وان القرآن دستورنا .

نحكم بالقرآن مفيش أكثر من كده ... ومفيش خلاف الا اننا نعلن هذا الحكم فقط نحرم الخمر والربا مفيش غير كده .

**وكيل النيابة -** تملنوا ان الحكم اسلامى . ؟

**الشاهد -** وتحريم الخمر والربا .

**وكيل النيابة -** ... ده اللى موجود فى الدين يعنى مفيش تعديل للقانون المدنى والجنائى .

**الشاهد -** الكل يخضع لكتاب الله .

**وكيل النيابة -** طيب يبقى ايه نظام الحكم الاسلامى ؟

**الرئيس -** افرض انك جيت دلوقت فى الحكم وحطوك رئيس وزارة تعمل ايه ؟

**الشاهد -** مش ممكن اعملها .

**الرئيس -** طبعاً مادام فيه مبدأ الجهاز السرى لان لو جيتم الحكم كل واحد منكم رايح يعمل جهاز سرى وتبقى العملية رايح جاي مش كده .. هو كل الحكم بالقرآن انك تعلن الحكم بالقرآن وتحريم الخمر والربا .

**اشاهد -** أيوه .

**الرئيس -** القرآن حرم الخمر ؟

**اشاهد -** أيوه .

**الرئيس -** ومين القائم على تنفيذ هذا التحريم ؟

**الشاهد -** كل واحد مسؤول عن نفسه اولاً وبعدين الحكومة والآية قالت « يا ايها الذين آمنوا انما الخمر والميسر والانصاب والازلام رجس من عمل الشيطان فاجتنبوه » .. ولما نزلت الآية دى خرج رسول الله الى السوق ومعه سكين وكان فيه قرية فيها خمر فمزقها فكان هذا ايدانا بان الخمر حرام ويفهم من هذا ان الحكومة مسؤولة عن التحريم .

**المسئ -** يعنى الآية مش مهمة الى جانب ما فعله رسول الله ؟

**الرئيس -** يعنى تقصد ان عملية الرسول هى الى بينت ان  
الخمير حرام ؟

**الشاهد -** لا كان ضرورى برضه حيحجتنبوها .

**الرئيس -** مين علمك الديانة ؟

**الشاهد -** الاخوان .

**الرئيس -** مين فى الاخوان ؟

**الشاهد -** فى الاسر .

**الرئيس -** مين المدرس بتاعك ؟

**الشاهد -** ماكانش فيه مدرس خاص .

**الرئيس -** طبعا مفيش مدرس خاص لازم تشكيلة .. سلطة ..

الى توصلك الى هذا الحد .

**وكيل النيابة -** يعنى ماكانش فيه دراسة خاصة بالنظم

التي تتبع ؟

**الشاهد -** كان فيه لجان بتدرس كيفية تجنب الخلل الاقتصادى

الذى يحدث نتيجة لتجنب الربا .

**الرئيس -** ما المقصود بالربا فى الاسلام ؟

**الشاهد -** سعر الفائدة .

**الرئيس -** اليس الربا هو ان يكون لديك مال فائض وتعطيه

لذى حاجة بفائدة ؟

**الشاهد -** آه .

**الرئيس -** هذا هو الربا فى الاسلام اما أن تشترك بمالك فى

مشروع من المشاريع وتنال عنه ربا مثل الاشتراك فى الشركات

المساهمة فهذا ليس ربا .

**الشاهد -** أعمال البنوك ربا .

**الرئيس -** مال البنوك اين يوظف ؟

**الشاهد -** اذا وضعت ١٠٠ جنيه في البنك امانة آخذ عليهم فائدة .

**الرئيس -** منين جبت الكلام ده الامانة ماتأخذش عليها فائدة ولا الحساب الجارى كمان روح اتعلم التجارة واتعلم البنوك اعمالها ايه وبتشغل فلوسها فى ايه . البنوك بتشغل فلوسها فى الشركات المساهمة اللى بتلم منك ومن غيرك الفلوس علشان يعملوا بيها مشروعات والبنوك التجارية بتعمل فى التجارة والصناعة . تشغل فى الصناعة واللى قصدك تبطل الربا بتاع باروخ بتاع الصاغة ان كان اقصدك على ده فده محرم بأمر الحكومة **الدفاع -** ومعاقب عليه قانونا .

**وكيل النيابة -** القصد من هذه التشكيلات السرية المسلحة هو عرقلة اتمام الاتفاقية كما قلت فهل أنت درست الاتفاقية وقرأتها ؟

**الشاهد -** لم اقل هذا .  
**وكيل النيابة -** انت مش قلت الغرض منها اتخاذ اجراءات ايجابية لعرقلة الاتفاقية .  
**الشاهد -** ايوه .

**وكيل النيابة -** امال بتقول لا ليه - انت قرئت الاتفاقية واطلعت على بنودها وملحقاتها ||  
**الشاهد -** لا أنا قرئت النصوص الاولى للاتفاقية والباقي قرئته فى المعتقل .

**وكيل النيابة -** يبقى على أى أساس جاريت التيار وعارضت الاتفاقية قبل دراستها .

**الشاهد -** ما أنا قلت اننى كنت غلطان من الاول .

**الرئيس -** تعرف محمود عبد اللطيف ||

**الشاهد -** لا ما أعرفوش .



**الرئيس -** هل تعلم بترتيب الثورة الشعبية ؟

**الشاهد -** لا يا افندم والله لا أعلم .

**الرئيس -** طبعاً .

**الشاهد -** والله أنا قلت صح ولا أقصد الكذب أبداً .

**الرئيس -** أنت قسمك الأول كان كذب فكيف أثق بك .

**الدفاع -** أنت لك جوابين .. الجواب الثانى ذكرت فيه أنك

لاتعرف ماذا يراد بك هل مجرد الفصل أو .. أو .. .  
ما الذى تقصده بهذه النقط .

**الشاهد -** ده فى الجواب الصغير انا قصدت القتل .. .  
يمكن يقتلونى .

**الدفاع -** كنت تتوقع هذا ؟

**الشاهد -** أيوه .

**الدفاع -** اذا لم تطعمهم ؟

**الشاهد -** أيوه ومع ذلك لم اطعمهم .

**الدفاع -** رغم أنك كنت تتوقع القتل ؟

**الرئيس -** نحب نقرا الجواب معاك أنت بتقول بلغنى عن  
الآخ حسين شعبان انه يسألنى هل أنت مستعد لتنفيذ غير  
ماذكرته فى خطابك وأفهم من هذا السؤال انه لا جواب على  
ما أرسلته وانه اذا لم أجب بنعم وائى مستعد للسير معكم  
فاننى أوقف مثلاً أو .. أو ... فأجب ان أقول ان هذه ليست  
دعوتى أو دعوتك أو دعوة أبى ... أمال دعوة مين ؟

**الرئيس -** أو ... أو ... دى معناها ايه . ؟

**الشاهد -** معناها انهم يعاقبونى .

**الرئيس -** يعاقبك ليه ؟

**الشاهد -** خوفا من أن أفشى الاسرار يمكن يقتلونى واتا  
وفرت على نفسى هنا .

**الرئيس -** أنت منضم للاخوان من امتى ؟

**الشاهد -** من سنة ١٩٤٦ .

**الرئيس -** كنت طالب فين ؟

**الشاهد -** فى كلية الآداب .

**الرئيس -** فى سنة ١٩٤٤ ؟

**الشاهد -** كنت فى مدرسة الصناعات الخزفية واشتغلت

فى مصلحة الدفعة والموازين وبعدين رحت فلسطين وبعدين  
أخذت الثقافة والتوجيهية ودخلت كلية الآداب .

**الدفاع -** هل قرأت المذبذبون فى الأرض ؟

**الشاهد -** لا .

**الدفاع -** انت طالب فى كلية الآداب وفى قسم التاريخ هل

كان لديك مقتضيات تجعلك تظن انهم قد يقتلونك . . من  
دراسة للاجهزة السرية ونظمها التى كانت تتبع كنت تعلم أن  
الذى يخالف يتعرض للقتل ؟

**الشاهد -** أيوه .

**الدفاع -** هل ده أيضا موقف محمود عبد اللطيف ؟

**الشاهد -** يسأل عن ذلك محمود عبد اللطيف .

**الرئيس -** ترفع الجلسة على أن تعود للاتعقاد فى الساعة

العاشره من صباح السبت الموافق ١٣ نوفمبر سنة ١٩٥٤ .

( رفعت الجلسة فى الساعة العاشره والربع مساء )

- ( محضر ) -

الجلسة الرابعة لمحكمة الشعب

المنعقدة علنا في الساعة العاشرة والرابع صباحا ، بمقر قيادة الثورة في الجزيرة ، يوم السبت ١٣ نوفمبر سنة ١٩٥٤ الموافق ١٧ ربيع الاول سنة ١٣٧٤ .

المؤلفة وفقا للامر الصادر من مجلس قيادة الثورة بتاريخ اول نوفمبر سنة ١٩٥٤ الموافق ٥ ربيع الاول سنة ١٣٧٤ ، بناء على المادة السابعة من الدستور المؤقت .

والمشكلة برياسة قائدالجناح جمال مصطفى سالم عضومجلس قيادة الثورة .

وعضوية القائممقام انور السادات والبكباشي ( ا . ح ) حسين الشافعي عضوى مجلس قيادة الثورة .

وبحضور البكباشي سيد سيد جاد المدعى ، والاستاذ على نور الدين وكيل النائب العام ، عضوى مكتب التحقيق والادعاء .

وتولى تسجيل المحاكمات بالاخترال الاسانذة : ابراهيم فكرى احمد فودة وممدوح توفيق وظلعت الصبان مندوبو مصلحة الاستعلامات .

قدمت القضية رقم ( ١ ) لسنة ١٩٥٤ لمحكمة الشعب المتهم فيها محمود عبد اللطيف محمد .

( حضر المتهم )

الرئيس - فتحت الجلسة : الادعاء جاهز

المدعى - ايوه يا افندم

**الرئيس -** الشاهد

**المدعى -** الشاهد على عبد الفتاح نويتو

**الرئيس -** اسمك ايه

**الشاهد -** على عبد الفتاح نويتو

**الرئيس -** سنك كام سنة

**الشاهد -** ٢٦ سنة

**الرئيس -** بتشتغل ايه

**الشاهد -** موظف بمصلحة المساحة .

**الرئيس -** قرب واحلف اليمين : ردد الشاهد الحلف على

المصحف وراء الرئيس وهو « والله العظيم أقول الحق ولا شيء

غير الحق والله على ما أقول وكيل »

**المدعى -** هل أنت عضو في جماعة الاخوان المسلمين ؟

**الشاهد -** نعم

**المدعى -** في أى شعبة

**الشاهد -** بالمثيرة بأمبابية

**المدعى -** هل كان في هذه الشعبة أية تنظيمات خاصة ؟

**الشاهد -** كان فيه أسر

**الرئيس -** متقول لنا على الجهاز السرى وتخلص على طول

وتيجى ناحيتنا شويه وتدينا وشك زى اللى حيتصوروا .

**الشاهد -** هنداوى دوير كان قال لنا نعمل جيش اسلامى

وندرس الاسلام والاسر .

**الرئيس -** مش عايزين نعرف حاجة عن الاسر عايزين الجهاز

السرى ايه هو التنظيم السرى وبتشتغل فيه ايه ومين رئيسه

وايه اهدافه واغراضه ؟

**الشاهد -** كان هنداوى دوير كلمنا فيه عشان ندرس الاسلام

ونكون جيش اسلامى والاسر . والمفروض انها تدرس . . .

**الرئيس** - قلت لك مش عاوزين نعرف حاجة عن الاسر اتكلم في الجهاز السرى .

**الشاهد** - كان هنداوى يختار بعض الاخوان ويجمعهم في أسر اخرى غير الاسر بتاع الاخوان المسلمين .

**الرئيس** - اسمهم ايه ؟

**الشاهد** - فى مجموعات

**الرئيس** - ماتقول كده

**الشاهد** - الحكاية دى بقى لها سبعة أشهر وكنا ندرس سورة آل عمران ! والاحاديث .

**الرئيس** - اشمعنى تدرسوا سورة آل عمران ؟

**الشاهد** - ما أعرفش

**الرئيس** - ودرست فيها ايه ؟

**الشاهد** - من الاول

**الرئيس** - الجنة أحسن من الدنيا

**الشاهد** - القرآن فيه الحاجات دى كلها

**الرئيس** - أحسن من المال والفضة والذهب

**الشاهد** - الجنة أحسن

**الرئيس** - أنت عاوز تفهمنا القرآن هوه انا عندك فى الاخوان .

**الشاهد** - المفروض أن سورة آل عمران من ضمن سور القرآن .

**الرئيس** - طيب كلمنا فى الجهاز السرى .

**الشاهد** - هنداوى دوير كان يجمع الاخوان يا أفندم من قيمة

حوالى شهر وقال لى أفت حتكون الرديف بتساعى فى الحاجات دى كلها ...

**الرئيس** - حاجات ايه ؟

**الشاهد** - فى المجموعات الجديدة .

**الرئيس** - ايه المجموعات الجديدة دى ؟

**الشاهد** - اخوان نجمعهم مثلا سبعة

**الرئيس -** مثلاً ... ؟

**الشاهد -** لا

**الرئيس -** مثلاً يصح يكونوا ٥ ؟

**الشاهد -** هم ثلاثين وهذا آخر تشكيل ويكونوا ثلاث مجموعات كل مجموعة فيها سبعة وكان فيها جماعة سبعة أو ثمانية أو أربعة لأن لسه الامور ما استقرتش وكان في المجموعات دى أخيراً حاجة جاييها ويدرس بنفسه وكلفنى بصفتى اتى درست فى الحرس الوطنى قبل كده ، وفى الضباط الاحتياط سنة واحدة أعدتها .

**الرئيس -** كنت ضابط احتياط ؟

**الشاهد -** سنة ١٩٤٧ قعدت سنة لكن ماكملتش

**الرئيس -** الحمد لله رب العالمين

**الشاهد -** كان يفوت على الجماعات دى ويدربنا ويعطينا برنامج روحى والبرنامج الروحى اللى هو سورة آل عمران والاحاديث النبوية والرحلات وزادت عليها الحته دى اللى هى تشكيلات الجماعة والفصيلة .

**الرئيس -** ايه التشكيلات الموجودة دى ؟

**الشاهد -** ثلاث جماعات وجماعة مخبرات

**الرئيس -** الجماعات مكونة من مين . . . ومين . . .

ومين وبرياسة مين ؟

**الشاهد -** ثلاث جماعات وجماعة اسمها المخبرات وهنداوى

دوير ماسك الجماعات كلها .

**الرئيس -** اسمها ايه الجماعات ؟

**الشاهد -** فصيلة

**الرئيس -** اتكلم على طول والا مصلحة المساحة علمتك انك

تنضم الى الجهاز السرى وماتعرفش الكلام - اتكلم على طول .

**الشاهد -** هنداوى دوير ماسك الفصيلة وكان عاملنى

الرديف بتاعه .

**الرئيس -** يعنى ايه رديف .

**الشاهد -** ثانى واحد بعده . وفيه جماعة من وراق العرب تتكون من صلاح عباس وكان رئيس الجماعة دى ومعاه عبدالقادر سليمان ومعاه حلمى عبد السلام ومعاه عبد الحميد البنا ومعاه محمود القرتيرى وفاضل لسه واحد طالب انضم جديد واسمه صفوت وكان معاهم يوسف همام ومحمد رءوف دى جماعة وراق العرب .

**الرئيس -** مين ماسك الجماعة دى ؟

**الشاهد -** صلاح خليفة عباس

**الرئيس -** والجماعة الثانية ؟

**الشاهد -** أنا ماسكها وتتكون منى ومن مصطفى الوردانى وعبد رب النبى عباس وسعد حجاج ...

**الرئيس -** كلمنى - ولا تتكلم مع احد ثانى

**الشاهد -** حاضر .. ومن عبد المنعم حفىنى ومحمد نجيب ..

**الرئيس -** رئيس الجمهورية ؟

**الشاهد -** محمد نجيب راغب الخردواتى . دى الجماعة الثانية .

**الرئيس -** وبعدين ؟

**الشاهد -** والجماعة الثالثة كانت تتكون من محمود الصياد وعبد العزيز شمسى وعبد المنصف البحرى ومعاهم واحد رابع قلت اسمه قبل كده ومش فاكره .

**الرئيس -** مين كان ماسك الجماعة دى ؟

**الشاهد -** مكنتش مستقرة وآخر واحد كان ماسكها إنا مؤقتا لانها ما استقرتش .

**الرئيس -** كنت ماسك جماعتين : ومين كان رئيس الجماعة .

**الشاهد -** مره عبد العزيز ... وأنا كنت أزوح للزيارة .

**الرئيس - بالشورى .**

**الشاهد -** ماكناش مستقرين ومفیش حاجة خالص ، وكان فيه جماعة المخابرات وكانت مكونة من يحيى سعيد وعبد القادر سليمان ومحمود عبد اللطيف ومن وراق الحضر واحد اسمه محمد زكى وفيه واحدة ثانية ماسكها حسن عبد المنعم وكان فيها يوسف السيد وحامد نويتو وحلمى عرفه وده بقاله ثلاثة اشهر مابقاش يجى .

**الرئيس -** حلمى عرفة صنعته ايه ||

**الشاهد -** طالب

**الرئيس -** وحسين شعبان يشتغل ايه

**الشاهد -** معرفش .

**الرئيس -** وحامد نويتو يشتغل ايه ؟

**الشاهد -** اخويا .

**الرئيس -** تشرفنا ودى شغله ؟

**الشاهد -** مجلد فى جامعة فؤاد الاول

**الرئيس -** وانت بتشتغل ايه ||

**الشاهد -** موظف فى مصلحة المساحة فى قسم التصوير .

**الرئيس -** بتشتغل فيه ايه ||

**الشاهد -** اعمل التصوير

**الرئيس -** درجه ايه

**الشاهد -** درجه سادسة

**الرئيس -** واحمد خليل

**الشاهد -** عامل

**الرئيس -** وعبد المنصف الجيرى ؟

**الشاهد -** موظف فى وزارة التجارة والصناعة

**الرئيس -** درجه ايه



الشاهد - معرفش

الرئيس - وعبد القادر سليمان

الشاهد - موظف بمصلحة السكة الحديد .

الرئيس - يشتغل ايه ؟

الشاهد - موظف

الرئيس - درجة ايه

الشاهد - معرفش

الرئيس - وعبد الحميد البنا

الشاهد - عامل في معامل وزارة الصحة

الرئيس - وعبد العزيز شمس

الشاهد - خردواتي

الرئيس - يعنى الحمد لله كل الجهاز السرى خردواتيه

وسمكرية وموظفين في الدرجات الصغيرة مالتقش مهندس ولا واحد مدير ادارة .

الشاهد - لا . ودي كانت الاسر ودول الجماعات .

الرئيس - المجموعات دى غرضها ايه ؟

الشاهد - قالوا انها نواة للجيش الاسلامى الذى سيحمى

الاسلام من اى واحد يعتدى عليه او على الفكرة الاسلامية زى الانجليز واليهود .

الرئيس - ودى حاجة سرية كل دولة لها جيش تحمى ييه

نفسها .

الشاهد - على ما قالوا لنا انها كانت موجودة قبل كده على

ما اذكر .

الرئيس - يعنى موجوده ؟

الشاهد - ايام الشهيد حسن البنا كانت موجودة .

الرئيس - كان سيدنا محمد الثانى .

**الشاهد - لا**

**الرئيس -** يعنى اذا كانت موجودة أيام حسن البناء تبقى لازم تكون موجودة على طول .

**الشاهد - لا**

**الرئيس -** الاسلام مفيش فيه سرية يبقى الجهاز كله سرى ليه والفكرة ايه ؟

**الشاهد -** كان نواة للجيش الاسلامى لحماية الفكرة الاسلامية .

**الرئيس -** الاسلام مفهش سرية ولا بيشتغل تحت الارض .

**الشاهد -** المقصود ان جميع الاخوان يكونوا « كتوميين »

**الرئيس -** على مين ؟

**الشاهد -** على انفسهم

**الرئيس -** تعلمت من سورة آل عمران ان تكون كتوم ؟

**الشاهد -** الى أنا مقتنع بيه الى خلاى انضم هو انى اذافع

عن الفكرة الاسلامية وحرب الانجليز فى القنال وحرب اليهود فى فلسطين واسألوا اى واحد اذا كان فى نفسه حاجه غير دى .

**الرئيس -** وايه حكاية الانقلاب الشعبى .

**الشاهد -** أنا لا أعرف شيئا عن هذا وجيبوا لى هنداوى وأنا

أقطعه بأيدى لانه غرر بينا وودانا فى داهية . وأنا واخويا مش فى البيت .

**الرئيس -** مالناش دعوة بالبيت عشان تبقى تشترك فى الجهاز السرى .

**الشاهد -** الدين يحضنا على الجهاد فى سبيل الله وانا عشان

مادخلتش الجيش فجيت اشتركت فى الجيش الاسلامى عشان أحارب .

**الرئيس -** عشان مادخلتش الجيش تعمل جيش تانى ؟

**الشاهد -** أنا دخلت الجيش الاسلامى عشان أساعد الحكومة .

**الرئيس -** والجيش الموجود جيش تركى ؟

الشاهد - لا يا افندم والحنة الى انتم عملتوها ...

الرئيس - حنة ايه ؟

الشاهد - عملتم خيرا كثيرا بفكرة المؤتمر الاسلامى واتصلتم  
بالشعوب الاسلامية والاخوان لما كانوا يقعدوا ١٠٠٠ سنة  
ماكانوش يعملوها .

الرئيس - مين كان رئيس الجهاز السرى ؟

الشاهد - هندأوى دوير .

الرئيس - كان فيه فصائل ثانية ؟

الشاهد - مفيش عندنا حاجة ثانية

الرئيس - فى حنة ثانية

الشاهد - مفيش

الرئيس - مين تعرفهم موجودين فى فصائل اخرى غير الجهة  
الاخرى ؟

الشاهد - الى اتصلت بيه حسين شعبان

الرئيس - فين ؟

الشاهد - فى بين السرايات

الرئيس - بيعمل ايه فى بين السرايات ؟

الشاهد - ما اعرفش .

الرئيس - جاب لكم منشورات مرة ؟

الشاهد - أيوه مرة جاب منشورات

الرئيس - يقولوا فيها ايه ؟

الشاهد - يقولوا فيها عن خطاب للمرشد الى الاخوان

الرئيس - وايه كمان ؟

الشاهد - والخطاب الى بعته المرشد للرئيس جمال عبدالناصر

الرئيس - وبعدين ؟

الشاهد - أيوه يا افندم ده الى اعرفه من حسين شعبان .

الرئيس - تعرف ان حسين شعبان من الجهاز السرى ؟

**الشاهد -** أعرف انه من بين السرايات واتصل بى فى مرة من المرات وماكنتش أعرف انه فى الجهاز السرى .  
**وكيل النائب العام -** كان مفروض ان هذه الجماعات تدرب عسكريا ؟

**الشاهد -** مفروض يا افندم  
**وكيل النائب العام -** جت لكم أسلحة ؟  
**الشاهد -** لا يا افندم ، انما هنداوى جاب لنا أسلحة وقال لى شيلها .

**وكيل النائب العام -** أى أسلحة، بين للمحكمة واقعة الاسلحة .  
**الشاهد -** جاب شيله فيها قوالب ت. ن. ت. وقنابل فاضية ولفة ثانية لا أعرف فيها ايه اول مرة وثانى مرة بيعت شنطة ودى تاريخها قريب .

**الرئيس -** كان فيها ايه الشنطة ؟

**الشاهد -** ما اعرفش لان اخويا هوه اللى اخذها .

**الرئيس -** وقوالب ال. ت. ن. ت. عشان ايه ؟

**الشاهد -** يسأل عن هذا هنداوى

**الرئيس -** ولا يسأل اللى اخذها .

**الشاهد -** هوه قال لى شيلها فى المخزن

**الرئيس -** المخزن بتاع ايه ؟

**الشاهد -** المخزن اللى حط فيه الشيله دى اللى جابها .

**الرئيس -** والمخزن ده كنت مؤجرينه وكان على شكل مخزن .

**الشاهد -** لا كان شقه وكان ساكن فيها واحد اسمه عبد

الحميد البنا .

**الرئيس -** كنتم مخصصين للأسلحة مخزن عنده عشان الشيلة اللى جابها هنداوى .

**الشاهد -** أيوه

**الرئيس -** يعنى كنتم منتظرين ان فيه شيلة حتيجى وعشان كده عملتم المخزن عشان تحطوها فيه .

- الشاهد - هنداوى قال لى  
الرئيس - الشيلة دى ايه ؟ ووديتوها فين ؟  
الشاهد - ودينا كفر حكيم  
الرئيس - عند مين ؟  
الشاهد - عند مصطفى الكومى  
الرئيس - بيشتغل ايه ؟  
الشاهد - رئيس فى وزارة الزراعة  
الرئيس - رئيس ايه ؟  
الشاهد - رئيس فى قسم تربية النباتات - رئيس عمال .  
الرئيس - وكان ايه الغرض من هذه الاسلحة ؟  
الشاهد - هنداوى يسأل عنها لانها حاجات كثيرة ومنها  
قوالب الت . ن . ت كثيرة .  
الرئيس - وليه لايسأل الشخص الذى شالها او اخذها ؟  
الشاهد - هنداوى قال لى شيلها فشيلتها  
الرئيس - الأوامر عندكم لازم تنفذوها - يعنى لما هنداوى  
يعطى لك امر لازم تنفذه ؟  
الشاهد - لا يا فندم انما هو قال لى شيل دى فى  
المخزن فشيلتها .  
الرئيس - انت بتقول انك كنت الرديف بتاع هنداوى .  
الشاهد - كنت جديد وده اخيراً  
الرئيس - وده مش يكون بناء عن ثقة ؟  
الشاهد - أيوه لازم يثق فى  
الرئيس - الشخص الذى هنداوى يعينه الرديف بتاعه مش  
لازم يعلم ويعرف كل شىء ؟  
الشاهد - أنا قلت كل الذى أعرفه واللى علمت بيه .  
الرئيس - انت مافكرتش لما ادلك الاسلحة عشان تحطها  
فى المخزن انك تسأله الاسلحة دى عشان ايه ؟

- الشاهد** - ماسألتوش ولم يتدرب الاخوان بتوعنا عليها .
- الرئيس** - دى تبقى مصيبه لو كان دريكم على استعمال  
قوالب الت . ن . ت
- الشاهد** - أنا شفتها
- الرئيس** - ازاي ؟
- الشاهد** - فى الحرس الوطنى وضربوا هذه القوالب أمامى  
فى الميه .
- الرئيس** - وعملت ايه ؟
- الشاهد** - عملت انفجار جامد
- الرئيس** - لكن انت ماقتليش الاسلحة دى عشان ايه  
وجاب الاسلحة دى منين ؟
- الشاهد** - مفيش حد من الاخوان يعلم هذا .
- وكيل النائب العام** - جاب منين الاسلحة دى ؟
- الشاهد** - والله ما أعرف .
- وكيل النائب العام** - فيه حد جه من خارج منطقة امبابه  
عشان يعاين الاسلحة او يشيلها ومين ؟
- الشاهد** - ايوه - سيد الرئيس .
- وكيل النائب العام** - عشان ايه ؟
- الشاهد** - عشان يشوف المكان وقال انه ما يصلحش .
- وكيل النائب العام** - أى مكان ؟
- الشاهد** - المكان اللى اتخط فيها السلاح
- وكيل النائب العام** - الاول أو الثانى ؟
- الشاهد** - الاسلحة دى كانت فى كفر حكيم ولما جينا ننقلها  
بناء على رغبة هنداوى راح شاف المكان فقال انه ماينفعش .
- وكيل النائب العام** - اختصاص سيد الرئيس ايه ؟
- الشاهد** - التفتيش على الاسلحة
- وكيل النائب العام** - بناء على طلب مين ؟

الشاهد - معرفش .

وكيل النائب العام - ايه صفته في الجهاز السرى ؟

الشاهد - هو فات علينا وشفته

وكيل النائب العام - هل فهمت انه مكلف من رئيس الجهاز

السرى بانه يقتش على الاسلحة .

الشاهد - معرفش يمكن من فوق

الرئيس - وابراهيم الطيب شغلته ايه ؟

الشاهد - محامى .

الرئيس - وايه عمله في الجهاز السرى ؟

الشاهد - معرفش .

الرئيس - لكن أنت مش اعترفت في التحقيق على ان ابراهيم

الطيب رئيس مناطق الجهاز السرى في القاهرة ؟

الشاهد - لا ... محصلش ... ماقلتش كده .

الرئيس - طيب شوف المحضر ( موجهها كلامه الى الادعاء ) ثم

قال للشاهد جابوب على السؤال اللي اسألك عنه . احنا مش

بنبيع ترمس .

وكيل النائب العام - قلت في التحقيق اجابة على السؤال الخاص

بمتى كانت آخر مقابلة لك لابراهيم الطيب فقلت « في مكتبه من

شهرين ونص وكان هناك كثير من الاخوان كانوا حوالى ١٨ واحدا

من مختلف المناطق قاعدين وابراهيم قال ان كل حاجة ماشية

كويس والتعليمات ستصل لكم في الوقت المناسب » .

الرئيس - هل هذا حصل ؟

الشاهد - حصل يا افندم .

الرئيس - يعنى عارف ان فيه أعضاء جهاز سرى في المناطق

الاخرى ؟

الشاهد - انا شفت ناس تانيين عند ابراهيم الطيب

**الرئيس -** والناس التانيين دول بيعملوا ايه عند ابراهيم الطيب ؟

**الشاهد -** طبعاً رايحين زى ما أنا رايح

**الرئيس -** أmaal بتقول ما تعرفش ليه ؟ وكلامك الاول قلت انك ما تعرفش ان فيه جهاز سرى فى مناطق أخرى ليه ؟

**الشاهد -** فين يا أفندم .

**الرئيس -** قلت انك ما تعرفش انه فيه جهاز سرى فى مناطق أخرى غير المنطقة بتاعتكم .

**الشاهد -** ما أعرفش عنه حاجة .

**الرئيس -** والناس اللي شفتم .

**الشاهد -** أنا رحى فى مكان وأعدت فى أوده وقلت كل اللي شفته .

**الرئيس -** لما ابراهيم الطيب قال ايه الاستعداد بتاعكم والجماعات بتاعتكم وأسمائهم وان التعليمات حصلكم فى الوقت المناسب كان بيقول الكلام ده لك لوحده ؟

**الشاهد -** كان معايا محمود الحواتكى وحسين شعبان

**الرئيس -** لما ابراهيم الطيب يقول لكم هذا الكلام أمام الحواتكى وحسين شعبان يفهم من هذا الكلام ايه ؟ يفهم ان حسين شعبان والحواتكى أعضاء فين ؟

**الشاهد -** يبقى كده على طول . وأنا قلت ان حسين شعبان فى بين السرايات والحواتكى فى الجيزة .

**الرئيس -** يبقى فيه جهاز سرى فى الجيزة ؟

**الشاهد -** المفروض لازم يكون فيه .

**الرئيس -** وتفهم ايه لما ابراهيم الطيب جمعكم يا أعضاء انجهاز السرى فى وراق العرب والجيزة وامبسابة ويبقى ايه ابراهيم الطيب ؟

**الشاهد -** أنا قلت انه فوق هندأوى دوير .



**الرئيس -** استنتاج ؟

**الرئيس -** لكن أنت قلت ما أعرفش انه يشغل الا محامي

**الشاهد -** لازم يكون رئيس لهنداوى .

**الرئيس -** الاجهزة السرية تبع جمعية ايه ؟

**الشاهد -** الاخوان المسلمين

**الرئيس -** وتتبع مين فى الرياسة بتاع الاخوان ؟

**الشاهد -** ما أعرفش لكن المفروض ان المرشد مسئول عن

كل حاجة فى الاخوان .

**الرئيس -** هل دخلت هذا الجهاز السرى دون ان تعرف

يتبع مين ؟

**الشاهد -** هنداوى رئيس من ناحية رئاسة المنطقة وكلامه

آخذه منه ثقة .

**الرئيس -** يعنى ماتناقشوش وتقوم تطيعه على طول ؟

**الشاهد -** أناقشه فى حدود المعقول .

**الرئيس -** ولما جاب قوالب ال ت. ن . ت عشان تشيلها

فى المخزن كان كلامه معقول ؟

**الشاهد -** الى شفته ان الاخوان راحوا فلسطين والقنال

وكنت مقتنع بالناحية دى ، لكن الحاجة الى عملها استنكرها

استنكرها خالص وهو خرب بيوتنا لانه استغل فينا الحماية

الاسلامية واحنا ناس بنقرأ القرآن وشفنا القرآن يحض على

الجهاد .

**الرئيس -** الجهاد ضد مين ؟

**الشاهد -** ضد الانجليز وال كفار والمشركين والجماعة دى كان

غرضها ان الاسلام يتوسع وينتشر ويكون اهله اعضاء فيها

ولاشك ان خطوة المؤتمر الاسلامى كانت خطوة جميلة جدا .

ووالله العظيم لو كان الاخوان اعدوا ١٠٠٠ سنة ماكانوا يقدروا

يعملوا حاجة زى دى واللى كانوا بيحلموا بها فى نفوسهم لانهم

ما كانوا عارفين يصلحوا نفسهم .

**الرئيس -** ليه ؟

**الشاهد -** كل يوم كان فيه خناقه .

**الرئيس -** قل لنا شيئاً عن هذه الخلافات .

**الشاهد -** النزاع اللى بينهم .

**الرئيس -** زى ايه ؟

**الشاهد -** كل يوم والثانى كان فيه نزاع وعبد الرحمن البنا

كان فى ناحية وده فى ناحية .

**الرئيس -** قول لنا خناقه .

**الشاهد -** ضربوا بعض فى المركز العام زى ما قرأنا فى

الصحف .

**الرئيس -** مارحتش هناك وماشفتش ؟

**الشاهد -** لا

**الرئيس -** يعنى تنضم لجماعة لاتعرف عنها شيئاً ولا تعرف

اغراضها ولا الجهاز السرى الغرض منه ايه .

**الشاهد -** قبل كده أعرف أنهم راحوا فلسطين للجهاد

والقتال .

**الرئيس -** يعنى الاخوان بس هم اللى راحوا فلسطين ؟

**الشاهد -** لا وغيرهم

**الرئيس -** وغيرهم يطلع ايه ؟

**الشاهد -** مصريين وطنيين يا افندم .

**الرئيس -** راحوا عشان ايه ؟

**الشاهد -** بدافع الوطنية . والاخوان بدافع الدين وده وطنى

ودده وطنى .

**وكيل النائب العام -** اذا سمحت المحكمة نريد ان نواجهه

بأقواله الواردة فى التحقيق .

**الرئيس -** اتفضل

**وكيل النائب العام -** انت قررت فى التحقيق عندما سئلت عن

الاهداف التى يسعى اليها الجيش الاسلامى فأجبت بأنه لكى

تقاوم به الحكومة التي لاتحكم بالقرآن ولما سئلت عن طريقة المقاومة فقلت لما يجيبوا لنا الاسلحة وفعلا جابوا اسلحة عند عبد الحميد البنا . كما قلت بأنهم جابوا لكم خرائط لمدينة القاهرة ودرستم منطقة امبابه عشان تعرفوا كل الشوارع . ثم سئلت عن التعليمات التي قال ابراهيم الطيب انها حتجيلكم في الوقت المناسب وعن الخطة اللي عملوها فقلت انهم كانوا يقولوا ان الشعب كان حيقيم بثورة لاسقاط الحكومة وقالب نظام الحكم مش كلامك ده ؟

**الشاهد** - مش كله الكلام ده مش تمام زى مايتقوله .

**الرئيس** - ده القرآن اللي اتعلمته . علمك انك تمضى على أقوال وبعدين تقول انه مش كلامى .

**الشاهد** - كل حاجة أقول عليها يا افندم .

**وكيل النائب العام** - صفحة ٥ و٦ في التحقيق .

**الرئيس** - دى امضتك ( اطلعاه على امضاءاته في محضر التحقيق ) . ؟

**الشاهد** - أيوه

**الرئيس** - ودى امضتك ؟

**الشاهد** - أيوه

**الرئيس** - ودى امضتك ؟

**الشاهد** - أيوه

**الرئيس** - وبتمضى على حاجة قبل ماتقرأها أولا ؟

**الشاهد** - أنا يا فندم ماقريتش حاجة .

**الرئيس** - وليه مامضيتعوش على شيك بخمسة الافجنيه؟

**وكيل النائب العام** - ياريت يا افندم .

**الرئيس** - ايه الخرائط اللي جابوها لكم ؟

**الشاهد** - جابوا لنا خريطة القاهرة وخريطة امبابه عشان

فدرسها كويس .

**الرئيس** - امبابه فيها يهود رايعين تحاربوهم

- الشاهد -** قالوا لنا ادرسوا خريطة امبابة .
- وكيل النائب العام -** وهل كان الجيش الاسلامى سيحارب فى القاهرة ؟
- الشاهد -** لا ولكن كان من ضمن دراساتهم التكتيك العنيف .
- الرئيس -** ايه التكتيك العنيف ده .
- الشاهد -** النط والجري والقفز والرياضة عششان يربوا الجسم بتاعنا كويس .
- الرئيس -** ( ينظر الى الشاهد ) وهل هذا جسم كويس تدرب على التكتيك العنيف ؟
- الشاهد -** اصلى كنت باذاكر
- الرئيس -** فين ؟
- الشاهد -** بكلية الحقوق
- الرئيس -** سنة ايه ؟
- الشاهد -** فى سنة اولى
- الرئيس -** وقبل ان تدخل كلية الحقوق ؟
- الشاهد -** كنت باكمل بقية دراستى فحصلت على الثقافة والتوجيهية .
- الرئيس -** قلت ان اهداف الجيش الاسلامى مقاومة الحكومة التى لاتحكم بالقرآن .
- الشاهد -** ايوه
- الرئيس -** يعنى موافق ومقتنع بيه .
- الشاهد -** انا بقى لى فى الاخوان سنة ونصف وكان ساعة ماكلنا هنداوى عن الجهاز السرى من سبعة شهور كنت متفرغ للدراسة من اعدادى الى ثانوى .
- الرئيس -** لكنك قلت فى اقوالك ان من اهداف الجيش الاسلامى ان يقاوم الحكومة التى لاتحكم بالقرآن
- الشاهد -** هذا الكلام صح

**الرئيس -** يعنى موافق عليه ؟

**الشاهد -** تسمح يا افندم

**الرئيس -** لا ما اسمحش ... اسمح ترد على السؤال بس  
الى اقوله لك انت مش علموك النظام فى الاخوان .

**الرئيس -** علموك النظام ولا لا فى جماعة الاخوان

**الشاهد -** ايوه .

**الرئيس -** ماكنتش بتناقش نويتو ليه ؟ . وماكنتش بتناقش  
هنداوى ليه لما قال حط الأسلحة فى المخزن .. فرحت  
حاططها زى الرطل فى المخزن من غير ماتناقشه ..

**الشاهد -** .. ..

**الرئيس -** كلامك ده ولا لا ؟

**الشاهد -** ايوه يافندم ... والله يافندم خطواتكم الى انتم  
ماشيين فيها من أثبت ما يمكن ... والله يافندم ماشيين فيها  
بنظام دى من أحسن الخطوات .. ..

**الرئيس -** كتر خيرك .. ( ضحك ) .. تعرف محمود  
عبد اللطيف ؟

**الشاهد -** ايوه .. ..

**الرئيس -** آخر مرة شفت فيهما محمود عبد اللطيف كانت امتى ؟

**الشاهد -** أنا شفته صباح يوم الحادث ...

**الرئيس -** امتى يعنى ؟

**الشاهد -** الساعة ستة الصبح ..

**الرئيس -** فين ؟

**الشاهد -** هو فات على فى منزلى ..

**الرئيس -** فات عليك علشان ايه ؟

**الشاهد -** هو قال لى أن هنداوى بعتنى لك .. وبيقول لك  
ادينى خمسة جنيه وعشر طلقات ...

**الرئيس -** علشان ايه ؟

**الشاهد** - ما أعرفش ..

**الرئيس** - ما سألتوش ليه عاوز الطلقات ؟

**الشاهد** - أنا وجدت أنه باين عليه الاضطراب فقلت له :  
فيه حاجة يا محمود فقال لا سيبنى أنا عاوز أمشى ..

**الرئيس** - طيب ماقتلوش انت عاوز الخمسة جنيه ليه ؟

**الشاهد** - هو قال لى ان هنداوى كان باعته وانه يقول لى

أديله خمسة جنيه ..

**الرئيس** - عندك فلوس منين ؟

**الشاهد** - أنا أمين صندوق المنطقة ..

**الرئيس** - وهنداوى هو المسئول عن هذا المال ؟

**الشاهد** - أيوه ..

**الرئيس** - وإيش عرفك أن هنداوى هو اللى قال له

انه يروح لك ؟

**الشاهد** - اصل هو كان جاني قبل كده ..

**الرئيس** - شفت معاه ايه ؟

**الشاهد** - كان معاه مسدس ..

**الرئيس** - وطلب منك تديله طلقات علشان ايه ؟

**الشاهد** - ماأعرفش .. .. وأنا سألته علشان كان باين

عليه الاضطراب وقلت له فيه حاجة .. فقال لا .. .. ماردش

على بجواب .. وقعد فطر معايا وطلب منى أجيب له شنطه ..

وقال لى أنا عاوز أمشى قبل الساعة ثمانية ...

**الرئيس** - كان رايح يحارب الانجليز ؟

**الشاهد** - ما أعرفش ..

**الرئيس** - تفكر انت ايه ؟

**الشاهد** - أنا استنتجت ...

**الرئيس** - واحد فات عليك واخذ خمسة جنيه من مال

المسلمين ، وعشر طلقات ..

وكيل **النائب العام** - وقعد فطر معاه ..  
**الرئيس** - وكان مرتبك ومستعجل ، وكان عاوز يمشى ..  
قبل الساعة كام ■

**الشاهد** - قبل الساعة تمانيه ..  
وكيل **النائب العام** - وطلب شنطه ...  
**الرئيس** - ما فكرتش ايه الحكاية ... رايح فين ؟  
**الشاهد** - أنا بالليل رحى لهنداوى فقال لى ..  
**الرئيس** - احنا هنا فى الساعة ثمانية الصبح ...  
مش بالليل ..

**الشاهد** - ما اعرفش .. ده اللى حصل ..  
**الرئيس** - ما فكرتش فى حاجه ياللى بتدوس الدين الاسلامى ؟  
**الشاهد** - فكرت وسألته ..  
**الرئيس** - فى ايه ؟

**الشاهد** - قلت له ■ علشان ايه يا محمود عاوز الحاجات دى ..  
.. فيه حاجة فقال لى لا ... انا عاوز امشى ..  
**الرئيس** - طيب انت فكرت فى ايه ؟

**الشاهد** - قبل كده ... فى مرة كان محمود قاعد فى جماعة  
معانا ، فهنداوى جه واخذه وقال لى مالکش دعوه بيه ...

**الرئيس** - ايوه .. انما انت لما تلاقى واحد معاه مسدس  
وطلقات تفتكر انه رايح يعمل ايه ؟ .. رايح يصطاد مثلا .. ؟  
( ضحك ) .

**الشاهد** - ان بعض الظن اثم ...  
**الرئيس** - ان بعض الظن اثم ؟  
**الشاهد** - ايوه يافندم ... ( ضحك )

**الرئيس** - ما قلتش فى أقوالك انك فهمت منه أنه مسافر ..  
**الشاهد** - هو قال لى يافندم انه مستعجل وعاوز يسافر  
واته عاوز يمشى من عندى قبل الساعة تمانيه ..

الرئيس - تعرف واحد اسمه عبد الحميد البنا ؟

الشاهد - ده من جماعة الوراق .

الرئيس - يشتغل فين

الشاهد - في معامل الصحة .

الرئيس - يشتغل ايه ؟

الشاهد - ده من جماعة الوراق ويشتغل .. واخترناه

مخزنجى . .

الرئيس - علشان تشيلوا عنده ايه . . ؟

الشاهد - يسأل اللي جابه . . . هنداوى . . .

الرئيس - طيب لما رحت لهنداوى بالليل قال لك ايه ؟

الشاهد - لما رحت له وجدته مضطرب ، فقلت له : فيه ايه فارتبك . . فانا ربطت بين القرائن بتاعة الصبح وبين نشرة الاخبار في الاذاعة بتاعة الساعة تمانية ونص . . . بصيت لقيت وشه عرق وقال لى انا مليش دعوة دول المسؤولين هم اللي عملوا كده . . . فانا رحت قافل الباب ونزلت ده كل اللي حصل بينى وبينه .

الرئيس - مين الناس المسؤولين دول ؟

الشاهد - المفروض انه اتصل بابراهيم الطيب . .

الرئيس - ابراهيم الطيب كان بيعمل اجتماعات ؟

الشاهد - ايوه . . ده كان محامى وكان بيعمل اجتماعات . .

الرئيس - اجتماعات ايه ؟

الشاهد - انا رحت اجتماع واحد . .

الرئيس - اجتماع ايه ؟

الشاهد - كان فيه اخوان من بين السرايات ومن الجيزة ،

وانا رحت علشان هنداوى يعرفنى به لانى كنت جديد . .

الرئيس - جمع رديف ايه ؟



**الشاهد -** ردائف ..

**الرئيس -** المرة دى حببت تصلح اللى قلته فى المرة اللى فاتت ... انت قلت قبل كده فى التحقيق ردفاء ... ردائف هى الصبح ؟

**الشاهد -** أيوه ..

**الرئيس -** على وزن ايه || ( ضحك )

**الشاهد -** ما اعرفشى يافندم ...

**الرئيس -** طيب ... يعنى الاجتماع كان فيه الردفاء أو الردائف .. يعنى ماكتتش انت لواحدك .. وانما كانوا كلهم من الرديف ؟

**الشاهد -** لازم يافندم كانوا كده ...

**الرئيس -** كنت رايح بصفتك الشخصية ؟

**الشاهد -** كنت رايح بصفتى رديف ...

**الرئيس -** يعنى كل الناس اللى هناك كانوا بتوع رديف ؟

**الشاهد -** ماعرفش ... يعنى هل حسين شعبان بتساع رديف .. ماعرفشى ..

**الرئيس -** ايه الخطة اللى كانوا عاملينها ؟

**الشاهد -** ما اعرفشى حاجة عنها ..

**الرئيس -** هل ابراهيم قال لكم ان التعليمات حتىجى فى الوقت المناسب ؟

**الشاهد -** هو قال كده ...

**الرئيس -** انتم عندكم ماتسألوش عن حاجة ؟

**الشاهد -** لا مانسألشى ...

**الرئيس -** يعنى دكتاتورية ||

**الشاهد -** لا ... والمفروض اننا نسال ...

**الرئيس -** اسمعنى ما سألتش هنداوى لما سلمك الاسلحة  
علشان تحطها فى المخزن . . ليه ماسألتوش ؟

**الشاهد -** ماتحتاجش لسؤال . . ده اللي أنا فاهمه والله . .

**الرئيس -** ايه اللي تعرفه عن الثورة اللي عاوزين يعملوها  
لقلب نظام الحكم ؟

**الشاهد -** والله ما أعرفش حاجة . .

**الرئيس -** عاوزين يعملوا مؤامرة شعبية ؟

**الشاهد -** والله الحته دى ما عرفهاش . .

**الرئيس -** تعرف الحته بتاعة امبابه ؟

**الشاهد -** يافندم أنا أخويا قلت عليه . .

**الرئيس -** ماتعرفش حته باب الشعريه ؟

**الشاهد -** رحتها مرة واحدة وأنا صغير . .

**الرئيس -** بس . . ؟

**الشاهد -** أيوه . .

**الرئيس -** قل لنا عن معلوماتك فى وسط القاهرة . . .

**الشاهد -** أنا ما عرفش الاسماء . .

**الرئيس -** انت راجل فى مصلحة المساحه وبت رسم خرط

وبتدرسها . . ازاي بأه ما تعرفش ؟

**الشاهد -** ما أعرفش يافندى . .

**الرئيس -** انت مش قلت فى التحقيق انهم كانوا يقولوا دائما

ان الشعب لازم يقوم بثورة لاسقاط النظام الحاضر ؟

**الشاهد -** لا اذكر . . .

**الرئيس -** ما تذكرش ؟

**الشاهد -** لا . . .

**الرئيس -** تعرف واحد اسمه عبد المنعم عبد الرؤوف ؟

**الشاهد -** ايوه .. هنداوى مرّة بعث لى فى العيد الكبير فانا رحت هناك فوجدته قاعد مع واحد .. فلما دخلت عرفنى به وقال لى ده اخوك احمد من شبرا .. قال اخوك الخضر .. وقال لى شيل ده عندك ..

**الرئيس -** زى ال T . N . T ؟ .. ( ضحك ) .

**الشاهد -** اخذته ونزلنا مشينا على التربة ومنها البيت .. وكان مصطفى الوردانى مسافر هو وأسرته فى الوردان .. وكانوا سابوا المفتاح عند جازهم الاخ عبد المنعم الحفنى فانا رحت له واخذت منه المفتاح وقلت ما تجيش ، وبعدين رحت على شقة الوردانى فوجدت عبد المنعم عبد الرؤوف منتظرنى ، وانا لغاية اللحظة دى ما كنتش اعرفه ..

**الرئيس -** وبعدين

**الشاهد -** وبعدين حطيت عبد الرؤوف فى الشقة ثلاثة ايام لانه كان عيان ..

**الرئيس -** كنب بتخدمه ومخبيه ؟

**الشاهد -** المفروض كده ...

**الرئيس -** يعنى كنت مخبيه

**الشاهد -** هنداوى قال لى شيله عندك ، فشيلته عندى ..

( ضحك )

**الرئيس -** هه ... كنت مخبيه ليه ؟ .. برضه ما فكرتش

فيه .. زى حكاية ال T . N . T اللى ماسألتش عليها

**الشاهد -** ...

**الرئيس -** عبد المنعم عبد الرؤوف اخذته وشيلته فى بيت

الوردانى علشان خاطر ايه ... علشان الجيش الاسلامى ؟

**الشاهد -** هنداوى قال لى شيله لان ده اخ من الاخوان ...

**الرئيس -** وعرفت امتى انه عبد المنعم .

**الشاهد -** عرفت بعد ما مشى ..

**وكيل النائب العام -** كان يجتمع بعد في البيت ؟

**الشاهد -** اجتمع بابراهيم الطيب مرتين ..

**وكيل النائب العام -** ويحيى سعيد هل قابلته في البيت

**الشاهد -** أيوه ..

**وكيل النائب العام -** كانوا يتكلموا في ايه ؟

**الشاهد -** كانوا يتكلموا عن تشكيل الفصيلة ، وهو كان

بيحط عيدان كبريت ويشكلها تشكيلات عسكرية ... العيدان

دى كانت تبين سهم أو خط منتشر .

**وكيل النائب العام -** ألم تعرف طول المدة دى شخصيته ؟

**الشاهد -** لا . . . . وانما كنت أعرف بس انه شخصية

عسكرية ...

**وكيل النائب العام -** خرج ازاي ؟

**الرئيس -** قلت في أقوالك انك عرفت ان عبد المنعم عبد

الرؤوف كان ضابط في الجيش وانه هارب من المحاكمة العسكرية

... . وانك انت كنت بتقوم بخدمته في تلك الايام ...

**الشاهد -** أنا عرفت بعد كده ان عبد المنعم عبد الرؤوف كان

بيتحاكم .. بعد ما خرج ... وهنداوى كان يحتاط دائما ان

مفيش حد يعرفه .. حتى أنا ..

**الرئيس -** الغرابة ربنا مديكم حنة لسان .. اكبر كذابين

لو كان ربنا يديكم عقل زى ما اداكم لسان !!

**الشاهد -** والله العظيم أنا باقول الحق دلوقتي .. أنا حالف

على مصحف ..

**الرئيس -** وبرضه انت حالف على ده وماضى عليه ( مشيراً

الى محضر التحقيق ) ... . وبعدين ...

**الشاهد -** وبعدين أخذه بالطريقة الآتية ...

**الرئيس -** كمل كلامك ...

**الشاهد -** ابراهيم الطيب قال لى حاجيلك عريية الساعة اربع صباحا لان المفروض الشقة حاجي فيها اصحابها بعد العيد قال لى حاجيلك عريية حيكون فيها محمود الحواتكى ... خرجنا الساعة اربعة صباحا ولكننا لم نلتق بهم .. والمدينة كانت اختفت أضواؤها .. ما وجدناهمش وما شفتناش العريية فى المكان المحدد بعد ذلك أنا أبلغت ابراهيم وقتل له أن ما حصلش التقاء ، وبعد كده جه ابراهيم واخده ونزل ومشى الساعة ثمانية مساء ..

**الرئيس -** ألم يثر هذا فى نفسك التفكير ؟

**الشاهد -** واحد عاوزين يتحفظوا عليه ...

**الرئيس -** ليه ناس مخصوصين يتحفظوا عليه ؟

**الشاهد -** هو كان خايف ...

**الرئيس -** كان خايف ، وماكنش بيخرج وتأخذ العريية الساعة ثمانية مساء وتمشى من عند مدينة العمال ومخبى اسمه عليك .. كل ده ليه ؟ .. الحاجات ما تثرش فى نفسك التفكير ؟

**الشاهد -** شخص مهم ...

**الرئيس -** شخص مهم يعنى ايه .. رئيس حكومة مستخبى عندكم .. ايه يعنى .. رئيس الحكومة المنتظر أو القائد العام المنتظر ؟ .. قل لنا ايه أهمية الشخص ده ؟

**الشاهد -** ما أعرفش ...

**الرئيس -** الى انت حتصوره ايه ... قول لنا ايه اللى جال فى خاطرك ؟

**الشاهد -** عرفت انه شخص مهم ...

**الرئيس -** نهرو جه هنا ... ما شلتوهشى عندكم ليه .. ( ضحك )

**وكيل النائب العام -** عارف ودوه فين ؟

الشاهد - راح كدراسة ...  
وكيل النائب العام - عمل ايه ؟  
الشاهد - كان فيه معسكر .  
وكيل النائب العام - معسكر ايه ؟  
الشاهد - الاخوان المسلمين علشان التدريب ...  
وكيل النائب العام - لتدريبهم يعنى ؟  
الشاهد - ده اللى استنتجته بعد ذلك ...  
الرئيس - ايه معسكر كدراسة ده ؟  
الشاهد - كان فيه معسكر وقالوا لنا انكم حاتروحوا فيه ..  
ولكن ما رحناش ...  
الرئيس - ليه ؟  
الشاهد - ما أعرفشى ...  
الرئيس - ما فكرتش فى دى كمان وما سألتش ليه البوايس  
قفل المعسكر ؟  
الشاهد - يمكن حاجة غير مرغوب فيها ... المفروض ان  
الاخوان بيعملوا معسكرات فى كل حتة .. فى حلوان .. وفى كل  
حتة ..  
الرئيس - يعنى ما تعرفش ليه غير مرغوب فى هذه  
المعسكرات ؟  
الشاهد - ما أعرفشى ..  
الرئيس - يعنى انت فهمت لما البوايس هجم على معسكرات  
كدراسة ان هذه المعسكرات غير مرغوب فيها ؟  
الشاهد - ايوه .. وانا رحى مرة فى معسكر حلوان ...  
الرئيس - خفية ؟  
الشاهد - لا ... علنا .....  
الرئيس - المعسكرات دى كانت معمولة تحت ستار

الكشافة ؟

الشاهد - لا ...

الرئيس - ومعسكر كرداسة كان شكله ايه ■

الشاهد - ما شفتوش ...

الرئيس - ولا سمعتش عنه حاجة ؟

الشاهد - لأ سمعت ...

الرئيس - الطلقات اللى أعطيتها لمحمود عبد اللطيف كانت

منين .. ؟

الشاهد - من عبد الحميد البنا .. أخويا راح جابها بالعجلة

.. سبع دقائق رايح وسبع دقائق جاى ...

الرئيس - كان فيه كلمة سر بينكم ■

الشاهد - أيوه ... قلت له يقول : « سيد كامل » ..

الرئيس - سيد كامل ... ؟

الشاهد - أيوه يافندم ...

المدعى - تعرف شخص اسمه سامى الكومى ■

الشاهد - أيوه ...

المدعى - ايه علاقته ... ايه وظيفته فى الاخوان ■

الشاهد - ده وكيل نيابة فى شمال القاهرة ، وكان يبجى

معانا فى اجتماعات ادارة المنطقة ، ورايه استشارى لان وظيفته

تمنعه من القعاد مع الاخوان .. ومثلا .. كان حاضر فى الاجتماع

اللى تم فيه اجراء الانتخابات فى الاخوان ...

المدعى - كان بيحضر فى الجماعات ؟

الشاهد - ما اعرفشى ...

المدعى - وكان عارف حاجة عن الدخيرة اللى كانت فى بيت

عبد الحميد البنا ■

الشاهد - أيوه .. وانا اللى قلت له عليها ...

**وكيل النائب العام -** لما جالك محمود عبد اللطيف الصبح  
وطلب منك العشر طلقات ، ألم تشك في الغرض اللى طلب من  
أجله الطلقات ؟ مش يجوز أنه يروح يقتل واحد .. مش تخاف  
على نفسك من المسئولية ؟

**الشاهد -** اطلاقا ما أعرفشى ..

**وكيل النائب العام -** قعد محمود عبد اللطيف عندك أد إيه ■

**الشاهد -** حوالى تلت ساعة ، وكان يياكل ...

**وكيل النائب العام -** قابلت يحيى سعيد بعد ما سمعت  
بالحادث ؟

**الشاهد -** آه .. ليلتها ...

**وكيل النائب العام -** ليلتها قال لك إيه ؟

**الشاهد -** من أى ناحية ؟

**الرئيس -** أى ناحية تعرفها انت ...

**الشاهد -** قلت له ... أنا كنت قلت له الكلام اللى دار بينى

وبين هنداوى ، وقلت له أنا رحت لهنداوى وقلت لهنداوى إيه

ده .. إيه ده فهو وشه اتغير وعرق .. وقال الناس المسئولين

هم اللى عملوا كده مش أنا ...

**وكيل النائب العام -** وليه قلت ليحيى سعيد الكلام ده ؟

**الشاهد -** علشان أنا كنت بعث له محمود ياخذ منه

الشنطة ...

**الرئيس -** شعبة الجيزة مين رئيسها ؟

**الشاهد -** الدكتور مصطفى عبد الله .. وكان الحاج حسنى

قبله ...

**الرئيس -** كنت بتروح الهرم علشان إيه ؟

**الشاهد -** ما رحتش ...

**الرئيس -** ولا مرة ■



الشاهد - لا يافندم ...

الرئيس - مين كان يجيب لك المنشورات ؟

الشاهد - حسين شعبان .. والمرشد كان يعطيها لهنداوى

وهنداوى يديها لشعبان ...

الرئيس - باين من كلام أعضاء الجهاز السرى ان كل واحد

يبتصل من المسئولية ويرميها على اخوه .. ده اللى تعلمتوه فى

« آل عمران ؟ .. » آل عمران علمتكم الجبن الادبى ؟

الشاهد - انا باقول اللى كسبته .. انا قلت اللى لى « والى

على » .. وقلت عن اخويا انى بعته علشان يجيب الشنطة ..

الرئيس - وايه اللى كسبته ؟

الشاهد - يعنى الحاجات اللى عملتها ..

الرئيس - وده اسمه مكسب ؟

الشاهد - كل نفس بما كسبته رهينة ...

الرئيس - رهينة ؟

الشاهد - ايوه .. يعنى انا اقصد المكسب من الناحية دى ..

الرئيس - الادعاء فيه أسئلة ثانية ؟

المدعى - لا .. مفيش ..

الرئيس - الدفاع ...

الدفاع - ايوه - لو سمح لى السيد الرئيس ...

الرئيس - اتفضل ..

الدفاع - موجها كلامه للشاهد - انت شاهد اثبات على

محمود عبد اللطيف -

الشاهد - ايوه ممم

الدفاع - محمود عبد اللطيف درس خريطة امبابه كما

درستها انت ؟

الشاهد - لا ...

- الدفاع -** لماذا درست انت خريطة امبابه ..
- الشاهد -** المفروض ان الاخوان المسلمين يكملوا النقص اللى فينا .. يعنى تبقى عندنا معلومات عامة ...
- الدفاع -** أنا لم أدرس خريطة امبابه ، فهل تعتبرنى ناقص المعلومات ؟
- الشاهد -** أنا عايش فى امبابه .. ودراسة الخرائط دى عبارة عن معلومات عامة فى أثناء دراستها الواحد يتعلم تاريخ وجغرافيا .. ده المفروض وأنا كنت بأدرس جغرافيا وتاريخ وحساب ، ودى معلومات عامة ..
- الدفاع -** هل واضح فى هذه الخريطة مركز قسم البوليس ؟
- الشاهد -** دى خريطة بتاعة مصلحة المساحة ..
- الدفاع -** ايه الاماكن اللى استقر نظرك عليها ؟
- الشاهد -** شوارع منطقة امبابه ..
- الدفاع -** التى تؤدى الى ايه ؟
- الشاهد -** أنا مثلا كنت امين الصندوق ، وكنت باروح فى المناطق دى ، وعلشان كده كنت بأدرس الاماكن كويس ..
- الدفاع -** أفهم من ذلك أنك درست الخريطة لتستطيع الوصول الى منازل الاخوان ؟
- الشاهد -** علشان أعرف السكة كويس ..
- الدفاع -** ما هى المبالغ التى أخذها محمود عبد اللطيف ؟
- الشاهد -** آخر مبلغ كان خمسة جنيه ...
- الدفاع -** هل تستطيع - لمصلحة العدالة - أنك تقول لنا عن المبالغ اللى أخذها محمود عبد اللطيف لوحده ؟
- الشاهد -** مرة هندأوى قال لى اديله اثنين جنيه .. ومرة خمسة جنيه .. وهو متعود ياخذ فلوس ...
- الدفاع -** بياخذ من فلوسك ولا من فلوس الاخوان ؟

**الشاهد -** من فلوس الاخوان ...

**الدفاع -** أنت عضو في الاخوان .. ألم تكلف نفسك التفكير

.. ليه بيدوله من فلوس الاخوان ؟

**الشاهد -** لان محمود عبد اللطيف حالته بسيطة .. هو

سباك وفقير وله ثلاثة اولاد ، وكان هنداوى بيساعده ..

**الدفاع -** في حدود تقديرك ... ما هي المبالغ التي أعطيت

لمحمود عبد اللطيف ؟

**الشاهد -** خمسة جنيه مرة ، واثنين جنيه مرة .. وخمسة

جنيه آخر مرة ...

**الدفاع -** المصروفات بتاعة الاخوان فيها بند خاص بالاحسان

على اعضائها ؟

**الشاهد -** ايوه ...

**الدفاع -** عدد اللى بتحسبوا اليهم أد ايه ؟

**الشاهد -** اربع افراد ..

**الدفاع -** مين هم ؟

**الشاهد -** محمود عبد اللطيف ، وعباس ...

**الدفاع -** عباس حجاج ؟

**الشاهد -** ما عرفشى بقيت اسمه ... وهو طالب فقير ...

وواحد من العمال مرة هنداوى قال لى اصرف له فلوس لانه

عيان وعنده سل ، فاعطيته اثنين جنيه ...

**الدفاع -** والرابع ؟

**الشاهد -** لا أذكره ...

**الدفاع -** القيمة الشهرية أد ايه اللى بتصرفها احسان ؟

**الشاهد -** دى حاجة مش ثابتة ...

**الدفاع -** تختلف من كام لكام يعنى ؟

**الشاهد -** حسب الظروف وحسب الحالات المطلوبة ...

**الدفاع - طيب ...**

**الرئيس -** قول لنا ايه حكاية امشورات ؟ ... آخر منشور مثلا كان ليه ؟

**الشاهد -** ده كان من المرشد للاخوان ...

**الرئيس -** كان بيقول فيه ايه .. ؟

**الشاهد -** ده كان فيه خطاب للاخوان ، والخطاب اللي بعته

للرئيس جمال عبد الناصر ...

**الرئيس -** ايه خطابه للاخوان .. ؟

**الشاهد -** مش متذكر ...

**الرئيس -** ازاي مش كنت لازم تحفظه ؟

**الشاهد -** اظن الخطاب ده كان فيه معاني الصبر ..

**الرئيس -** ده كان منشور سرى جاي لك من المرشد العام ..

مش لازم تتذكره ؟

**الشاهد -** اصل انا كنت مشغول خالص ...

**الرئيس -** كنت مشغول خالص ؟

**الشاهد -** ايوه . . . طيب شويه كده والله . . . بس انا

عاوز اتذكره ...

**الرئيس -** على مهلك ... اجيب لك فنجان قهوه ؟

**الشاهد -** آه ... خطاب للهيئة التأسيسية ... كان بيقول

فيه ... على اى حال الخطابات دى كلها موجودة وممكن  
سيادتك تطلع عليها .

**الرئيس -** انا عارف انها موجودة ، ولكن انا عاوزك انت

تقول لى كان فيها ايه ؟

**الشاهد -** لا اذكر ...

**الرئيس -** طيب والمنشورات اللي قبل منه ؟

**الشاهد -** كان بتاع ... « هذه الاتفاقية لن تمر » ... وانا

بعد مآقراته تضايقت جدا وقطعته ...

**الرئيس** - كتر خيرك ... كان فيه ايه ؟

**الشاهد** - كلام كله هراء وكذب

**الرئيس** - كلام الجماعة هراء وكذب .

**الشاهد** - لا أعتقد انه بتاع الاخوان ...

**الرئيس** - كلام المرشد هراء ؟

**الشاهد** - كلام فارغ يافندم ...

**الرئيس** - مين اللي سلمهولك ؟

**الشاهد** - هنداوى ... الواحد كان أعمى فى الأول ...

**الرئيس** - نرجع للاول لما كنت مغمى ...

**الشاهد** - دلوقت الواحد شاف الحقيقة كويس ...

**الرئيس** - عاوزين نرجع لما كنت أعمى لسه ..

**الشاهد** - كلام كذب ...

**الرئيس** - ايه هو الكلام ده .. عاوزين نعرف الكلام ده

... احنا مش بنقول دافع عن هذا الكلام ؛ والا ايه رأيك فيه ؟

احنا عاوزين نعرف الكلام نفسه ..

**الشاهد** - أنا متذكر العنوان نفسه اللي هو « هذه الاتفاقية

لن تمر » ولكن الكلام لا أذكره ...

**الرئيس** - وايه تانى فى المنشورات دى ... ؟

**الشاهد** - دى خطابات كانت بتيجى بكثرة من المرشد

للأخوان يوصيهم فيها بالصبر ...

**الرئيس** - وايه تانى فى المنشورات دى ... ؟

**الشاهد** - ده اللي أذكره .

**الرئيس** - والصبر ده عاوز منشورات ولا مقالة فى الجرنال ؟

**الشاهد** - على أى حال ؛ ممكن لسيادتك أنك تطلع على

المنشورات دى ...

**الرئيس -** انا كنت باطلع عليها اول بأول . وعارفها اكثر منك . .

**الرئيس -** والتعليمات سبقها . . الاوامر المستديمة

**الشاهد -** ايوه . .

**الرئيس -** ايه هي تقدر تقول لنا حاجة عنها ؟

**الشاهد -** . . .

**الرئيس -** عندكم تعليمات واوامر مش كده ؟

**الشاهد -** دى اول مرة اسمع عنها .

**الرئيس -** انت مش رديف لهنداوى ؟

**الشاهد -** انا بقالى شهر مع هنداوى وما أفهمش حاجة

وهنداوى اخذ محمود من جماعتنا وقال مالکش دعوه بيه واحنا

مظلومين والله العظيم وهات هنداوى علشان اقول له الكلام ده

فى وشه .

**الرئيس -** مين اللى كان يفتش على الاسلحة ؟

**الشاهد -** سيد الرئيس .

**الرئيس -** مين ده ؟

**الشاهد -** من بين السرايات .

**الرئيس -** بيجى يفتش على الاسلحة ليه ؟

**الشاهد -** كان بيجى يشوف السلاح صانع اول .

**الرئيس -** شغلته ايه ؟

**الشاهد -** ما اعرفش .

**الرئيس -** واحد بيجى يفتش على الاسلحة يبقى شغلته

ايه فى الجهاز ؟

**الشاهد -** يبقى لازم مفتش اسلحة .

**الرئيس -** عندك حاجة تانية عايز تقولها ؟

**الشاهد -** احنا مظلومين انا واخويا ووالدتى . . .

**الرئيس -** ما تقولش كده - انا ماليش دعوه بوالدك ووالدتك

واخواتك .. هو الاسلام قال كدد .

**الشاهد** - انا واخويا ووالدى ميت .

**الرئيس** - اتبعوا مبدأ الاسلام علشان تطلعوا شرفا على الاقل

**الدفاع** - الاسلام بيقول كل نفس بما كسبت رهينة .

**الشاهد** - ربنا يخليكم ويؤيدكم ...

**الرئيس** - مش عاوزين دعاك .. فيه مثل بيقول لا ام قوبق

طاهره .. ولا دعاها مستجاب اتفضل مع السلامة .

( انصرف الشاهد )

**الرئيس** - الشاهد الذى يليه .

**المدعى** - حامد عبد الفتاح نويتو .

( نودى على الشاهد فحضر )

**الرئيس** - اسمك ايه ؟

**الشاهد** - حامد عبد الفتاح نويتو .

**الرئيس** - بتشتغل ايه ؟

**الشاهد** - طالب ومطبعجى .

**الرئيس** - طالب ومطبعجى ؟

**الشاهد** - طالب فى الثقافة .

**الرئيس** - ومطبعجى فين ؟

**الشاهد** - فى مكتبة الجامعة .

**الرئيس** - سنك كام سنة ؟

**الشاهد** - ٢٣ سنة .

**الرئيس** - عارف ده ايه ؟

**الشاهد** - ايود مصحف .

**الرئيس** - قل والله العظيم اقول الحق ولا شئ غير الحق

والله على ما اقول شهيد .

( أقسم الشاهد اليمين ) .

**الرئيس - المدعى .**

**المدعى -** هل أنت عضو في جماعة الاخوان المسلمين ؟

**الشاهد -** ايوه .

**المدعى -** ايه عملك اللي بتقوم به في الجماعة ؟

**الشاهد -** ثغاية مارس سنة ١٩٥٤ كنت عضو عادى خالص وبعدين مصطفى الوردانى نائب الشعبة ادانى معاد اروح له في البيت وكنت جاى من المعهد الساعة ٨.٣٠ ورحت له البيت لقيت حلمى وحسن عبد العظيم ويوسف السيد وجه بعد كده حسن عبد المنعم ومصطفى الوردانى قال لنا كلنا أن فيه نظام عندنا في الاخوان ننتقى من الاخوان العاديين اخوان نحطهم في جماعات وتدريبهم على أسلحة ونخفيهم لما الحكومة تحتاجهم في حرب فلسطين أو القتال فاحنا ندرّبهم ونخليهم لوقت الحاجة والحكومة تساعدنا في الحاجات اللي نعوزها فقلت له طيب مادام دى حاجة فيها استشهاد في سبيل الله مفيش مانع .

**الرئيس -** يا سلام .

**الشاهد -** كده والله يابيه

**الرئيس -** الاخوان بيعلموكم يابيه دى ؟

**الشاهد -** نعم .

**الرئيس -** الدين الاسلامى فيه يا بيه

**الشاهد -** لا .

**الرئيس -** آمال بتخالف الدين الاسلامى وتقول يا بيه ليه ؟

**الشاهد -** ماخدتش بالى يافندم .

**الرئيس -** طيب خد بالك من فضلك .

**الشاهد -** احنا كنا أخذنا ميعاد من حسن عبد المنعم ورحنا

في يوم معين عنده في البيت وكنت أنا ويوسف وحسن عبد العظيم وحلمى عرفه واجتمعنا عند حلمى في اليوم ده .. مش فاكر



اجتمعنا عنده أو عند حسن فقال قبل أى حاجه لازم تقوى روحنا المعنوية ونحفظ سورة آل عمران وتفسيرها ونأخذ سيرة ونخشى فى البرنامج الروحى ده فى الاول ومشينا على كده أربع اجتماعات وبعدين انضم الينا سامى الكومى وهو وكيل نيابة وعبد الحى وأحمد حجازى وقال دول حبيقوا معاكم فى الجماعة وسامى الكومى كان يقوم بالتفسير وكانوا يجيبوا لنا منشورات ندرسها وبعدين جت فترة الامتحانات وأنا وحسن عبد المنعم وحلمى عرفه كنا بنذاكر فأخذنا أجازة شهر ونصف وبعدها اجتمعنا ثانى وكانت المنشورات بتيجى وكان فيها حاجات غامضة كان هندأوى ييجى يشرحها وجه مره واحد اسمه محمد عاكف علشان يتعرف علينا وقال كل واحد يقول اسمه وبishtغل فىن ومتجوز أو أعزب وعنده أولاد أو لا ومشى عاكف وبعدين حسن عبد المنعم جه بدانا نجتمع وحلمى عرفه اتخلف بعد اجتماعين أو ثلاثة وبقينا نروح عند أحمد حجازى ويوسف عند حسن عبد المنعم وعبد الحى إبراهيم ومره فى الاجتماعات جاب لنا حسن منشورات ومسندس وأنا كنت جيت فلقيت حسن ماسك مسندس وبشرح فيه ولما خلص خده يوسف السيد وياه ومشينا وكانت بتجيلنا المنشورات ولغاية تقريبا قبل كده بشهر ونصف أو شهر ما اجتماعناش لأن الاخوان كان فيه خلاف بينهم وبين الحكومة وضد بعضهم وكان جه ميعاد امتحان حسن عبد المنعم فى الجامعة وبقالنا شهر ونصف تقريبا زى كده وكانت المنشورات بتجيلنا نوزعها وفيها حاجات عن المعاهد وحاجات زى كده . ده اللى أعرفه .

**المنعى -** ايه الغرض من التعليمات الروحية أولا ثم المسدسات؟

**الشاهد -** كانوا يقولوا علشان حنحتاجكم فى حرب فلسطين

أو القنال أو خارج البلاد وبندربكم علشان تكونوا مستعدين لما نقول لكم واحنا بقالنا ٣ أشهر ونصف أو أربعة من مارس واخذنا اجازة شهر ونصف للامتحانات والله العظيم ما نعرف غير كده وهم صحيح قالوا لنا حندربكم ولكن ما حصلش .

**المدعى -** انت قلت في اجابتك على هذا السؤال في التحقيق ان القرض كان شيل الحكومه دى وحكم البلد بالقرآن بأن تحصل ثورة ويستولى الاخوان على الحكم مش كلامك ده ؟

**الشاهد -** لا والله مش فاكرك .

**الرئيس -** ولا حلد منكم فاكرك حاجه .. لا تعاليم القرآن ولا تعاليم الدعوه .. دى مش امضاءك ؟

**الشاهد -** أيوه .

**الرئيس -** انت راخر زى أخوك مضيت من غير ما تقرأ .

**الشاهد -** لا .

**الرئيس -** الحمد لله ... وايه حكاية المسدس اللى جابوه وفكوه قدامكم ؟

**الشاهد -** أنا كنت ساعتها رحت أجيب قلمين من البيت ورجعت لقيت حسن يشرح فيه وبعدين أخذه يوسف وروح فاستنتجت ان مادام يوسف أخذه يبقى بتاعه ولكن ما اعرفش ان كان حسين أو يوسف هو اللى جابه .

**وكيل النيابة -** تعرف ان فيه أسلحة جات للفصيلة فى امبابه ؟

**الشاهد -** مره كنت عند هنداوى وقال روح لمحمود عبد اللطيف أنه له فرحت ومعايا محمد نجيب .

**الرئيس -** محمد نجيب مين ؟ رئيس الجمهوريه ؟

**الشاهد -** محمد نجيب راغب ورحنا له فقال طيب ورجعت فهنداوى ادانى شنته وقال لى خد الشنته دى روح بها المخزن

فقلت له مخزن ايه فقال بس روح قول لاخوك هنداوى باعت  
الشنطة دى وبيقول وديها المخزن وأخويا قال لى روح الوراق  
عند واحد اسمه عبد الحميد البنا وقول له سيد كامل واعطيه  
الشنطة فرحت وقت العشا مالمقيتوش فى البيت فسبته خبر  
ييجى عندنا وجه وأخذ الشنطة على بسكليت ورحت معاه  
وصلته والشنطة كان فيها ( برتين ) ومش معقول أبدا احنا  
نعملها ضد المصريين هنا بل فى فلسطين او القنال وأنا رحت  
وصلته بالعجلة ورجعت ودى أول مره رحت فيها .

**الرئيس -** عبد الحميد البنا بيقول انه كان عيان فى البيت  
وانت اللى رحت له .

**الشاهد -** لا . . حضرة المحقق يجيبه قدامى ويشوف اذا  
كنت كذاب . . يوم ما كان عيان ده مره ثانية وده كان فى الصبح  
الساعة سبعة الا ثلث صباحا ندهنى أخويا وقال لى خد الطلقه  
دى وهات زيها من عند عبد الحميد فرحت له . وماكنتش اعرف  
طريقهم وفتحنا الشنطة وقعدنا نفرزهم سوى ويومها كان  
محمود عبد اللطيف قاعد بياكل مع أخويا . وأنا سبتهم ورحت  
أكلت لوحدى ولبست وخرجت على شغلى .

**وكيل النيابة -** محمود عبد اللطيف كان عايز العشر طلقات  
علشان ايه ؟

**الشاهد -** ماقاليش أخويا هو قال روح هات ١٠ زى  
دول وتعالى .

**وكيل النيابة -** أخوك كان عارف ؟

**الشاهد -** ما أعرفش .

**الرئيس -** مقالش لك ان محمود مسافر ؟

**الشاهد -** لا والله .

**الرئيس -** جالك منشورات فى الاجتماعات ؟

الشاهد - أيوه .

الرئيس - زى ايه ؟

الشاهد - كانت تيجى حاجات نظرية وكان هنداوى

بيجى يشرحها لنا .

وكيل النيابة - عن ايه ؟

الشاهد - تكتيك حرب العصابات وهنداوى كان يشرحها لنا

وشرح لنا البرتا .

الرئيس - ما اتدربتش ؟

الشاهد - لا ماكانش جه دورى فى التدريب .

الرئيس - ماكانش فيه منشورات سياسية ؟

الشاهد - أيوه .. انا قلت ان فيه منشورات بتيجى عن

المعاهدة وحاجات زى دى

الرئيس - كنت بتكلفوا بتوزيع المنشورات ؟

الشاهد - أيوه .

الرئيس - وانت وزعت منشورات

الشاهد - أيوه .

الرئيس - فين ؟

الشاهد - فى الجامعة .

الرئيس - كام مره ؟

الشاهد - ٣ مرات .

الرئيس - كام منشور ؟

الشاهد - حوالى عشرة .

الرئيس - بتوزعهم ازاي ؟

الشاهد - باليد .

الرئيس - كان فيها ايه ؟

الشاهد - حاجات ضد الحكومة وكنا بنوزعها .

الرئيس - عندك دراية بالاسلحة ؟

الشاهد - لا يا فندم .

الرئيس - اش عرفك انها برتا ؟

الشاهد - ماهو مدفع رشاش .

الرئيس - اش عرفك ان البرتا تبقى مدفع ومدفع رشاش ؟

الشاهد - انا اعرف ان فيه البرتا والبرن واللانكستر .

الرئيس - عرفت الحاجات دى منين . . سمعتها منين ؟

الشاهد - بنقرأ فى الجرائد كل يوم .

الرئيس - الجرائد بتذكر اسماء الاسلحة وانواعها ؟

الشاهد - بنقول عن الجيش وانه بيدرب على كذا . .

وكيل النيابة - عبد الحميد البنا كان عنده اسلحة ثانية ؟

الشاهد - ايوه كان عنده ٣ شنط .

وكيل النيابة - ماتعرفش فيها ايه ؟

الشاهد - لا .

وكيل النيابة - هو كان عارف ان فيها سلاح .

الشاهد - ماعرفش .

وكيل النيابة - مين اللى راح جاب العشر طلقات ؟

الشاهد - انا يا فندم وكان عنده عدة لف .

الرئيس - ايه هو الفرقان ؟

الشاهد - هو القرآن .

الرئيس - اשמعنى سموه الفرقان ؟

الشاهد - علشان بيفرق بين الحق والباطل .

الرئيس - برافو . . وسورة آل عمران قالت كمان ؟

الشاهد - فى ايه يا فندم .

الرئيس - ايه الدروس اللى طلعت بيها من سورة آل عمران ؟

الشاهد - كنت حفظت ٢٠ او ٢٥ آية وماكملتش .

- الرئيس -** ايه الدروس اللى طلعت بيها من الآيات دى ؟
- الشاهد -** اننا نعامل ربنا كويس .
- الرئيس -** وانت تقدر تعامل ربنا وحش ؟
- الشاهد -** لا يا أفندم .
- الرئيس -** يعنى ماطلعش من ۳۵ آية الا بانك تعامل ربنا كويس وتعامله كويس ازاي ؟
- الشاهد -** نصلى .
- الرئيس -** وتشيلوا برتات ومدافع وتوزع منشورات .
- الشاهد -** والله انا غلبان ولا كنت اعرف النظام ده واسرتى مالهش الا انا واخويا .
- الرئيس -** ماتشد نفسك . . الظاهر انت واخوك طراى . . لو كنت اتعلمت التكتيك العنيف كنت جمدت .
- الشاهد -** والله يا أفندم ابدا ولو كنت اعرف انها كده ماكنتش دخلت فيها .
- الرئيس -** شد نفسك امال واقف زى الناس .
- المدعى -** ذكرت انكم جات لكم منشورات عن حرب العصابات وحسن ماقدرش يشرحها فجه هنداوى شرحها لكم ايه المقصود من حرب العصابات اللى درستوها ؟
- الشاهد -** لما نخلص معركة فى قرية من القرى ونظهر البيوت والمبانى من الالغام وحاجات زى دى يا أفندم .
- المدعى -** ده فى الدفاع او الهجوم ؟
- الشاهد -** تفتيش المنازل او الحراسة .
- الرئيس -** منازل مين ؟
- الشاهد -** لما نكون خلصنا معركة فى قرية من القرى وفيها بيوت جماعة تقتحم وجماعة تظهر الالغام وحاجات زى كده . .
- الدفاع -** كانوا بيدوكم فلوس ؟

- الشاهد** - لا يا افندم والله كنا بتدفع اشتراكات شهرية .
- الرئيس** - كنت بتجيب الفلوس منين ؟
- الشاهد** - من القبضية بتاعتي
- الرئيس** - بتاخذ كام ماهية ؟
- الشاهد** - يوميتى ٣ قرش .
- الرئيس** - يعنى بتاخذ فى الشهر كام ؟
- الشاهد** - حوالى ١٢ جنيه .
- الرئيس** - والله ما تستاهل ١٢ مليم .
- الشاهد** - كانت ماهيتى الاصلية ٩ جنيه وبعدين زدت واخذنا الكادر بتاعنا كده .
- الدفاع** - وكنت بتدفع اشتراك كام ؟
- الشاهد** - عشرة قروش فى النظام العادى وخمسة عشر قرشا فى النظام الخاص .
- الدفاع** - اخوك كان فى ايده ميزانية ؟
- الشاهد** - ايوه . . كان امين صندوق .
- الرئيس** - بقى انت شكل واحد بياخذ من الدولة ١٢ جنيه .
- الشاهد** - كنت باخذ ٩ جنيه قبل كده وبعدين زدت بقالى حاجة بسيطة .
- الرئيس** - بتشتغل ايه ؟
- الشاهد** - مطبعى .
- الرئيس** - مطبعى ايه ؟
- الشاهد** - فى ورشة التجليد بمكتبة الجامعة .
- الرئيس** - كنت بتجلد كام كتاب فى اليوم ؟
- الشاهد** - كنا ثلاثة او اربعة فى العملية كان فيهم ٣ يقوم بالمرمه بتاع الكتب واثنين . .
- الرئيس** - انتم خمسة او ثلاثة ؟

**الشاهد - خمسة**

**الرئيس -** طيب مع السلامة .

**الشاهد -** والله تعملوا معروف وأرافوا بحال الاسرة مالها

غيرى انا واخويا ربنا يخليكم .

**الرئيس -** كلمة واحدة .. مع السلامة .

( انصرف الشاهد ) .

**الرئيس -** ترفع الجلسة للاستراحة .

( رفعت الجلسة في الساعة الحادية عشرة والدقيقة الاربعين

صباحا ) .

( أعيدت الجلسة في الساعة الثانية عشرة والدقيقة الخامسة

والعشرين مساء ) .

**الرئيس -** فتحت الجلسة .. المدعى .. الشاهد الذى يليه

**المدعى -** اسماعيل محمود .

( نودى على الشاهد فحضر )

**الرئيس -** اسمك ايه ؟

**الشاهد -** اسماعيل محمود يوسف .

**الرئيس -** سنك كام سنة ؟

**الشاهد -** ٣٠ سنة .

**الرئيس -** بتشتغل ايه ؟

**الشاهد -** مدرس .

**الرئيس -** مدرس ايه ؟

**الشاهد -** مدرس مواد اجتماعية .

**الرئيس -** متخرج منين ؟

**الشاهد -** من كلية الآداب .

**الرئيس -** فى مدرسة ايه ؟

**الشاهد -** فى مدرسة عباس الاعدادية .



الرئيس - تعرف ده ايه ؟

الشاهد - مصحف .

الرئيس - قل والله العظيم اقول الحق ولا شيء غير الحق  
والله على ما اقول شهيد .

### اقسم الشاهد اليمين

الرئيس - المدعى .

المدعى - هل انت عضو في جمعية الاخوان ؟

الشاهد - نعم .

المدعى - في اى منطقة ؟

الشاهد - في الجيزة .

المدعى - ايه العمل بتاعك اللي كنت بتقوم بيه ؟

الشاهد - من شهرين لم يكن لى عمل معين ولكن حينما

اعتقل رئيس المنطقة الاستاذ يوسف هارون قمت بعمله .

الرئيس - زعق شويه .

الشاهد - حاضر .

الرئيس - انت بتدرس ايه . . عندك كام تلميذ في الفصل ؟

الشاهد - ٤٠ .

الرئيس - عايزين الاربعين واحد يسمعوا .

الشاهد - حاضر .

المدعى - ايه العمل اللي كنت بتقوم بيه ؟

الشاهد - كنت اشرف على الشئون الادارية في المنطقة بدل

الاخ يوسف هارون . لما اعتقل .

المدعى - عملك كان ايه ؟

الشاهد - الناحية الادارية .

المدعى - يعنى بتعمل ايه ؟

**الشاهد** - الاشراف الادارى .

**المدعى** - يعنى مفيش نشاط سرى خاص بالجماعات والفصائل ؟

**الشاهد** - كنت اعرف .. ولكن ماكنتش مسئول عنه .

**المدعى** - ايه معلوماتك عنه ؟

**الشاهد** - كنت اعلم أن فيه نظام خاص برياسة الاخ

محمود الحواتكى .

**المدعى** - كان عمله ايه ؟

**الشاهد** - رئيس فصيلة .

**المدعى** - مكونة ازاى الفصيلة ؟

**الشاهد** - ؟ مجموعات .

**المدعى** - والمجموعة مكونة ازاى ؟

**الشاهد** - المجموعة مكونة من ٧ افراد .

**المدعى** - واجبهم ايه ؟

**الشاهد** - ما اعرفش .

**المدعى** - افراد المجموعات يعرفوا بعض ؟

**الشاهد** - ما اعرفش .

**المدعى** - الاخوان يعرفوهم ؟

**الشاهد** - ما افكرش .

**المدعى** - تعرف رؤساء المجموعات ؟

**الشاهد** - ايوه لعرفهم .

**المدعى** - مين هم ؟

**الشاهد** - صلاح أبو الخير وتوفيق شلبى وعبدالفتاح موسى .

**المدعى** - ايه نشاط الجماعات دى .. ماسمعتش اخبار عن

نشاط حقوم به الاخوان .

**الشاهد** - ايوه سمعت كان فيه اخ فى يوم قال ان فيه نشاط

والاخ ده كان حلقة اتصال

الرئيس - انت بتقول انك فى المنطقة بس .

الشاهد - ايوه .

الرئيس - اش عرفك برؤساء المجموعات ؟

الشاهد - من الاخ محمود الحواتكى عرفنى بيهم .

الرئيس - قال لك ايه ؟

الشاهد - محمود الحواتكى كان مشغول وقال لى تجتمع

بيهم .

الرئيس - علشان ايه ؟

الشاهد - اجتماعات اسبوعية علشان ماتنقطعش الصلة بينهم

الرئيس - كنت بتجتمع معاها علشان ايه ؟

الشاهد - الدراسات .

الرئيس - وبعدين ؟

الشاهد - وبس .

الرئيس - اشمعنى رؤساء المجموعات ؟

الشاهد - ..... .

الرئيس - قول لنا ايه الى فهمه لك ؟

الشاهد - عرفنى بيهم وقال لى دول رؤساء المجموعات فى

الجيزة وهو كان اتخرج من معهد التربية ومشغول فى مسألة

تعيينه واخذ أجازة علشان يخلص مسألة التعيين فقال لى خد

بالك منهم وبعدين يبقى يستلمهم ثانى منى .

الرئيس - وبعدين ؟

الشاهد - وبس ... ده من حوالى شهر .

الشاهد - ايوه .

الرئيس - ومسكت محله ؟ وبعدين ؟

**الشاهد -** كنت التقى بهم اسبوعيا لحفظ القرآن والدراسة  
وده كل اللى حصل فى هذا الشهر .

**الرئيس -** ايه حكاية حلقة الاتصال ؟

**الشاهد -** كان فيه عضو معين مكلف بالاتصال .

**الرئيس -** اسمه ايه ؟

**الشاهد -** خليل .

**الرئيس -** خليل ايه ؟

**الشاهد -** ما اعرفش باقى اسمه وكان مكلف بالاتصال وتبلغ

اوامر الجماعة لنا وفى يوم ..

**الرئيس -** امتى ؟

**الشاهد -** قبل الحادث بخمسة ايام قال انه سمع من بعض  
الاخوان ان المسئولين بيفكروا فى القيام بحركة اغتياالات لأعضاء  
مجلس قيادة الثورة ويقوموا بحركة شعبية ... بعد كده أنا  
قلت له ان دى مسألة خطيرة ونزلت رحت لمحمود الحوانكى وقلت  
له فقال ان دى مسألة خطيرة ولازم أروح اشوف ايه الحكاية  
فنزلت واتصلت ببعض الاخوان المسئولين ورجع ومعاها الأخ  
عبد الفتاح القرشى وقال انه قابل أحد الاخوان المسئولين فقال  
له ان هذا الكلام ليس له نصيب من الصحة وان المرشد لا يوافق  
عليه وبناء عليه أنا اغلقت المنطقة ونهت على الاخوان أن كل واحد  
يقعد فى بيته وما يتلقاش تعليمات ودى آخر حاجه عملناها فى  
المنطقة .

**وكيل النائب العام -** خليل ده اللى كان يبلغك دائما التعليمات  
اللى تيجى من المركز العام عمله ايه أو وظيفته ايه ؟

**الشاهد -** كان خليل حلقة صلة بين منطقة الجيزة وبين  
المسئولين فى المركز العام .

**وكيل النائب العام -** الكلام اللى يبلغه أو التعليمات التى تبلغ

لكم من المركز العام بواسطة خليل وقال لك ان فيه خطة وضعت  
لاغتيال اعضاء مجلس قيادة الثورة . هل هذا عبارة عن تبليغ من  
المركز العام أو تعليمات ؟

**الشاهد -** لم يقل ان هذا تبليغ انما هو قال انه سمع ان  
الاخوان حيعلولوا كذا وكذا وانا لم أستوضح منه هل هذا مبلغ  
لنا رسميا أو لا .

**وكيل النائب العام -** هل كان هو دائما يتصل بك للتبليغ ؟

**الشاهد -** هو المسئول عن التبليغ

**وكيل النائب العام -** وهو لما يقول ان فيه خطة أو تبليغ  
بيبلغها منين أو كان ينقل رأى مين لك ؟

**الشاهد -** من المسئولين في المركز العام .

**وكيل النائب العام -** وهو كان ينقله لك أو يبلغه لك بصفتك  
رئيس المنطقة أو رئيس الفصيلة ؟

**الشاهد -** أنا مش رئيس فصيلة ورئيس الفصيلة كان  
الحوانكى .

**وكيل النائب العام -** كنت رئيس فصيلة بالنيابة عن الحواتكى  
وكان يبلغك التعليمات بصفتك ايه وايه الى قال لك أو ايه الخطة  
التي بلغها لك خليل ؟

**الشاهد -** قال لى باختصار ان الاخوان ناويين يفتالوا بعض  
اعضاء مجلس قيادة الثورة وان الاخوان حيقيموا بحركة شعبية  
بعد هذا .

**وكيل النائب العام -** ماسألتوش ان الحركة الشعبية دى  
حتقوم ازاي ؟

**الشاهد -** قال لى انا لسه معنديش تفصيلات أكثر من هذا .

**وكيل النائب العام -** قال لك أنا ماغنديش تفاصيل وفى  
الوقت المناسب الاخوان حيبلغوك .

الشاهد - أيوه .

وكيل النائب العام - مين المسئولين اللى يتصل بهم خليل ؟  
الشاهد - انا لا اعرف المسئولين وانما اعرف انه يتصل  
بالمركز العام واشخاصهم لا اعرفهم .

وكيل النائب العام - طيب مين المسئولين عن النظام السرى ؟  
الشاهد - ما أعرفش .

وكيل النائب العام - ماتعرفش ابراهيم الطيب ؟  
الشاهد - أيوه .

الرئيس - وجه الكلام ليه . انتم مش علموكم النظام فى  
الجهاز السرى ؟

الشاهد - أيوه .

الرئيس - وعلموكم انكم تسمعوا الاوامر بدون ان تناقشوها .  
الشاهد - فيه مناقشة وابداء رأى .

الرئيس - وبعدين .

وكيل النائب العام - اين قابلت ابراهيم الطيب ومتى ؟

الشاهد - هوه دعا رؤساء المناطق فى اجتماع عشان تنظيم  
لجان لمساعدة اسر المعتقلين وهذه كانت آخر مرة فى منزل فى  
العباسية قبل الحادثة بعشرة ايام .

وكيل النائب العام - انت ماكلمتناش عن الخطة .

الشاهد - هو كلمنا عن تنظيم لجان لمساعدة اسر المعتقلين

وكيل النائب العام - بصفتك رئيس الفصيلة بالنيابة .

الشاهد - معرفش انما محمود الحواتكى كلفنى أن أقوم  
مقامه الى ان يعين فى الوظيفة .

وكيل النائب العام - هل من المفروض انه يخفى عليك الامر  
انت مش كنت قائم بعمل رئيس الفصيلة ؟

**الشاهد** - دى كانت حاجة خاصة بينى وبين محمود الحواتكى .

**وكيل النائب العام** - عملت رئيس فصيلة لمدة ادايه ؟

**الشاهد** - شهر الى ان تم تعيين محمود فى وزارة المعارف .

**وكيل النائب العام** - ماتعرفش مين المسئول عن رؤساء المناطق ؟ او رؤساء الفصائل يتصلون بمين ؟

**الشاهد** - معرفش غير خليل الذى يبلغنا التعليمات .

**وكيل النائب العام** - مين رؤساء المناطق الى حضروا اجتماع العباسية معاك ؟

**الشاهد** - لا اعرفهم لان هذه كانت اول مرة وآخر مرة .

**وكيل النائب العام** - اشرح الخطة التى بلغت اليك من خليل بالبدء فى اغتيال أعضاء مجلس قيادة الثورة .

**الشاهد** - هو بلغنى باختصار انه سمع بعض الاخوان يفكرون فى اغتيال أعضاء مجلس قيادة الثورة وبعدين الاخوان يقوموا بحركة شعبية فقلت له دى مسألة خطيرة وانا سمعت هذا الكلام فجيت ابغاك فانا اتصلت بمحمود الحواتكى فقال لى دى مسألة خطيرة ولازم اروح اشوف ايه الحكاية فنزل وكان معاه عبد الفتاح القرشى عشان يتصل بالمسؤولين وبعدين رجع وقال لى ده كلام غير صحيح والمرشد لا يوافق عليه وبناء عليه أغلقنا المنطقة .

**وكيل النائب العام** - الحركة الشعبية اساسها ايه او ايه هدف الحركة الشعبية ؟

**الشاهد** - ما اعرفش لانه ما ادايش تفاصيل خالص .

**وكيل النائب العام** - تقوم ازاى الحركة الشعبية افرض انه حصلت الاغتيالات والخطة اتنفذت يحصل ايه ؟

**الشاهد** - الحركة الشعبية تهتف بشخصية معينة عظيمة .  
**وكيل النائب العام** - مين ؟

**الشاهد** - استنتجنا ان الشخصية العظيمة دى هى اللواء محمد نجيب .

**الرئيس** - ( لاحظ ان الشاهد ينظر الى الادعاء ) أعوج رقبتك وبص لى .

**وكيل النائب العام** - استنتجت من ايه ؟  
**الشاهد** - يقول الهتاف حيكون لشخصية عظيمة فاستنتجنا ان الشخصية العظيمة ربما تكون اللواء محمد نجيب .

**وكيل النائب العام** - مقالش لك انه صدرت تعليمات لشخص معين للبدء فى تنفيذ الخطة .  
**الشاهد** - لا .

**وكيل النائب العام** - تعرف هنداوى دوير ؟  
**وكيل النائب العام** - ألم تقابله قبل سماع التعليمات ؟  
**الشاهد** - لا ما قابلتوش .

**الرئيس** - ايه فائدة النظام الخاص ؟  
**الشاهد** - الذى أعرفه انه تربية الشباب تربية فيها شيء من الخشونة وتربية من الناحية العسكرية بجانب التربية الروحية كالنط والقفز والجرى هذا كل الذى نفهمه عن النظام .

**الرئيس** - النظام الخاص علنى أو سرى ؟

**الشاهد** - معظم الاخوان لا يعرفوه .

**الرئيس** - يعنى يبقى سرى أو علنى ؟

**الشاهد** - سرى .

**الرئيس** - النط والقفز والتربية البدنية ايه السرية الى فيها .

**الشاهد** - مفيهاش سرية ؟



**الرئيس** - يبقى سرى ليه ؟

**الشاهد** - بقية الاخوان مايعرفوش هؤلاء الاعضاء .

**الرئيس** - ليه ؟ اذا كان الجهاز السرى ينشط ويتربى تربية

جسمانية سليمة فليه الاخوان الآخرين مايعرفوش .

**الشاهد** - اللى اعتقده انهم كانوا ينقوهم ولايقولون للآخرين

حتى لايقول الباقي اشـمـعنى تنقوا دول وتدريبهم تدريب

خاص ويقومون برحلات .

**الرئيس** - يعنى كان فيه خيار وفقوس فى الدعوة الاسلامية ||

**الشاهد** - هذا ما استنتجته ليه عملوها سرية علشان

الآخرين مايزعلوش .

**الرئيس** - يعنى كانوا يفضلوا او يميزوا ناس على ناس ؟

**الشاهد** - طبعا ده اللى اعرفه .

**الرئيس** - ده الغرض من السرية .

**الشاهد** - اللى استنتجته .

**الرئيس** - وحضرتك مدرس ||

**الشاهد** - ايوه .

**الرئيس** - اهلا وسهلا .... وايه الغرض من الفصائل

والمجموعات ؟

**الشاهد** - انا مكنتش فيها واللى اعرفه انها زى الشعب

بتاعة الاخوان .

**الرئيس** - طيب ليه تبقى سرية مش يبقى الغرض اللى

فهموهولكم عنها غير حقيقى ؟

**الشاهد** - انا قلت لحضراتكم ان الشهر اللى كنت فيه رئيس

فصيلة مؤقت لم يحصل فيه الا اربع اجتماعات عادية .

**الرئيس** - ايه السرية فى هذا النظام من ناحية التربية البدنية

فاستنتجت انها كانت سرية على الآخرين علشان مايقولوش

اشمعى وبعدن اشتغلت شهر رئيس فصيلة ومكنش فيه  
تربية بدنية يبقى اذن مفيش ما يدعو للسرية .

**الشاهد** - انا لم اقم بأى نشاط غير الاجتماعات العادية وعلى  
أساس انها حاجة مؤقتة لغاية ماييجى محمود ويستلمها .

**الرئيس** - ايه معلوماتك عن النظام السرى ؟

**الشاهد** - فيه شباب معين يختار من أفراد الشعب . ويكون  
وصل الى مرحلة معينة من التربية الجسمانية فيدرّب تدريب

فيه شىء من الخشونة العسكرية وعلى الرحلات .

**الرئيس** - ايه الغرض من التربية العسكرية ؟

**الشاهد** - للجهاد

**الرئيس** - جهاد ايه ؟

**الشاهد** - فى القتال وفلسطين كما كنت أظن .

**الرئيس** - فى القتال وفلسطين كما كنت تظن آمال كنت

تفتكر ايه ؟

**الشاهد** - ده اللى كنا نفتكره لكن دلوقتى الانجليز ..... .

**الرئيس** - زعق

**الشاهد** - اعتقد ان الاخوان فى النظام ييستعدوا للقتال فى

فلسطين أو القتال .

**الرئيس** - وهل الجهاد فى فلسطين أو القتال يكون بالتريسة

البدنية ؟

**الشاهد** - والتربية العسكرية فى حينها ولم يدرّبوا عسكريا

**الرئيس** - التربية العسكرية . ويستلزم ايه التدريب

العسكرى

**الشاهد** - التدريب على اطلاق النيران .

**الرئيس** - منين تعرف أنهم ما ادربوش على اطلاق النيران ؟

**الشاهد** - لانى ما ادربتش

**الرئيس -** اش عرفك

**الشاهد -** معنديش معلومات

**الرئيس -** احنا بنكلم عن الجهاز السرى

**الشاهد -** دى معلوماتى

**وكيل النائب العام -** كان فيه معسكر فى كرداسة

**الشاهد -** سمعت

**وكيل النائب العام -** مارحتش تدرب فيه

**الشاهد -** لا

**وكيل النائب العام -** هل كنت فى الحرس الوطنى ؟

**الشاهد -** لا ولم اطلق النار فى حياتى . ومعسكر كرداسة

كان يقام فى الصيف باشتراك ...

**وكيل النائب العام -** انت كنت أحد أعضاء الجماعة . والسلاح

جالكم اخيرا وكنتم بتدربوا دوريا فى معسكر كرداسة .

**الشاهد -** قلت انى سمعت ان فيه معسكر فى كرداسة وكانوا

بيدفعوا اشتراك خمسة قروش وهذا كل ما عرفناه عن كرداسة

**وكيل النائب العام -** مجموعتكم لم تدرب

**الشاهد -** لا .

**الرئيس -** لما كنت فى المجموعة كانت غرضها ايه ؟ المعروف ان

المجموعة الذى كنت فيها جزء من الفصيلة والفصيلة جزء من

المنطقة والمنطقة جزء من النظام العام للاخوان فهل الفصيلة وهى

جزء من المنطقة كانت من الجزء العلنى ؟

**الشاهد -** طبعا مش علنية .

**الرئيس -** يعنى سرية نظام خاص فتبقى جزء من النظام

الخاص وانت كنت أحد أعضاء النظام الخاص امال ليه انت بتقول

انك مداخلتش الا لما مسكت بدل محمود الحواتكى .

**الشاهد -** حضر اجتماع رؤساء المناطق فى العباسية .

**الشاهد** - انما ما كنتش مسئول عن الفصيلة الا لما كنت بدل  
الحواتكى .

**الرئيس** - هوه ده اللى علموكم عن الاسلام مش علموك ان تكون  
صريح وتبين كلامك ولا تغش ولا تدور .  
**الشاهد** - ايوه .

**الرئيس** - طيب ماتقول انك انت احد أعضاء النظام السرى  
الخاص .

**الشاهد** - انا قلت هذا فى اقوالى فى التحقيق

**الرئيس** - نجب نسمعه فى المحكمة

**الشاهد** - ايوه .

**الرئيس** - ايه التدريب العسكرى اللى ادريت عليه ؟

**الشاهد** - ما ادربتش عسكرى ، انما كان تدريب بدنى نروح  
معسكرات بس كده .

**الرئيس** - وايه التدريب البدنى ده وفى اى معسكر ؟

**الشاهد** - رحت معسكر كرداسة .

**الرئيس** - انت لسه بتقول انك ما رحتش كرداسة وانك  
سمعت عنه بس .

**الشاهد** - كانوا بيعملوا اعلان فى الشعبة عن المعسكر وبعض  
الاخوان كانوا يقضوا بعض ايام هناك بعد دفع الاشتراك .

**الرئيس** - والله انكم وصتمتم المسلمين وانكم وصمة فى جبين  
المسلمين واعتقادى الشخصى ان الاسلام لم يصل الى هوة كما  
وصل على يد جماعة الاخوان المسلمين لانكم كلكم كنايين

وكيل النائب العام - هل فهمت من خليل الذى بلغك الخطّة  
الموضوعة ان التعليمات ابلغت لمناطق اخرى ؟

**الشاهد** - ماقاش .

وكيل النائب العام - ايس هو المكلف بتبليغ الخطّة من الرياسة

الى المناطق ؟

**الشاهد -** ما أعرفش معنديش معلومات .

**وكيل النائب العام -** وايه اللي عملته بعد أن أبلغك خليل  
بالاغتياالات التي تدبر ؟

**الشاهد -** قلت للاخ محمود الحواتكى لاني شكيت في الامر  
خاصة وان الخبر خطير فقال لى لما أروح أستطلع الحقيقة ونزل  
هو وعبد الفتاح القرشى وقابل الاخ محمود والمسئولين .

**وكيل النائب العام -** هل سبق أن أبلغك خليل تعليمات أو كلام  
ظهر بعد ذلك إنه كذب ؟

**الشاهد -** طبعاً لا .

**وكيل النائب العام -** أمال ليه شكيت ؟

**الشاهد -** لخطورة التعليمات ولما بلفتها لمحمود نزل مع عبدة  
الفتاح القرشى ولما رجع قال لى أنه اتصل بأخ موثوق بيه ونفى  
الخبر .

**وكيل النائب العام -** احنا في خليل هل سبق أن أبلغك كلام  
كذب وايه الاجراء اللي اتخذته لتمنع هذه الكارثة ؟

**الشاهد -** أمرنا الاخوان كل واحد يقعد في بيته كل اخوان  
المنطقة .

**وكيل النائب العام -** هل بلغت رؤساء المجموعات ؟

**الشاهد -** لا .

**الرئيس -** أمال بلغت مين ؟

**الشاهد -** لايجب

**وكيل النائب العام -** اليس المفروض أن النظام الادارى هو  
الذى يقوم بالحركة الشعبية وانت مسئول عن هذا النظام ؟

**الشاهد -** الاخ محمود كان موجود وقررنا أنا وهو . هو يبلغ  
الناحية الخاصة به ونا أبلغ الناحية الخاصة بى .

**الرئيس -** أنت مش قررت دلوقت ان محمود كان فى اجازة من الفصيلة فهل يصح أنه يرجع فى الاجازة ويترأس الفصيلة ؟

**الشاهد -** ماكش فى اجازة ده كان مجرد اذن بالغياب

**الرئيس -** يعنى الفى الاجازة ؟

**الشاهد -** كنت لسة متفاهم معاه .

**الرئيس -** لكن الى هذه اللحظة انت كنت مسئول عن الفصيلة فهل ابلغت رؤساء المجموعات ؟

**الشاهد -** لا .

**الرئيس -** اسمهم ايه ؟

**الشاهد -** سعد ربيع وعبد الفتاح القرشى .

**الرئيس -** ودول من النظام الخاص والا لا ؟

**الشاهد -** ايوه

**الرئيس -** تبقى انت بلغت ناس فى النظام الخاص

**الشاهد -** المسئولين عن الناحية الادارية غير المسئولين عن

النظام الخاص

**الرئيس -** مين الوكيل بتاعك فى الشعبة ؟

**الشاهد -** مليش وكيل لانى رئيس منطقة مؤقت .

**الرئيس -** مؤقت هنا ولا تعرف شيئا عن النظام الخاص رغم

انك عضو فى احدى المجموعات وقلت انك سمعت عن معسكر

كرداسة ومع ذلك ثبت انك رحت معسكر كرداسة وتمرنت فيه

**الشاهد -** مفيش تمرينات ده كان برنامج رياضى .

**الرئيس -** وأنا ما قلتش انك اتمرنت على حاجة ثانية عليه

شكيت فى التمرين اللى قلت عليه

**الشاهد -** مشكتش فى حاجة .

**الرئيس -** طيب بتنفى التمرين ليه ؟

**الشاهد -** كانت برامج رياضية بس

**الرئيس** - تدريب أو تمرين . كمل وبعدن  
**الشاهد** - بس قررنا غلق المنطقة وأمرنا ان ما حدث من  
الاخوان يتصل بأحد .

**وكيل النائب العام** - هل يجتمع النظام السرى فى المنطقة  
**الشاهد** - لا

**وكيل النائب العام** - آمال يجتمع فين  
**الشاهد** - فى البيوت

**وكيل النائب العام** - ايه علاقة قفل المنطقة والاخوان لا يتصلوا  
بأحد ويعدوا فى بيوتهم اذا كان المفروض أنهم يجتمعوا سرا .  
**الشاهد** - كانوا يجتمعوا بمجرد ...

**الرئيس** - هل يمكن لأحد أعضاء النظام الخاص أن يتصل  
بأحد أفراد المجموعات الأخرى عن غير طريق رئيس الفصيلة  
**الشاهد** - لا .

**الرئيس** - اذن يبقى الحاجة المعقولة انك تسبب المنطقة  
مفتوحة آمال ليه انت قلت لهم اغلقوا المنطقة

**الشاهد** - خوفا من أحد يعمل حاجة من نفسه .

**الرئيس** - ما انت تقدر لما يدريك تعليمات ماتلفهاش  
**الشاهد** - يصح ينفذ .

**الرئيس** - مش لما تقول له ماتلقاش أوامر مش ينتظر ؟  
**الشاهد** - واجب يقول .

**الرئيس** - المسألة تبقى تأدية واجب شكلية .

**الشاهد** - من الناحية العملية هو المسئول عن كل تصرفاته  
من ناحية الاتصال . لكن احنا قررنا قفل المنطقة وما حدث  
يتصل بحد وكل واحد يقعد فى بيته .

**الرئيس** - لما يقعدوا فى بيوتهم ما يروحوش شغلهم ؟

**الشاهد** - لا . بعد الشغل ما يتصلوش بحد .

**الرئيس -** وما يقعدوش في القهوة ؟

**الشاهد -** لا يقعدوا في القهوة .

**الرئيس -** كان قبل الحادثة بأد ايه ؟

**الشاهد -** حوالى يومين .

**وكيل النائب العام -** هل تعرف على عبد المنعم .

**الشاهد -** نعم .

**وكيل النائب العام -** هل كان عضو في النظام الخاص ؟

**الشاهد -** اسمع انه من النظام الخاص .

**وكيل النائب العام -** وتعرف ايه عن الاسلحة التي ضبطت

عنده ؟

**الشاهد -** ما اعرفش .

**وكيل النائب العام -** مش انت رئيس فصيلة ؟

**الشاهد -** انا كنت رئيس مؤقت بس ومعديش معلومات .

وكان نشاطي مؤقت الى ان يتعين محمود وكنت اجتمع بالاخوان

اجتماعات عادية .

**وكيل النائب العام -** لما سلمك الرئاسة معرفتش مكان

الاسلحة .

**الشاهد -** لا .

**الرئيس -** ايه نظام تسليح الجماعة ؟

**الشاهد -** ما عنديش معلومات واسعة في الحكاية دي .

**الرئيس -** لما كنت عضو في الجماعة مش كنت تعرف ان

الفصيلة مكونة من اربع جماعات وكل جماعة لها رئيس ورديف

**الشاهد -** كل معلوماتي ان الفصيلة مكونة من ٢٨ شخص

ومقسمة الى اربع جماعات كل جماعة تتكون من سبعة اشخاص

**الرئيس -** والرئيس والرديف يبقوا ٣٠ والا الرئيس والرديف



من ضمن الجماعات .

**الشاهد -** ما عنديش معلومات واسعة في الحنة دي

**الرئيس -** بتفرقوا ما بين الحنة والحنة ازاي ؟

**الشاهد -** حنة ازاي

**الرئيس -** كل حاجة عندهم حنة

**الشاهد -** ما عنديش معلومات

**الرئيس -** قلت في أقوالك في التحقيق ان خليل ابلغك ان  
الخطه تبدأ باغتيال الرئيس جمال

**الشاهد -** أيوه

**الرئيس -** ماقلتش ليه هنا دلوقتى

**الشاهد -** قلت ان فيه فكرة لاغتيال بعض أعضاء مجلس

قيادة الثورة

**الرئيس -** اذكر لنا كل تفاصيل الخطه كما بلغت اليك

**الشاهد -** قال انه سمع من بعض المسؤولين هناك ان فيه

خطة لاغتيال أعضاء مجلس قيادة الثورة ومنهم الرئيس جمال

ثم قيام الاخوان بحركة شعبية وتهتف باسم شخصية عظيمة

معينة .

**الرئيس -** تبدأ خطة الاغتيال بالرئيس جمال او يكون منهم

**الشاهد -** قال لى منهم الرئيس جمال ثم يقوم الاخوان

بحركة شعبية تهتف باسم شخصية معروفة استنتجنا انها

محمد نجيب .

**الرئيس -** مين استنتج ؟

**الشاهد -** احنا كلنا

**الرئيس -** مين ؟

**الشاهد -** انا ومحمود .

**الرئيس -** هل كان خليل حلقة اتصال بينكم وبين المركز العام ؟

الشاهد - أيوه

الرئيس - ما هي الأوامر التي أبلغها لكم قبل هذا ؟

الشاهد - أوامر إدارية

الرئيس - زى إيه ؟

الشاهد - زى الاجتماع بتاع رؤساء المناطق لرعاية أسر المعتقلين والأوامر دى كان القصد منها أن كل منطقة تكون لجنة من عدة أفراد لرعاية أسر المعتقلين ودرس حالتها وعما إذا كانت تحتاج لاي شئ وعلى المجموعات أن تحاول أن تساعد كل أسرة من هذا القبيل

الرئيس - وانتهيتم على إيه ؟

الشاهد - أخذنا هذه التعليمات وكنا بصدد تكوين هذه

اللجان .

الرئيس - هل هذه هي المرة الوحيدة اللى اتصل بك فيها ؟

الشاهد - أيوه

الرئيس - بس المرة دى اللى اتصل بك فيها في مدة الشهرين

بتوع رياستك للمنطقة .

الشاهد - أيوه بس

الرئيس - مين قال لك عليه انه ضابط اتصال ؟

الشاهد - هو خليل قدم لى نفسه وقال لى أنا فلان من

إخوان بين السرايات والصلة بين المنطقة والمسؤولين فى المركز

العام .

الرئيس - ازاي تثق فيه وانت لا تعرفه ؟

الشاهد - اتصلت بالحواكى وقال لى انه فعلا من الإخوان .

الرئيس - هل تعرف محمود عبد اللطيف

الشاهد - لا

الرئيس - تعرف ممين فى منطقة أمبابة ■

الشاهد - ما اعرفش حد

الرئيس - ما تعرفش هندوى دوير ■

**الشاهد** - قابلته مرة في اجتماع رؤساء المناطق  
**الرئيس** - تعرف ابراهيم الطيب ؟  
**الشاهد** - عرفته في اجتماع رؤساء المناطق ولم اكن اعرفه  
قبل ذلك .

**الرئيس** - مين اللي ضمك لجماعة الاخوان ؟  
**الشاهد** - من حوالى سنة ١٩٤٩ او ١٩٥٠ بدأت انضم  
لشعبة الجيزة وكنت قبل هذا التاريخ اسمع محاضرات في  
المركز العام

**الرئيس** - ايه السبب في انك حببت تتأكد من شخصية  
خليل وتروح تسأل الحوانكى ؟

**الشاهد** - لانه قدم لى نفسه وقال لى انه الصلة بينى وبين  
المركز العام ولم اكن اعرفه وكنت عايز اعرف ان كان اخ ولا لا  
**الرئيس** - امال منتظر انه يقول لك ايه ؟

**الشاهد** - انا حببت انى اتأكد انه اخ صحيح وان كان حد  
يعرفه من المنطقة او لا

**الرئيس** - اخ او مش اخ مسلم او غير مسلم

**الشاهد** - محمود قال لى ايوه اعرفه

**وكيل النائب العام** - متى تشكل النظام الخاص بالوضع  
الجديد ؟

**الشاهد** - معنديش معلومات ومحمود هو الذى يعرف  
المعلومات .

**وكيل النائب العام** - مش كنت رئيس منطقة بقى لك أد ايه ؟

**الشاهد** - انا عملت رئيس منطقة من شهرين ومعنديش  
معلومات

**وكيل النائب العام** - متى انضمت الى المجموعة ؟

**الشاهد** - من شهرين أو ثلاثة

**وكيل النائب العام** - لما تشكلت المجموعات قبل كده مش  
كنت عضو فيها وعاصرت تشكيل المجموعات فى الاول ■

**الشاهد - أيوه**

**وكيل النائب العام -** ألم تقم بأعمال رئيس المنطقة فكيف  
لا تعرف متى شكل هذا النظام ؟  
**الشاهد -** معرفش

**وكيل النائب العام -** اشمعنى اختاروك رئيس منطقة وليه ؟

**الشاهد -** شبه توحيد فى العمل لانى كنت ماسك أعمالها

**وكيل النائب العام -** ماعمل محمود الحواتكى فى المنطقة ■

**الشاهد -** قائد فصيلة

**وكيل النائب العام -** وهل قائد الفصيلة مستقل عن رئيس

المنطقة ■

**الشاهد - أيوه**

**وكيل النائب العام -** الحواتكى وصلاح توفيق قالوا انك

شكلت الفصيلة مع الحواتكى وبعدين توليت رئاستها

**الشاهد -** لا أبدا الحواتكى هو المسئول واللى كان رئيسا وانا

كنت رئيس مؤقت الى ان ينتهى من مسألة التعيين

**وكيل النائب العام -** كان فيه منشورات تيجى لكم ■

**الشاهد -** لا

**وكيل النائب العام -** اخوانك توفيق ثابت وصلاح أبو الخير

قالوا انه جالك منشورات

**الشاهد -** لا

**الرئيس -** المفهوم ان رؤساء الشعب يكونوا اعضاء فى الفصائل

**الشاهد -** يصح بس انا ما عنديش خبر مؤكد .

**الرئيس -** اما ان يكون فيه تناسق او ان لا يكون هناك تناسق

**الشاهد -** يصح

**الرئيس -** يصح او ما يصحش ؟

**الشاهد -** انا اتكلم بالنسبة لما هو حاصل فى الجيزة لان ده

الى اعرفه

**الرئيس -** الدليل ان رئيس الشعبة لازم يكون عضو في المجموعة انك انت كنت عضو في المجموعة .

**الشاهد -** دا كان مؤقت

**الرئيس -** لماذا لم يختاروا غيرك ؟

**الشاهد -** الاخ يوسف هارون قال لى اذا اعتقلت فقم باعمالى في الشعبة وهو كان مسئول ولما اعتقل انا عملت رئيس الشعبة . ودى كانت حاجة مؤقتة مدة الاعتقال .

**الرئيس -** ولماذا لم يختاروا شخصا اخر بدلا منك ؟

**الشاهد -** هم بلغونى بان اقوم مقام الرئيس مدة الاعتقال

**الرئيس -** مين قال لك ؟

**الشاهد -** يوسف هارون

**الرئيس -** ايه يوسف هارون ده ؟

**الشاهد -** المسئول عن الشعبة

**الرئيس -** هل كان عضو في النظام ؟

**الشاهد -** معنديش معلومات

**وكيل النائب العام -** قلت انك لما ذكرت للحواتكى مابلغه اليك نخليل من التعليمات الخاصة بخطة الاغتيالات . الحواتكى ذهب ثم رجع وقال انه اتصل باخ مسئول واكد له ان الخبرده غير صحيح فمن هو الاخ المسئول او من هم المسئولين الذين اتصل بهم الحواتكى ؟

**الشاهد -** ماعرفش وقبل ماامسك بدله كان هو الذى يتصل بهم

**وكيل النائب العام -** المفروض انك تعرف من هو رئيس النظام السرى فمن تعتقد انه اتصل بهم ؟

**الشاهد -** محمود الحواتكى هو المسئول عن هذا النظام .

**وكيل النائب العام -** زى مين المسئولين دول ؟

**الشاهد -** المسئولين في المركز العام

**الشاهد -** طبعاً احد اعضاء مكتب الارشاد

**وكيل النائب العام -** ليس من المفروض أنه يتناقش معه

**الشاهد -** ودى كانت حاجة سريعة وهو نزل علشان يتأكد

بسرعة .

**وكيل النائب العام -** تعرف ابراهيم الطيب رئيس الجهاز في

القاهرة .

**الشاهد -** ماعرفش ..

**وكيل النائب العام -** محمود الحواتكى قال لك كده ؟

**الشاهد -** لا ..

**وكيل النائب العام -** قلت ان محمود الحواتكى قال لك ان

ابراهيم الطيب هو احد اعضاء الجهاز السرى المسئولين ..

**الشاهد -** قلت انه قال لى ان ابراهيم ده هو المسئول عن

النظام .

**وكيل النائب العام -** كان المفروض انك تقول للحواتكى روح

اسال ابراهيم الطيب

**الرئيس -** وابراهيم الطيب كان رئيس الاجتماع ؟

**الشاهد -** ايوه

**الرئيس -** على الاقل كان مفهوم انه رئيس رؤساء المناطق ..

كان ضابط اتصال ..

**الشاهد -** ماعرفش ..

**الرئيس -** يعنى هو ضابط اتصال والا رئيس ؟

**الشاهد -** هو كان رئيس الاجتماع ..

**الرئيس -** هل يراس اجتماع رؤساء المناطق ؟

**الشاهد -** طبعى يراسه ..

**الرئيس -** يعنى على الاقل ابراهيم الطيب فهمولك على انه

رئيس ؟

**الشاهد** - فهت انه رأس الاجتماع  
**الرئيس** - ابراهيم الطيب شغلته ايه فى جماعة الاخوان  
المسلمين ؟

**الشاهد** - ماكتتش اعرف

**الرئيس** - الشعبة والفصيلة تتبع مين ؟

**الشاهد** - تتبع المركز العام طبعا .

**الرئيس** - مين رئيس المركز العام ؟

**الشاهد** - مكتب الارشاد والمرشد .

**الرئيس** - ومين المسئول عن ادارة هذا الجهاز ؟

**الشاهد** - ماعرفشى ..

**الرئيس** - ماتعرفشى مين المسئول عن ادارة هذا الجهاز ؟

**الشاهد** - النظام العام او النظام الخاص ؟

**الرئيس** - لا .. البلد .. مين المسئول عن الجهاز ؟

**الشاهد** - مكتب الارشاد والمرشد

**الرئيس** - مين المسئول عن ادارة هذا الجهاز .. مين الرياسة ؟

**الشاهد** - ماعنديش معلومات ..

**الرئيس** - ماتعرفشى رياسة الاخوان مين ؟

**الشاهد** - مكتب الارشاد والمرشد .

**الرئيس** - مالك عمال تلف وتدور ..

**الشاهد** - لا والله ..

**الرئيس** - حذق اوى يعنى ؟

**الشاهد** - لاحدق ولا حاجة ..

**الرئيس** - طيب ماتقول .. مين رؤساء الاخوان ؟

**الشاهد** - مكتب الارشاد والمرشد .. ده الى اعرفه .

**الرئيس** - لما تيجى لكم اوامر تصدر منين ؟

**الشاهد** - باسم المركز العام .

**الرئيس -** ايه المركز العام ده .. مين الرياسة بتاعته ؟

**الشاهد -** مكتب الارشاد والمرشد العام .

**الرئيس -** لما تيجى اوامر تيجى باسم مين ؟ ..

**الشاهد -** ...

**الرئيس -** هى الاوامر اللى تيجى لكم يصح ما يكونش

المرشد العام صدق عليها ؟

**الشاهد -** ساعات تيجى الاوامر شففيه .

**الرئيس -** يعنى تيجى من غير مايصدق عليها المرشد ؟

**الشاهد -** ما قدرش اجزم .

**الرئيس -** يعنى شاكك ؟

**الشاهد -** ايوه .

**الرئيس -** يعنى الاوامر الشففيه يحتمل ان تكون من عند

المرشد او من غيره ؟

**الشاهد -** ايوه ..

**الرئيس -** وتطعها ليه ؟

**الشاهد -** ما قلت لحضرتك اتنا قفلنا المنطقة .

**الرئيس -** من الذى اعطاك الامر بانشاء جهاز سرى ؟

**الشاهد -** ما أعرفش .

**الرئيس -** لماذا انضميت كأحد اعضاء الجماعة .. جماعة

الاخوان انشأوا جهاز سرى مالكش صوت علشان تقول ايه

النظام السرى ده ؟

**الشاهد -** طبعى سألت . .

**الرئيس -** بأمر مين أنشئ الجهاز ده ؟

**الشاهد -** ما أعرفش .

**الرئيس -** انت عضو فى الجماعة والجماعة صلو لها امر ..



.. هذا الامر كان كتابى والا شفهى ايه شكل هذا الامر ■

الشاهد - طبعاً شفهى ..

الرئيس - الاوامر الشفهية بتقول انت لازم تتحقق منها ..  
هل تحققت من أمر انشاء الجهاز السرى أو النظام السرى انه  
امر شفهى صادر من المرشد ؟

الشاهد - لم اتحقق .

الرئيس - لماذا انضممت الى هذا الجهاز ■

الشاهد - على اعتبار انه بيقوم ببرنامج ..

الرئيس - مخالفًا في ذلك النظام بتاع الجماعة .. مش كده ؟

الشاهد - يصح ..

الرئيس - ... ما تقولش يصح .. قل : آه او لا ..

يصح .. ده ايه ؟

الشاهد - ..

الرئيس - ايه حكاية المنشورات ؟

الشاهد - ما أعرفش حاجة .

الرئيس - ماقرأتش منشورات طول وجودك في جماعة

الاخوان المسلمين ؟

الشاهد - ايوه .

الرئيس - كذاب .. اختار عشرة من الافندية المحترمين

الموجودين في الجلسة واسألهم تجددهم يقولوا لك انهم قرأوا  
هذه المنشورات .

الشاهد - عملى في المدرسة لم يكن يسمح لى

بقراءة المنشورات .

الرئيس - انت كنت مسئول عن المنطقة ؟ ■

الشاهد - كنت باسمع عنها ..

**الرئيس -** ألم تعط لك منشورات لتوزيعها ؟  
**الشاهد -** والله ما حصل وأنا مسئول عن هذا القسم .  
**الرئيس -** انت مسئول عن كل شيء .. مسئول عن الفضيحة  
ومسئول عن الجماعة ومسئول عن السرية ومسئول عن الانضمام  
من غير ماتعرف ومسئول عن مخالفتك الاخوان المسلمين  
ومسئول عن الكذب بتاعك .. مدرس وكذاب ومنافق ...  
مدرس بتدرس لاولاد صغيرين واطفال تعلمهم من نشأتهم  
الكذب والنفاق باسم الاسلام .

**وكيل النائب العام -** كلمة واحدة اخيرة .. لما بلغت اليك  
الخطبة او التعاون مع خليل ؛ انت قلت انك ما اتصلت بش برؤساء  
المناطق في حين ان ماهو ثابت في التحقيق انك ابلغته قبيل ارتكاب  
الحادث بان يستوثق من افراد جماعته وان يكونوا مستعدين .  
**الشاهد -** لم يحدث هذا .

**الرئيس -** نص الاخوان المسلمين على الاقل الى وقفوا امامنا  
الآن كذابين .. على الاقل فيه نص صادق ونص كذاب .. يعني  
على الاقل فيه ٥٠ ٪ منكم كذابين و ٥٠ ٪ صادقين دي نسبة  
الدعوة الاسلامية ونشرها بين طبقة مخصوصة .. يعني نشر  
الدعوة بتقوم بها جماعة نصفها كذابين ..

**الدفاع -** ما هي الدراسات التي كنتم تبشأرونها في  
النظام الخاص ؟

**الشاهد -** دراسات اسلامية صرفة .

**الدفاع -** هل من ضمن هذه الدراسات دراسة  
القانون الجنائي ؟

**الشاهد -** لا يا فندم .

**الدفاع -** ثبت في قضية معروفة اسمها قضية ( السيارة

الجيب ) ان النظام الخاص بيدرس بعض الاسس القانونية  
واهمها كيفية الدفاع عن النفس .

**الشاهد -** ماحصلش وما أدوناش حاجة من دى .

**الدفاع -** هل من ضمن هذه الدراسات ان الكذب حلال  
امام المحقق ؟

**الشاهد -** لايافندم .. مدارسناش حاجة زى كده .

**الدفاع -** فيه وثائق ضبطت فى سيارة ومن بينها هذه التعليمات

**الشاهد -** ماحصلش ..

**الدفاع -** من المصلحة ان تقرر هذا اذا كان الامر صحيحا .

**الشاهد -** لم ندرس هذا .

**الدفاع -** انت قررت بأنه بلغتكم خطة حاصلها الاعتداء على  
بعض حضرات الضباط ومنهم الرئيس جمال عبد الناصر فمن  
هم الذين كانوا سيقومون بتنفيذ هذه الخطة ||

**الشاهد -** ما بلغنيش حاجة .

**الدفاع -** ألم تفكر ؟

**الشاهد -** ماكانش فيه وقت للتفكير .

**الدفاع -** هل لدى جمعية الاخوان المسلمين جهاز سرى  
خاص بالتنفيذ غير الجهاز اللى انت فيه ||

**الشاهد -** لا اعرف .

**الدفاع -** هل الاعتصام بالسلبية فى التحقيق من ضمن  
التعاليم اللى كنتم بتلقونها ||

**الشاهد -** لا

**الدفاع -** ثابت ده فى القضية التى اشرت اليها .. الاعتصام  
بالسلبية والاجابة : لا اعرف ما اعرفش ..

**الدفاع -** ماهو مرتبك الذى تتقاضاه من الدولة ||

**الشاهد -** ١٩ جنيه ..

**الدفاع -** بخلاف العلاوات ؟

**الرئيس -** موجهها كلامه للشاهد - الى الخلف در  
( وهنا ادار الشاهد وجهه ناحية النظارة وظهره الى هيئة المحكمة )

**الرئيس -** موجهها كلامه لجمهور المتفرجين - مدرس يياخذ  
١٩ جنيه ويبيعهم أولاد حضراتكم والاطفال بتوع حضراتكم الى  
بتجيوهم وبتودوهم المدارس ..

ثم قال السيد الرئيس للشاهد : الى الخلف در !! فعاد  
كما كان ( ضحك )

**الدفاع -** دى مأساة .. مايمكنش تضحك .. بعد ان  
عرفت الخطة اللي حينفذوها الاخوان المسلمين ، هل استمر  
اعتقادك بان هذا الجهاز معمول للنط والقفز !!  
**الشاهد -** لا طبعى .

**الدفاع -** اذن اعتقدت ان هذا الجهاز للقتل والتدمير . ؟  
**الشاهد -** أبوه


**الرئيس -** الخطة اللي وصلتك على اعتبار انها خطة . .  
جاية من رئاسة الاخوان ... اى رئاسة دى !!


**الشاهد -** ما اعرفشى .. أنا كنت رئيس منطقة مؤقت .  
**الرئيس -** كعضو .. بلاش رئيس .. كعضو لما يجيلك  
أى امر أو أى بلاغ عن نية موجودة فى جماعة الاخوان بخطة  
موضوعة .. مين اللى يضع هذه الخطة ؟  
**الشاهد -** المسئولين .

**الرئيس -** مين هم المسئولين ؟

**الشاهد -** كثير .. المركز العام مسئول ..


- الرئيس** - الحيطان يعنى ؟ .. مين .. ماتقول ؟  
**الشاهد** - أعضاء مكتب الارشاد .
- الرئيس** - مين .. أمثال مين .. قل الاسماء كلها ..  
**الشاهد** - أعضاء مكتب الارشاد والمرشد العام .
- الرئيس** - قل أسماؤهم .
- الشاهد** - الدكتور خميس حميده . عبد المعز عبدالستار .  
حامد أبو النصر . محمد فرغلى . كمال خليفة . كمال الدين  
حسين ( ضحك ) .. عاوز أقول حسين كمال الدين . البهى  
الخولى . منير الدله . دول اللى متذكرهم .
- الرئيس** - تذكر واحد اسمه حسن الهضيبي ؟  
**الشاهد** - ده المرشد العام ..
- الرئيس** - يعنى ده مش من الرؤساء ؟  
**الشاهد** - أنا كنت باذكر أعضاء مكتب الارشاد ..
- الرئيس** - أنا ماقلتكش اذكر أعضاء مكتب الارشاد ، أنا  
قلت لك تذكر أسماء الرؤساء ..
- الشاهد** - وحسن الهضيبي .
- الرئيس** - الدين الاسلامى بيعلم الرماية والسباحة وركوب  
الخيال والا بيعلم النط ؟
- الشاهد** - الرماية والسباحة ..
- الرئيس** - ليه ماتعلمتوش ده ؟
- الشاهد** - ماعلموناش .
- الرئيس** - مافكرتش ان الدعوة دى تبقى ماشية غلط ؟  
**الشاهد** - الواحد بيعلم اللى فى طاقته .
- الرئيس** - أنت قررت الان ان الجهاز ده معمول للتقيل  
يعنى تنط فى كرش اللى عاوز تقتله ؟ .. ( ضحك ) مع السلامة  
( وعلى اثر ذلك انصرف الشاهد )





DATE DUE

LIBRARY






AUB LIBRARY

962.053:M214mA:v.1:c.1

محكمة الشعب: المضبطة الرسمية لمح  
AMERICAN UNIVERSITY OF BEIRUT LIBRARIES



01060411

962.053  
M214mA  
V.1

